

LOS HECHOS Jadu'n Nej Jesús Y'ayuccapxhuäcxpi Ytuun Yjajti

¹⁻² Ma je jayijp'atypi necy, migüg Teófilo, ti nyajnijayiy tüg'óciy jadu'n nej Jesús ytuuñ etz jadu'n nej yaj'ixpijctzondacy oga'n'aty, ixti cooni ypättigiy tzajpjoty. Ca'ni Jesús anajty ypättigiy tza-pjoty co hui'n'ijxy je' yjáy huidibi yi' y'ayuc ytiy'ajt capxhuäcxhib, e chi mïid je Espíritu Santo najztunïy najtz'ane'mïy nej huaad ajcxy ytunipy. ³ Co anajty Jesús y'ögy, chi ñayguëxici canaag'oc ma je' ydiscipulos ajcxy, e huixchiguïpx xii ñayquëxigo'ci ma je' ajcxy, yajniquëxigy huadz co anajty yju-ugyity, etz nañ yajmïidmïydacy je' yjáy je Dios y'ayuc etz Dios y'ané'min.

⁴ Co anajty jim ijtcixy tügmucy mïid Jesús, chi Jesús je' ydiscipulos ajcxy ane'my co ca' huaad jim choongixy jim Jerusalén. Chi ajcxy nimay:

—Ahuijxcix tiibi Dios nDeedy ahuanïy ma mi-ich ajcxy, je huidibi miich ajcxy nyajmïidmïydägy.

⁵ Janch Juan je Bautista jäy yajniibejt mïid niï, tzojc miich ajcxy xy'adigïhuipy xyjottigïhuipy yi Espíritu Santo.

Jesús ypättigiyñi tzajpjoty

⁶ Ni'amugï anajty ajcxy jim mïid Jesús, chi ajcxy yajtiy:

—¿Huindzin, nej myajcödigoyamy je Israeljäy ymidzip jadachambi?

⁷ Chi Jesús y'adzooy:

—Ca' xypaatcixy mnejhuuigixy je xii je tiempo mina anajty ti yhuaad'ajtni, mina Dios Teedy tunañ tijaty, je' tügpajc müid cötújcín tijaty ytu-namy. ⁸ Co anajty je Espíritu Santo chinaydacpicy ma ajcxy mjot mhuinma'ñ mbaatcixp mic'ajt. E chi mdzoongixp ayuc capxhuäcxpi müid ich ycixpi ya Jerusalén, etz tüg'óciy Judea ñaaxjot, etz jim Samaria, etz huindu'my ñaaxhuiñybi.

⁹ Ti jada ajcxy jadu'n yajnimäy, jim anajty ajcxy yhuindicxcixy, chi Jesús chajppejtni. Chi miñ joc yeeg huidi Jesús yajnidigoyday, chi ajcxy ca' ocjac'ijxni. ¹⁰ Jadu'n anajty ajcxy chachpät'ijxcixy tzajpcixy, co Jesús ypättigiy. Huin'it mejtz yëydijc ñayguëxici ma je' ajcxy ymijc, poob huit müid, ¹¹ chi ajcxy ñimaayi:

—Galilea jäy ajcxy, ¿nej co mdzachpät'ijxcixy tzajpcixy? Yi Jesús huidibi ti chajppety, ti chooñ ma müich ajcxy, minaamb jadüg'oc jadu'n nej ti m'ijxcixy co ti ypättigiy.

Matías yajhuin'ijxy co Judas ytung jijptuniiyipy

¹² Huin'it Jesús ydiscípulos ajcxy chooni ma je cögop huidi xiiip Olivos, yhuimbíjtcixni jim Jerusalén, ca' ooy yjiguëgyity, jëbi yajyöy sábado xii, jadu'n nej Moisés ycötújcín y'ane'my. ¹³ Co ajcxy yja'ty ma je cajp, chi ajcxy ypejty ma je cuarto mimetz nihuijtzpetypi ma ajcxy anajty müidity yjättac. Jim yi' anajty ajcxy: Pedro, Jacobo, Juan, Andrés, Felipe, Tomás, Bartolomé, Mateo, Alfeo ymang Jacobo, Simón je Zelote etz Judas Jacobo ymiguëx. ¹⁴ Tüg'óciy anajty ajcxy y'ijtcixy tügmucy Dios mibijctzoogixy chajpcapxycapxcixy.

Ymïid ajcxy anajty Jesús y'uch etz María Jesús ytaj, etz jacjadyii töxyjäydijc.

15 Huin'it xïi Pedro ytïnayïgy agujc'amy ma je ymïgügtijc ajcxy huïdibi yajmïj'ajtp Jesús, huïdi anajty ajcxy naybaatïp mïgo'px ja'iïpxti jäy, chi nimay ajcxy:

16 —Mïgügtijc, copïcy co jada yajcuydünïpy nej Dios ymïnañ ma ñecy huïdi jaybety ijtp, ma David jaay Dios y'ayuc, ma Dios nigapxy Judas. Je huïdi coduu'ajt taabi je judïojäy ajcxy majch Jesús. 17 Je Judas yaj'amïchomujcp je' anajty mïid ïch ajt, paatïp anajty Dios ytung tú'ciy mïid ïch ajt. 18 Chi Judas ñïcxy juy tüg naax mïid je muju'ñ huïdibi anajty ti paady mïid yjïbic-huinma'ñ. Chi jïm mic'amy ycäy tzuxcödeëñ, chi ytopxy ymooxac, e chi ytiinch ypïdzïmday. 19 Je jäy ajcxy huïdibi anajty tzïnaayb jïm Jerusalén, co nejhuïy, chi ajcxy yxïmoy je naax Acéldama, hue' je' yhuïmbïdzïmy ma je' ajcxy ayuc, ni'py ñaaxjot. 20 Jada je' je ayuc huïdibi David yjaay ma je Salmo necy:

Huï'mïp najtz'ixïy yï' chinaaydac. E ca' pïn yaj-tunïpy.

Nañ jadu'n ymïna'ñ:

Huingbi huen yajnicxyii je' ytung.

21-22 Copïcy co tüg yëydijc huïdibi mïid ti yhuïdity nHuïndzin Jesús quïpxyï mïid ïch ajt, huen tunïpy je tung huïdibi Judas anajty ytumyby, maab Juan yajniïbety ixti taabi xypuyöyduutim co pättigïy tza-pïjot, tüg jëbi testig'aty mïid ïch ajt co Jesús yju-gypïjcy.

23 Chi Jesús ydiscípulos ajcxy huïn'ijxy mejtz jäy: tüg jäy huïdi anajty yxï José, huïdi yxï anajty

yajtijy Barsabás etz nañ jadu'n anajty yajtijy Justo. E huin'ijxy ajcxy nañ jadu'n Matías. ²⁴⁻²⁵ Chi Jesús ydiscípulos ajcxy Dios mibijctzoy, ymínañ ajcxy:

—Huindzin Dios, m'ijxyp mnejhuñyb tüg'óciy jäy yjot yhuinma'ñ, yajni'ixiñygiçh jada metzpi jäy huídibi miich nidügti ti nhuin'ixy, je huídibi jébi jijptigiñy miich mdung tú'ciy mñd ich ajcxy, etz huídibi apóstol'adip. Huen jada jäy jijptigiñy je tung huídibi Judas ti yajtigooy, co ytundigooy e ñicxy ma ypaadyii.

²⁶ Chi ajcxy suerte ijxy, e je suerte ñibidzimni je Matías. E huin'ítiiy je Matías oy ymicho'ndigñy ma je nimajtügpi ajcxy huídi ycapxhuäcxy Jesús y'ayuc.

2

Co je Espíritu Santo ycidacy choñ tzajpjoty

¹ Co oy je Pentecostés xi paady, jim anajty Jesús ydiscípulos ajcxy ni'amugi' tú'ciy ijtcixy. ² Huin'it janch timitiini yajmidoy tüg ne'min, choñ tzajpjoty, jadu'n nej poj micpi. Chi yaj'ujtzaay je tigot ma anajty iñaaygixy. ³ Chi nigidaaci nidüg nidügti toodz jadu'n nej jñnye'n. ⁴ Chi je Espíritu Santo nidüg nidügti ajcxy y'adigñy yjottigñy. Chi ytigñyixni capxy miydaacp nije' nije' ayuc jadu'n nej je Espíritu ajcxy yajcapxyii.

⁵ Jim Jerusalén anajty je huin'it xi may judíojäy ajcxy huídibi tzoomb canaag agajp. Hue' ajcxy chachcuydumb judíojäy ycostumbre.

⁶ Co je cajpjäy ajcxy midooy je ne'min, chi ajcxy ooy yöymujcy. Chi je mayjäy ooy yhuinmay'ahuídiñy, co ajcxy midooy chachcapxcixy chachmiydaaccixy ma yci'm'ayuc.

⁷ Je mayjäy ajcxy ooy chigüy jihuüy, chi ajcxy ñayñimaayi miñ xyipy:

—Ix ¿nej cay Galilea jäy jada ajcxy nidüg'óciy huídibi jadu'n tzachcapxcixy tzachmiydaaccixy ñich ajt ngi'm'ayuc? ⁸ ¿Nej ñich ajt co nmido'mbíjcm co tzachmiydaaccixy ñich ajt n'ayuc huídibi ti nmibi'c'ájtím? ⁹ Ya anajty ajcxy Partia jäy, Media jäy, Elam jäy, Mesopotamia jäy, Judea jäy, Capadocia jäy, Ponto jäy, etz cham huídi tzinaayb ajcxy jim Asia ñaaxjot, ¹⁰ etz huídibi ajcxy tzomb jim Frigia, etz Panfilia, huídibi tzomb jim Egipto, etz huídibi tzomb jim ma yi Africa ñaaxjot Cirene ninaxy. Nañ jadu'n jim romanojäy huídibi ya adzinaayb. May ajcxy jim huídibi judíojäy etz nijëjity huídibi ca' yjudíojäyity huídibi judíojäy ycostumbre ajcxy ti yijptigiyi. ¹¹ Ya nañ jadu'n Creta jäy etz Arabia jäy; e ñich ajt tüg'óciy nmidoohuim jada jäy ajcxy nigapxcixy nimiyaaccixy huídi Dios ti tuñ mijcajee ma ñich ajt ngi'm'ayuc.

¹² Nidüg'óciy ajcxy ooy jihuüy, e chi ajcxy ooy yhuinmay'ahuídijty, miñ xyipy ñay'amidóohuigixy:

—¿Nej jada yhuimbidezima'ñ?

¹³ E nijëjity jäy jëyi nixigy yajxigy, ymínaangixy:

—Muucip jada yi' ajcxy.

Pedro yaj'ixpijcy je mayjäy

¹⁴ Huin'it Pedro ytinayigy mid je nimajctügpí apóstoles, e ytigüy capxpí mic ymínañ:

—Yëydijectjc ajcxy huídibi tzinaayb Judea etz tüg'óciy huídibi tzinaayb ya Jerusalén, nejhuihuipy miich ajcxy jada e midou ajcxy yajxon huídibi ajcxy nyajnimähuamyb. ¹⁵ Jada jäy ajcxy ca' ajcxy ymügyii jadu'n nej miich ajcxy mínaangixy. Tim

petyxini jada cham. ¹⁶ Jada je' huidibi ñigapxy je Joel, Dios y'ayuc najtzcapxybi, co jadu'n mina'ñ:

¹⁷ Je huin'it xii mina anajty je naaxhuiñybi cixa'ñ, jadu'n Dios mina'ñ, nyajhuäcxtähuibich je nEspíritu ma tüg'óciy naaxhuiñyäjy. Miich mnix etz mmang ajcxy capxhuäcxip ich n'ayuc ndiy'ajt, e je yujcyeecpidijc ajcxy yhuin'ixipy ooy mijhuinma'ñ, e je mijjäydijc cumähuiipy ajcxy.

¹⁸ Nyajhuäcxtähuiip ich je nEspíritu huin'it xii ma ich ndumbi yëydijcpi töxyjäybi, e yi' ajcxy capxhuäcxip ich n'ayuc ndiy'ajt.

¹⁹ Nyajquëxigibich tzajpcixy huidijaty oy chigiiñi, e ya naaxhuiñ nyegipyich tiy'ajt: ni'py, jii etz jiiñjoc.

²⁰ Yi xii ahuimbidipy coodz, etz je po' ahuimbidipy nej ni'py, ma anajty ca' miñ je xii je tiempo mina anajty mina'ñ je Huindzin Dios. Mij ayo'n ji tunaanip jadaanip iixna' quëxna'.

²¹ E tüg'óciy jäy huidi miyaaxp ojadajtp je Huindzin Dios, Dios ajcxy yajnidzögiib y'alma.

²² Chi Pedro yjacmina'ñ:

—Amido'ijtcix, miich judíojäy ajcxy, jadu'n nej cham nmína'na'ñich. Je Jesús huidibi tsoon jim Nazaret ti xyaj'ijxcixy Dios ymic'ajt, mijhuinma'ñ, etz iixpejt, jadu'n nej miich ajcxy ti m'ijxcixy ti mnejhuuygixy. ²³ Jada yajcïyejc ma miich ajcxy, jadu'n nej anajty Dios ti yajniögödugïy, e ti huinmay. Ajcxy mmajch je Jesús e myaj'ögy ajcxy, chi ajcxy myajcruudzpejty müd jibic jäydijc y'ané'min. ²⁴ Chi Dios yajjugypijcy yajnihuädzictuty ma yi ó'cin, ca'

huaad yhuí'my ögy huinixii. ²⁵ Je David ñimiydac Jesús chi ymínañ:

Nejhuíybich co je nHuindzin Dios y'ity ma íich nhuinduu. Yi' íjt ma íich n'a'oy, jigix ca'ydi pin xy'adzígíyich xyajhuinma'ñydi gooyich.

²⁶ Paady tí njotcugíyich, e tí ngapxypídzimíyich co ooy njotcujcích. Paady co oy n'ögibich etz ninícx ñaaxtigíhuipy, ca' ndajy mayich.

²⁷ Co miich Dios ca' myajhuí'ma'ñ íich n'alma ma ñaaxtigíydac. Ni mga'aa'ixíhuipy, co miich mdumbi huídibi ooy mdzocy, co nícx y ñinícx ñaaxhuindigoydäy.

²⁸ Miich Dios, tí xyajni'ixíyich yí tzínaayín huídibi ymíid jugy'ájtín huinixíibi. Xyajjotcugíhuibich míid co xymíid'idípyich.

²⁹ Chi Pedro yjacmínañ:

—Mígügtíj c ajcxy, huädz miich mnejhuíygyxy co íich ajt nmíj'ap David y'o'cy etz yajnaaxtigíyí. E ma ñaaxtigíy nmíidni jé'ajt chambaad. ³⁰ Je David hue' je' anajty Dios y'ayuc ñajtzcapxíybi, e ñejhuíyb anajty co tí Dios yajnimáyii huídibi ca' y'aníjity. David ñejhuíyb anajty co ma y'ap y'oc ma'xung'adípy Cristo, jaydēbi ané'mípy ma David y'ane'mdac. ³¹ Jadu'n co David jecy'ajty huinjíhuíy e nejhuíy etz nigapxy jadu'n nej yjugypíga'ñ je Cristo co anajty tí y'ögy. E ymínañ co ca' yí' y'alma yhuí'mípy jutjoty etz ñinícx ca' ypüdzípy. ³² Dios yajjugypíjcy je Jesús co y'o'cy. Jada tíy'ajt íich ajcxy nidüg'óciy nidíy'ajt'ajtpy. ³³ Jadu'n Dios Jesús mooy míj'ajt jíiby tzajpjoty, chí yajcídígíyí je Espíritu Santo huídibi Dios Teedy y'ahuaníy e tüg'óciy huídibi miich ajcxy

ti m'ijxcixy ti mmidoogixy jiiby yi' chooñ ma yi'.
 34 Com David ca' je' chajppejty, je David ci'm ymīnañ:

Je Huindzin Dios nīmay ñich nHuindzin: “Ñña' ma ñich a'oy'amy,

35 ixti cooni nmīmadactāhuībich yi' mmīdzip, jadu'n anajty nipaady nej jihuīy mdecypocxpejt'adyii.”

36 Chi Pedro yjacmīnañ:

—Ñejhuīhuīpy nidüg'óciy yi' Israel jāy ajcxy co janch janch co je Jesús huīdibi miich ajcxy myajcruudzpejt, Dios yajnībījc co yhuindzin'adīpy ma miich ajcxy, etz Cristo huīdibi xyñihua'nīpy xyajtzögīpy ajcxy.

37 Co je mayjāy ajcxy jadu'n mīdoy, chi ajcxy yjotyungīy, e amīdoy ajcxy je Pedro etz jacjadyii jāy huīdi Jesús y'ayuc capxhuācxi anajty, chi ajcxy ymīnañ:

—Migügtījc, ¿ti ñich ajcxy jēbi huaad nduñ?

38 Huin'it Pedro y'adzooy:

—Jothuimbijtcix e nībejtcix nidüg nidüg mīid Jesucristo yxi, jīgix Dios miich ajcxy mbocy xyhuinmeecxīpy. E jadu'n Dios xymōhuīpy je Espīritu Santo. 39 Huīdibi Dios y'ahuanīy miich yi' ajcxy mje' etz m'ung ajcxy, etz m'ap m'oc ajcxy, etz nañ jadu'n je jāy ajcxy huīdi jīguémīp, etz jacjadyii jāy ajcxy huīdi Dios huin'ixamy.

40 Mīid jadayaab ayuc etz jacjadyii ayuc Pedro yajnīmay capxhuijy je mayjāy ymīnañ:

—Ca' mmījpiāaccix je jāy ajcxy y'ayuc huīdibi ca' capxymīdoy Dios.

41 Jadu'n yjajti, je jäy ajcxy huıdıjaty mıbjıc Pedro y'ayuc, chi ajcxy ñııbejtay huın'ıt xıı. Ñımayııy ajcxy huıdıbı mıjpidac Jesús y'ayuc oy nidugıg mildı jäy. 42 Tüg'ócıy ajcxy anajty panıxcıxy yııxpıjcin jadu'n nej yıı Jesús y'apóstoles ajcxy yajıxpıjcy. Chinaaygıxy yquipxyjot yquipxyhuınma'ñ. Etz Dios mıbjıctzoogıxy e ñayyöymıjcıgıxy co anajty ajcxy chajcaagy tujc-huäcxaangıxy.

Jadu'n nej je mıbjıpidıjç chinaaygıxy jugy'ajtcıxy

43 Nıdüg'ócıy ajcxy anajty ooy mıjcajee jıhuııy. E Jesús y'apóstoles ajcxy ıjxpejt etz mıjhuınma'ñ ooy anajty tungıxy. 44 Nıdüg'ócıy je jäy ajcxy huıdıbı anajty tı ymıbjıccıxy ıjtp anajty ajcxy tüg mucy, e yajhuäcxcıxy tıjaty ajcxy anajty ymııd, mooygıxy ymıgügtıjç. 45 Ytoocpy anajty ajcxy yıı ypidägy huıdıbı anajty ymııd, e chi anajty yajhuäcxcıxy yıı meeñ nıje' nıje' nej pın tı yajmayjaty. 46 Jabom jabom anajty ajcxy ñayyöymugyıı ma Dios ytıjç, etz nañ ñayyöymugyıı ajcxy ma ytıjç tzajcaagy tujc-huäcxcıxy etz ycaaygıxy y'uuccıxy nı'amugı' jotcujç mııd ajcxy y'oyjot y'oyhuınma'ñ. 47 Ñı'ııgıxy nıyaaxcıxy yıı Dios, e tüg'ócıy jäy nayyajmıj'ajtıp anajty ajcxy. Chi je Huındzın Dios yajmayııy jabom jabom yıı mıbjıcpıdıjç, yıı huıdıbı anajty patp nıdzooçın.

3

Tüg tecyma'tpı chögy

1 Tüg xıı Pedro etz Juan ypättıgıy ajcxy tú'cıy ma Dios ytıjç, mıjminacy xıı anajty, je' je' anajty je horı mına ajcxy Dios mıbjıctzoogıxy. 2 Jabom

jabom anajty jäy yajniꝑxcixy ma je Dios ytijc'aguu tüg tecyma'tpi, jadu'n je' anajty ti yma'xung'aty. Chi ajcxy pidägy je tecyma'tpi ma je Dios ytijc'aguu huidi anajty yxi la Hermosa, jigix jim pijctzohuipy meen ma je jäy ajcxy huidibi tigiꝑyb ma Dios ytijc. ³ Co je jäy tecyma'tpi ijxy Pedro etz Juan ytigihuaangixy anajty ma Dios ytijc, chi pijctzoy meen. ⁴ Co Pedro etz Juan ijxy je tecyma'tpi, chi Pedro yminañ:

—Huindixpejtcich.

⁵ Chi je jäy huindixpejty, yjijp'ijxpy anajty ti möhuanip. ⁶ Chi Pedro je tecyma'tpi nimay:

—Ca' nmüdidyich plata, oori, huidibi janchtiy nmüdidich je' nmöhuip. Müd Jesucristo je Nazarepi ymic'ajt iich müch nimaayb: Tinaayig etz yöy.

⁷ Huin'it Pedro majch je tecyma'tpi ma a'oygi', e yajtinaygugiiy. Huin'itiy y'oyiiy ymicpijcy je ytecy etz ytecyög. ⁸ Chi je tecyma'tpi ytinaygugiiy etz chi najztibiiy. Chi jada' yöychoñ e ytigiiy ma Dios ytijc müd Pedro etz Juan yöyñip ñidijcni yujctijcni, yam Dios ooy jäymech. ⁹ Tüg'óciy je mayjäy ijxy co anajty yöyñip etz jäymech yi Dios. ¹⁰ Je jäy ajcxy y'ijxy'ajtpy anajty ajcxy je tecyma'tpi e ñejhuuygixyp co je' anajty je' huidibi pijtzohuo'cp pi'c meen ma Dios ytijc'aguu huidi anajty yxi la Hermosa. Paady je jäy ajcxy ooy chigiiy jihuiy, co ajcxy ijxy nej anajty yam ti ytunyii ti yjadyii.

Pedro nimiydacy nej anajty je tecyma't ti chögy

¹¹ Je tecyma'tpi huidibi anajty ti chögy ca' anajty ixmach Pedro etz Juan, e tüg'óciy yi jäy anajty ooy jihuiygiy huinmaaygixy. Chi mic'amy mayjäy

nimujcy Pedro etz Juan jim ma yi Dios ytijc huinduudui hidibi jäy ytijpy Salomón. ¹² Pedro co jadu'n ijxy je mayjay, chi ymíañ:

—Judío yëydijctijc, ¿nej co mdzachhuinmaaygixy mijcajee? ¿Nej co ñich miich ajcxy xychachhuindixcixy jadu'n nej jihuïy ñich ajcxy jada jäy ti nyajtzögyich ti nyajyöychooñich mïd ngïmmic'ajtich, o mïd co ñich ajcxy ooy nDios'ojadaty? ¹³ ñich'ajt nDios, je Dios huidi nmij'ap nmijteedy, je Abraham, je Isaac, etz je Jacob y'ojadaj, yi' ti yajtzögy jada tecyma'tpi, jigix yajcömayipy yi' y'ung Jesús huidibi miich ajcxy mgïyejc ma je tungmïdpi. E co je gobernador Pilato je' najtzmazihua'ñ, miich ajcxy ca' m'aa'axiïy. ¹⁴ Ma yjapadyii ajcxy mgapijctzoy co huen yajnajtzmazïy, je huidi anajty yajpaatp huädz etz tudägy, chi miich ajcxy mbijctzoy co huen yajnajtzmazïy tüg jäy huidibi anajty ti yjäyyaj'o'cy. ¹⁵ Jadu'n je jäy ajcxy yaj'o'cy je' huidibi anajty jugy'ajt yejcp. Je huidibi Dios yajjugypijcy ma anajty ti y'ögy e jada tiy'ajt ñich ajcxy nidiy'ajt'ajtpyich. ¹⁶ Mïd co ti mibicy Jesús yxiï, je mijhuinma'ñ huidibi Jesús ymic'ajt ti tuñ mïd jada pa'mjäy huidibi miich ajcxy m'ijxyp mnejhuïyb. Com ti mibicy Jesús paady ti chögy janch yajxondicni, jadu'n nej miich ajcxy nidüg'óciy ti m'ijxcixy.

¹⁷ Chi Pedro yjacmíañ:

—Nmigügtijcich, nejhuïybich co miich ajcxy etz mhuindzindijc yaj'o'cy Jesús, mïd co anajty mganejhuïygixy ti anajty ajcxy mduungixy. ¹⁸ Jadu'n cham Dios ti cuyduñ

jadu'n nej Dios y'ayucnajtzcaxi'yi'bi ym'ina'ñ co copicy co yi' Cristo yajnaxipy ayo'n. ¹⁹ Paady játyim jothuimbijtcix miich ajcxy ma Dios, jigix ajcxy mbocy yajjötztâhuipy. Huin'it je Huindzin Dios xyajniguexipy ajcxy jotcujc'ájtin huinixii, ²⁰ e yi' quexamb je Jesús, je Cristo, je huídibi Dios jayijp'aty yhuin'ijx co quexañ ma miich ajcxy. ²¹ Oy jadachambi Jesucristo y'oc-huí'mipy jii'by tzajpjoty ixti cooni Dios anajty yaj'oyiydäy tijaty, co jadu'n yjaay yi' y'ayucnajtzcaxi'yi'bi huídibi müd huädz yjot yhuinma'ñ huídibi ajcxy jecy'ajty tzinay. ²² Jadu'n Moisés nimay ich ajt nmij'ap nmijteedy jecy'ajty: “Je Huindzin Dios xyajninguexaan miich ajcxy tüg yi' y'ayucnajtzcaxi'yi'bi, huídibi pidzimamyb ma miich ajcxy mjuugy mmigüg jadu'n nej ich yi' xyguejxy. M'amido'idipy miich ajcxy yi' y'ayuc. ²³ Jadu'n yjadipy co tüg'óciy jäy huídibi anajty ca' capxymidooy je Dios y'ayucnajtzcaxi'yi'bi, huädz ajcxy ytigoydâhuipy, e tüg jü'bi'cy ajcxy idipy ma judío'jäy ajcxy yajpaady.”

²⁴ Chi Pedro yjacm'inañ:

—Jadu'n jada tüg'óciy Dios y'ayucnajtzcaxi'yi'bi, chondacy ma Samuel ixti ma jacjadyiini ajcxy, ñigapxtay ajcxy jadu'n nej cham ytuñyii yjadyii. ²⁵ Yi' Dios y'ayucnajtzcaxi'yi'bi ajcxy, miich je' anajty ajcxy mmij'ap mmijteedy. E je ayuc huídibi Dios yajnimay Abraham ycuydunaamyb müd miich ajcxy co jadu'n ym'inañ: “Ngonúucxi'bi'ch tüg'óciy naaxhuiñyjäy müd tüg miich m'ap m'oc.” ²⁶ Co Dios y'ung y'o'cy, chi Dios yajjugypijcy jadüg'oc, e quejxy jayijp ma miich ajcxy, jigix

xyconúucxcixipy, etz jigix nidüg'óciy miich ajcxy m'ixmadzipy yi mjibichuinma'ñ.

4

Pedro etz Juan ma tungmüdpí yhuinduu

¹ Pedro etz Juan jimni anajty tzachmüdmíydaaccixy je mayjäy ajcxy, co oy miingixy je judío teedy ajcxy, müd je soldado huindzin, je tzajptijc cuend'ajtpí etz müd saduceojäy. ² Ooy ajcxy anajty yjotmätcixy co Pedro etz Juan yaj'ixpijccixy anajty je mayjäy etz nimaaygixy co yi öcpi jugypigipy yi' ajcxy, com co Jesús yjugypicy co y'o'cy. ³ Chi je tungmüdpí ajcxy majch Pedro etz Juan, e chi ajcxy pidacy pujxtigoty ixti com jabomni, com ti anajty chu'ñ. ⁴ Mayjäy ajcxy huidibi anajty ti amido'ijtcixy je Pedro y'ayuc ymibijc ajcxy. E hue' je mibijcpidijc, ac yëydijctijcpi, yajmichomujcy jahueen ycamigoox mility.

⁵ Je com jabom ajcxy ñaymüjcci jim Jerusalén judíojäy tungmüdpí, je mijjäydijc etz yi escribas. ⁶ Nañ jadu'n jim anajty Anás huidibi anajty ane'mb je teedy ajcxy, etz je Caifás, je Juan, je Alejandro, etz tüg'óciy teedy mijtungmüdpí yjugymigüg. ⁷ Chi ajcxy pidacy Pedro etz Juan cujc'amy ma anajty ajcxy ñaymugyii, chi ajcxy y'amidooy:

—¿Pín miich ajcxy ti xymöy cötujcín co jada jadu'n ti mdungixy?

⁸ Huin'it Pedro ymüd anajty Espíritu Santo ma yjot yhuinma'ñ, chi ymíñañ:

—Miich ajcxy tungmüdpí etz judíojäy mijjäydijc,

⁹ yi' ñch miich ajcxy cham xyaj'amidoob yi oybi

tüibi yajtuñ ma tüg pa'mjäy e nejhuihuaangixy nej ti chögy. ¹⁰ Cham nimiydactäyich ma miich ajcxy mhuinduu, jaydëbi ajcxy nejhuidähuiipy tüg'óciy judíojäy, co jadayaabi jäy huídibi anajty tecyma'tpi, cham yajpaady ya ma miich ajcxy mhuinduu mic oy, miid je mic'ajt huídibi Jesucristo je Nazaretpi yejcpy, je jäy huídibi miich ajcxy myajcruudzpejt, huídibi Dios yajjugypijc co y'o'cy. ¹¹ Yi Jesús jadu'n nipaady nej tüg tzaa oybi, huídibi ajcxy potzpidijc, ca' yajtúngixy co ytijscojcixy. Jesús cham ti paady miitung ma Dios, jadu'n yi' ni paady nej tüg mij tzaa huídibi ytungbaatp ma poch ytaatz. ¹² Ca' jac ni pin huídibi jëbi xyajnidzoocim ajt n'alma. Jesucristo yi' je' tügpajc huídibi Dios yejc ma jäy ya naaxhuiñ huídibi jëbi xyajnidzoocim ajt n'alma.

¹³ Co je miitungmiidpi ajcxy ijxy midoy jadu'n nej Pedro etz Juan ajcxy huinmic jotmic ycapxcixy, etz nejhuiy co ca' ajcxy y'ixpiyjäyity, chi ajcxy ooy jihuiy huinmay. Nañ yi' ixcajp ajcxy co je' anajty huídibi ajcxy ti miid huídity Jesús. ¹⁴ Cha co yjactimjimity anajty je jäy huídibi anajty ti chögy ytinäy miid Pedro etz Juan, paady ajcxy ca'jajty nej midziptzoonipy. ¹⁵ Chi je tungmiidpi ni'ane'mdiy huen yajpidzimiyi Pedro etz Juan ma je mayjäy anajty ñaymugyii, jigix ac jëyi tungmiidpidijc iyoöyaangixy capxyöyaangixy Pedro etz Juan ypocy. ¹⁶ Chi ajcxy ymíñañ:

—¿Ti cham nduunim miid yjiibi jäy ajcxy? Com tüg'óciy jäy huídibi tzinaayb ya Jerusalén ñejhuiyb ajcxy co ti túngixy mijhuinma'ñ, e ca' huaad ich ajt nmínaanim co ca' yjanchity. ¹⁷ Tzoc

capx'adujcim co ca' huaad ajcxy jacnimiydägiipy Jesús jadachambi etz jacnicxpi xii tiempo.

¹⁸ Chi ajcxy mijhuoy Pedro etz Juan, chi ajcxy nimay co ca' huaad ajcxy ni nej ocnimiydaacnip, ni ca' jacyaj'ixpiigiipy miid Jesús yxii. ¹⁹ Huin'it Pedro etz Juan y'adzooy:

—Huinmaaygix miich ajcxy ci'm pen tiy'ajt jada ma Dios co iich miich ajcxy ngapxycöbigiipy jayijp, ca'ydi yi Dios. ²⁰ Com iich ajcxy ca' nni'amonaangixy jadu'n nej iich ajcxy ti n'ixy ti nmidooy.

²¹ Huin'it je tungmiidpi ajcxy adzigi'ñ migapxy Pedro etz Juan, e najtzmazhiy ajcxy. Ca' ajcxy mihuinma'ñybaty nej tzaachytunipy Pedro etz Juan. Com tüg'óciy jäy yjäymejchpy ycömaayb anajty yi Dios jadu'n nej anajty ti ytuñyii ti yjadyii. ²² Je jäy tecyma'tpi huidibi tzooc co Dios mijhuinma'ñ ytuñ, ymiid anajty yjimijt huixchiğiipx naxy.

Je mibijcpidijc ajcxy pijctzoogixy ma Dios jotmic'ajt

²³ Chi Pedro etz Juan co yajnajtzmazhiy, chi ajcxy ñicxy ma ymigügtijc anajty, yajm#dmiydactay tüg'óciy jadu'n nej teedy huindzin etz mijjäydijc anajty ti ñimáayigixy. ²⁴ Co jada ayuc ajcxy midoy nidüg'óciy ajcxy tú'ciy yjot yhuinma'ñ pidacy, chi ajcxy Dios mibijctzoy yminañ ajcxy:

—Huindzin Dios, miich je' ti m'oyduñ je tzajp, je naaxhuiñybi, je meyy etz tüg'óciy tijaty. ²⁵ Miich miid mEspíritu je David myajcapxy, e yi' jadu'n yminañ:

¿Nej co jada naaxhuiñybi jäy chachhuaangixy chachjihuiñygyxy, e yi jäy ajcxy huinmaaygixy huídibi ca' ytimytiijity?

²⁶ Yi reydiyç ya naaxhuiñybi midziptzooñ ajcxy yi Dios. Etz je tungmüdpç cajp cajp ñaymujç ajcxy, midziptzoñ ajcxy Huindzin Dios, etz midziptzoñ ajcxy Cristo.

²⁷ Com janch co je rey Herodes etz yi gobernador Poncio Pilato ñaymujç ya ma jada cajp müd huídibi ca' yjudíoçyity ajcxy etz müd judíoçy ajcxy, midziptzoñ ajcxy yi m'ung Jesús huídi anajty ti mhuin'ixy. ²⁸ Yi' ajcxy ti cuydungixy tüg'ócüy jadu'n nej müich, Huindzin Dios, ti myajnigödugiy jadu'n nej ytunñyb yjadiyb. ²⁹ Jadachambi Huindzin Dios, ix jadu'n nej yi tungmütpç xychachmijotmá'tcixyich. Mo' yi mdumbi ajcxy jotmic'ájtín, jigix m'ayuc ajcxy capxhuäcxipy amic jotmic, ³⁰ e müd müich mmic'ájtín chögipy pa'mjäydijç, tunipy ajcxy tijaty ijxpejt etz mijhuinma'ñ müd yi m'ung Jesús yxii, huídibi müd huädz yjot yhuinma'ñ.

³¹ Co ajcxy mibijctzoday, chi je naax chuyuuy ma anajty ajcxy tügmucy yajpaatçixy, etz nidüg'ócüy yi' ajcxy ymic'ajt mooyi je Espíritu Santo, e yi Dios y'ayuc capxhuäcxixy anajty amic jotmic.

Je mibijçpidijç tú'çiy anajty ajcxy yjot yhuinma'ñ

³² Je mayjáy huídibi anajty ti mibicy, tú'çiy ajcxy yjot yhuinma'ñ. Ni pín anajty ycamina'ñ co naydüg jé'adyii. Hue' anajty ymínaangixy co tú'çiy jé'ájtigixy. ³³ Je majmetzpi Jesús y'ayuccapxhuäcxpi amic jotmic capxhuäcxxy je tiy'ajt jadu'n nej je Huindzin Jesús yjugypijçy

co y'o'cy. E mij ajcxy Dios ypubejti. ³⁴ Ma je' ajcxy ca' ni ti yajmayjajtcixy, com tüg'óciy tijaty anajty ajcxy ymiid ñaax o ytiyc ytoocpy anajty ajcxy, e yejccixy anajty meeñ. ³⁵ Chi je meeñ yajc'idigiiygixy je apóstoles ajcxy e yi' ajcxy moy nidüg nidüg pinjaty yajmayjajtp. ³⁶ Jim anajty miid je' ajcxy tüg levita jäy huiidi anajty yxi José, huiidibi ma'xung'ajt ma yi ñaaxjot mejy agujc huiidibi yxi Chipre, je huiidibi je majmetzpi Jesús y'ayuccapxhuäcxi, yxi moy Bernabé, huiidibi huimb'dzim je yajjotcujc'ajtpi. ³⁷ Je Bernabé tocy ytundac huiidibi anajty ymiid, e chi mimiñ je meeñ, e yajc'idigiy je apóstoles ajcxy.

5

Je Ananías etz Safira ajcxy Dios midundigoy

¹ Chi jadüg yëdyjc, huiidi anajty yxi Ananías, miid ytöxyjc, Safira, toogy ajcxy tüg it ytundac. ² Ananías ñayajnihui'mi jac'anaxy je meeñ, e yajnicxy Jesús y'apóstoles ajcxy je jac-hueenip, jadu'n nej jihuiy yejctay tüg'óciy, etz yi' ytöxyjc ñejhuuyb anajty. ³ Chi Pedro nimay Ananías:

—Ananías, ¿nej co myajtuñ je mujcu' yhuinma'ñ, e mhuiñ'ñañ je Espíritu Santo, e ti mbugoñ jac'anaxypi meeñ nej ti tzoo'adyii yi pidägy tiibi mdoogy? ⁴ ¿Nej ca' anajty yi' miich mdundac'adyii? E co ti mdoogy, ¿nej ca' anajty je' miich mmeñ'adyii? ¿Nej co jadu'n ti mdundigooy? Dios ti mhuiñ'ñ, canan jäy.

⁵ Co jadu'n midoy, jimiyi Ananías yciday, e chi y'o'cy. E tüg'óciy jäy ajcxy huiidijaty nejhuuy, ooy ajcxy chigiiy. ⁶ Huin'it ymiñ jadyii yujcyeecpidijc,

chi ajcxy mo'ñ Ananías ñinícx, e oy ajcxy yajnaaxtigïy.

⁷ Codugiig hori naxy, oy ytigïy je Ananías ytöxyijc, e ni ca' nejhuïy anajty ti ti ytuñyii ti yjadyii je ñäy.

⁸ Pedro y'amidoohui:

—Yajnimaaygich, ¿nej janch jadu'n ti mdooccixy yi mdundac jadu'n nej ti mgapxcixy?

Chi je töxyjäy y'adzooy:

—Janch jadu'n ti ndoogyich.

⁹ Chi Pedro yminañ:

—¿Nej co ti mnaygápxigixy mhuin'inañ yi Espíritu Santo? Cha ma tijc'aguu je jäy ajcxy ytinäy huidi oy ti yajnaaxtigïy mñäy, e jadachambi miich ajcxy xyajnicxaam nañ jadu'n.

¹⁰ Tim huin'itïy Ananías ytöxijc yciday, e chi y'o'cy. E chi oy ycidägy ma Pedro ytecymijc. Co je yujyeeepidijc ytigïy, chi ajcxy je' paaty ögy. Chi ajcxy yajpidzimy etz oy yajnaaxtigïy ma ñäy ymijc.

¹¹ Chi tüg'óciy je jäy ajcxy huidibi Jesús mibijcp etz tüg'óciy huidibi midou jada nej ti yjadyii ti ytunyii, chi ajcxy ooy chigïy.

Canaag mij'ijxpejt etz tiy'ajt

¹² Je majmetzpi Jesús y'ayuccapxhuäcxpi ooy anajty ajcxy Dios ymic'ajt yajniguëxici etz ijxpejt yejccixy ma yi jäy ajcxy. E tüg'óciy jäy ajcxy huidibi Jesús mibijc jabom jabom anajty ñayyöymújcigixy ma Dios ytijc huinduu huidibi yxii Salomón. ¹³ Ca' jac ni pin anajty mijnicxpeda'ñ mijyöyepeda'ñ je' ajcxy. E je jäy ajcxy yjacyajmij'ajtpy huidi Jesús anajty ooy mibijccixyp. ¹⁴ Mayjäy oy mibijcni Jesús y'ayuc, yëydijctijc etz töxyjäydijc. ¹⁵ Etz ixti pa'mjäydijc anajty ajcxy yajnicxy mijtügujc

cijx'aam pidaaccixy, jigix co Pedro ñaxipy jim ycadimjegyity co nicxy y'aa'ap yjaty ma je pa'mjäy. ¹⁶ Nañ jadu'n mayjäy chooñ anajty huidijaty huington ycajp, ymiingixy Jerusalén, miidmiingixy pa'mjäy, etz huidibi ca'oybi miid ma yjot yhuinma'ñ, e tüg'óciy yajtzoocaaayb anajty ajcxy.

Pedro etz Juan yaj'ixhuidijtcixy yajpahuidijtcixy

¹⁷ Huin'it je teedy mijtungmiidpi etz huidibi sadowe iixpijcin ymijpidacp ooy ajcxy yajca'oy'ijxy, ¹⁸ e co ajcxy majch je apóstoles ajcxy, chi ajcxy pidacy ma je mijpujxtijc. ¹⁹ Chi Huindzin Dios tüg y'ángel je huin'it coodz yaj'ahuaach je pujxtijc aguü, yajpidzimy ajcxy, chi ajcxy nimay:

²⁰ —Níxcix, tinay'ahuüygix tzajtigoty, yajmiidmiydaaccix yi mayjäy ajcxy Jesucristo ytiy'ajt nej jëbi jäy ajcxy paadipy jugy'ájtin jemybi.

²¹ Co jadu'n midoy, chi com jabom ytigüy ajcxy jopyñi tzajtigoty. Jiiby je' ajcxy anajty ñiyaj'ixpijcco'ni.

Chi je teedy mijtungmiidpi etz jacpinjaty miid, chi ajcxy capxyñiguejxy yi judíojäy ymijjäydijc etz ixpicytijc co huen junta jadyii. Chi ajcxy capxyñiguejxy huen nicxy yajpidzimyii jiiby pujxtigoty yi apóstoles ajcxy. ²² Co je policías ajcxy ymejch ma je pujxtijc, ca' ajcxy paady je apóstoles ajcxy. Chi ajcxy huimbijtni miid tiy'ajt, ²³ chi ajcxy nimay:

—Hue' ñch ajcxy ti nbaadcixy yi pujxtijc aducy, etz je soldadtijc jim tijc aguüy yjaccuend'ajtcixy. Chi co ñch ajcxy nyaj'ahuäch je pujxtijc, ca' ñch ajcxy ni pin ti nbaatyich jiiby pujxtigoty.

²⁴ Co jadu'n ajcxy midoy, je teedy mijtungmüdpí etz je soldado huindzin, etz jacjadyii teedy huindzin ajcxy, chi ajcxy ooy huinmay nej jada y'occogixihuip. ²⁵ Huin'it tüg jäy miin huidibi nimaayi ajcxy:

—Je jäy huidibi miich ajcxy mbidac pujxtigoty, chim je' ajcxy tzajtigoty yaj'ixpijccixy yi mayjäy.

²⁶ Chi je soldado huindzin müd soldadtijc ñicxy ma yi apóstoles ajcxy jäy yaj'ixpijccixy, chi ajcxy yajnicxy oy'amy, com tzigüyb anajty ajcxy co je mayjäy chaagädzüyb. ²⁷ Co ajcxy yajmiin, chi ajcxy pidacy ma je maytungmüdpí yhuinduu. Chi je teedy mijtungmüdpí je apóstoles ajcxy nimay:

²⁸ —Hich ajcxy ti ngapxaducy co ca' huaad m'ocjacyaj'ixpijccixni ma Jesús yxi. E ¿ti ti mdungixy? Ti myajhuäcxtaaygixy yi m'ixpijcin ma Jerusaléngajp, e ich ajcxy miich pocy xyjátym yajmihuimam co Jesús y'o'cy.

²⁹ Chi Pedro etz jacjadyii apóstoles ajcxy y'adzooy:

—Copicy ich ajcxy ngapxycöbigipyich yi Dios jayijp ca'ydi jäy. ³⁰ Je Dios huidibi ich ajt nmij'ap nmijteedy y'ojadaj, yi' yajjugypijc je Jesús huidibi miich ajcxy myaj'oc cruudzcíxy. ³¹ Je Dios Teedy jadachambi hue' Jesús müdity aa'oy'amy jii by tza-jpjoty, e ti pidägy ane'mbi etz yajnidoocpi jigix yi judío jäy ajcxy yjothuimbidity e yajhuinmeecxipy ajcxy ypocy. ³² Hich ajcxy tiy'ajt nyejcpy müd jada ycxipi, etz nañ jadu'n je Espíritu Santo huidibi Dios ymooyb pinjaty capxymidoohup.

³³ Co je jäy ajcxy jadu'n midoy, chi ajcxy ooy yjotmätcoty, chi ajcxy jayaj'öga'ñ. ³⁴ Huin'it

ytinayigy ma je naymujctac tög fariseojäy, hue' anajty yxii Gamaliel, hue' je' anajty Moisés yley ñihuindzin'ájtíp. E jäy ajcxy ooy anajty yajmij'ajtcixy je Gamaliel. Chi je' ni'ane'mdiy co huen yajpidzimyii tzojcyi jilby tiba'y je apóstoles ajcxy. ³⁵ Chi Gamaliel nimay yi tungmüdpí ajcxy:

—Judío yëydijctijc ajcxy, íxcim ti mdungixy müd jada jäy ajcxy. ³⁶ Jäymetz müich ajcxy co jecy'ajty je Teudas ypidigy yminañ co je' ymijity yjanchity, e chi ypanicxi oy nimidaax migo'pxti yëydijc. Chi ajcxy yaj'o'ci, chi tög'óciy huidibi anajty ti ypanicxyii yöyhuäcxtay, e jadu'ñyi je' ajcxy ñitigoyday. ³⁷ Jacnamni je huin'it xii mina capjäy anajty ñecypejtcixy, ypidigy Judas huidibi tzon Galilea. Mayjäy ypanicxi; nañ jadu'n ajcxy yaj'o'cy, e tög'óciy jäy huidibi panicxy jadu'ñyi ajcxy yöyhuäcxtay. ³⁸ Paady hch müich ajcxy jadu'n nimaaygixy, ixmajtzcix yi apóstoles ajcxy, e ca' mmijyöybejtcixy. Peni jäy yi y'ayuc ytiy'ajt huidibi ajcxy ymüd, cixip tigoyip yi'. ³⁹ Pen Dios y'ayuc ytiy'ajt yi' ajcxy ymüd, ca' ajcxy mjadipy nej myajcödígóoygixyipy. Jaty nayguend'ájtigixy, ca' jecyity co Dios anajty müd mdziptungixy.

⁴⁰ Nidüg'óciy ajcxy jäygidacy Gamaliel ycapxhuíjn. Huin'it ajcxy mijhuoy yi apóstoles ajcxy. Chi ajcxy tzaachytuñ, chi ajcxy c'íajty, etz capx'adujcy co ca' huaad Jesús y'ayuc jaccapxhuäcxip. Huin'it ajcxy najtzmazdy. ⁴¹ Je apóstoles ajcxy ypidizimy ajcxy ma tungmüdpí ajcxy yhuinduu ooy yjotcujcity co Dios jadu'n ti aa'ixiy co huen tzaachytuñyii müd Jesús yxii ycixpi. ⁴² E ooy ajcxy yaj'ixpijccixy etz nimiydaaccixy

Jesucristo jabom jabom jadu'n tzajtigoty nañ jadu'n majaty tijc.

6

Chi ajcxy yajñibejty huixtujc mutztungmüdpí

¹ Je huin'it xñ ajcxy huídibi ixpijcp Jesús y'ayuc ñigí anajty ñimayiy'adiitzcixy. E huídibi anajty capxp griego ayuc ytigüy nayñigápxip müd huídibi judío y'ayuc capxp. Ymínaangixy co yí griegojäy co'ögy töxyjädjic, ca' anajty ajcxy paady quipxy-jaty müd je judíojäy co'ögy töxyjädjic caayin uucin jabom jabom. ² Huin'it yí majmetzpi apóstoles ajcxy yajnaymujctaayí je jäy huídibi Jesús mibijcp, chi ajcxy ymíñañ:

—Ca' huaad ñich ajcxy Dios y'ayuccapxhuäcxin n'ijxmajch, e ñicxyich caayin uucin yajhuäcxixy. ³ Paady miich ajcxy migügtijc nayhuin'íjxigix huixtujc yëdijctijc huídibi oy yajmij'ajtni Dios, huídibi huädz oy yhuinma'ñ ymüd, huídibi je Dios yjihui'ñ ymic'ajt müd, e huen ajcxy tung'adib jada tung. ⁴ ñich ajcxy njacmibijctzohuamy Dios, etz ñich ajcxy njacyaj'ixpigamy Dios y'ayuc.

⁵ Tüg'ócíy ajcxy jäygidacy je' ayuc. Chi je mayjäy huin'ijxy Esteban huídibi ymüd ooy ymibijcin, etz ymüd Espíritu Santo. Nañ huin'ijxy ajcxy Felipe, Prócoro, Nicanor, Timón, Parmenas, etz Nicolás. Nicolás ca' je' anajty yjudíojäyity. Hue' je' anajty chooñ jím Antioquía, jécyip anajty jijptigiyiyñi judíojäy ytiy'ajt. ⁶ Chi ajcxy yajñicxy je jäy ma je apóstoles ajcxy. Chi ajcxy je apóstoles Dios mibijctzoy e cñixajy ajcxy.

⁷ Je Huindzin Jesús y'ayuc ñigi anajty jäy tzachnejhuñi. E je mibijcpidijc ñigi anajty ajcxy chachnimayñi jim Jerusalén, ixti may judío teedy ajcxy ymibijcy.

Majch ajcxy Esteban

⁸ Je Esteban ymüd anajty Dios ymic'ajt etz y'oy'ajt e oy mijhuinma'ñ tuuñ, etz yejcy iixpejt ma jäy ajcxy. ⁹ Huin'it xi nijëjty ixpicytjic ooy ñay'ijxquípxigixy y'ixpijcin müd Esteban jim ma judíojäy ajcxy ñaymujctac huidi anajty yxi Libertados. E jim anajty Cirene jäy, Alejandria jäy, Cilicia jäy, etz huidibi tzomb jim Asia ñaaxjot. ¹⁰ Ca' ajcxy mimadacy Esteban com hue' je' anajty ycapxy müd yhuijy'ajt ycujc'ajt huidibi je Espiritu Santo anajty mooyip. ¹¹ Chi Esteban ymidzip ajcxy mujuy jäy huidibi jëbi ñihuambety Esteban, co ti anajty ooy ycapxtigooy etz ni'ojy Moisés etz Dios. ¹² Jadu'n ajcxy yajyuumigy yaj'oxigy yi jäy mijjäydijc, etz huidibi ajcxy yaj'ixpijcp Moisés yley. Chi ajcxy mimadacy majch ajcxy Esteban, yajnicxy ajcxy ma je judíojäy ymijtungmüdpí etz ixpicytjic ñaymújcigixy. ¹³ Chi ajcxy ixtaayi jäy huidibi ñihuambedib, chi ajcxy yminañ:

—Jada Esteban jibic nigapxy yi Dios ytjic etz Moisés ytiy'ajt. ¹⁴ Ti ñch ajcxy midoy co yminañ co Jesús je Nazaretpi yjidamy je Dios ytjic, e yajtigadzañ Dios ytiy'ajt jadu'n nej Moisés ajt xy-mooyim.

¹⁵ Huin'it je judíojäy tungmüdpí e tüg'óciy jäy nej anajty ajcxy jim ñaaygixy huindicxpejty ajcxy Esteban. E chi ajcxy ijxi yhuiñyjip jadu'n anajty quëxigy nej y'ángel yhuiñyjip.

7

Esteban ñaygohuaani ma tungmüdpï yhuinduu

¹ Huin'it je teedy mïjtungmüdpï yaj'amidooy Esteban:

—¿Nej janch jadajï?

² Chi Esteban y'adzooy:

—Migügtïjc ajcxy etz mijjäydïjc ocmidoogix. Hich ajt nDios mijpi janchypï nayquëxïci ma ñich ajt nmij'ap nmïjteedy Abraham jecy'ajty co anajty jim ity Mesopotamia ñaaxjot, ca'ni anajty chinaydacpiçy jim Harán. ³ Chi Abraham Dios ñimaayi: “Ixmatz mnaax mgajp etz tüg'ócïy m'amigügtïjc, e nicx ma yi naaxjot huïdibi myajnixïhuamyb.” ⁴ Chi Abraham choon ma yi Caldea ñaaxjot, e nicxy tzïnaydacpiçpi jim Harán. Co yteedy oy y'o'cni, chi Dios Abraham yajmiiñ ma jada naaxjot ma miich ajcxy cham mdzïnäy. ⁵ E ca' Dios moy Abraham jada naaxjot ya, ni ca' ma yhuäcxtägïpy. Hue' je' janchtiy yaj'ahuanïy co möhuaanïy y'ap y'oc, e co anajty je' ajcxy jëdïb. Oyñi anajty Abraham ca' y'ung müdity co Dios ymïgapxi. ⁶ Nïmaayi Dios co y'ap y'oc y'adzïnähuïpy ajcxy ma huïngjäy ñaaxjot, etz chi ajcxy ytumbi'adïyb etz chaachytunïyb mïdaax mïgo'px jimïjt. ⁷ Nañ jadu'n Dios nïmay Abraham: “Ndzaachytunïpyich je naax cajp ma yi m'ap m'oc anajty ytumbi'adyii. Chi choonip ajcxy jim, e chi xymïdunïpyich ma jada yaabi it.” ⁸ Dios ytuun tüg capxytuunin müd Abraham, co huen ajcxy yajtiy'ajttïhuip. Paady co Abraham y'ung Isaac yma'xung'ajty coductujc xï ajcxy oy tiy'ajttïy. Nañ jadu'n Isaac ymang Jacob, e Jacob yi

ymang nimajmetzpi ajcxy, huídibi ajcxy ñi'ap'ajty yi nimajmetzpicypí Israel ycajp.

⁹ Chi Esteban yjacmínañ:

—Je' ajcxy Jacob ymang, ñich ajt nmij'ap nmijteedy, ymi'ijxtinaayb anajty ajcxy y'uch José. Chi ajcxy José toocy, chi je' yajnicxi jim Egipto, per Dios muid anajty y'ity José, ¹⁰ etz nihuaañ yajtzoocy ma ayo'n jotmay. Chi Dios moy ixpíjcín jigix cōmay ypidzimípy ma Faraón, je Egipto jäy yrey. Chi je rey José tung moy huen ane'my je Egipto naaxjot etz ane'mípy je rey ytíj.

¹¹ Huin'it xii ymiiñ mijyuu mij'ayo'n jim Egipto etz jim Canaán ñaaxjot. Je huin'it xii ñich ajt nmij'ap nmijteedy ca' anajty ajcxy paady ti ycaypí. ¹² Co Jacob oy nejhuiy co jim Egipto yajpaady jim trigo, chi jim quejxy ymang ajcxy trigo juuybi. Je' ajcxy huídibi ñich ajt nmij'ap'ajtim nmijteedy'ajtim. Chi ajcxy y'oy tügtecy trigo juuyb. ¹³ Je mímiejtz'ocpi co ajcxy oy trigo juy, huin'it José ñayñigapxi ma y'ajch ajcxy. E chi je rey nejhuiy pinjäy je' anajty je José. ¹⁴ Chi José capxyñigujxy huen cidaaccixy jim Egipto yi' yteedy Jacob muid tüg'óciy yjuugy ymígüg. Hue' anajty ajcxy ñaybaattáayigixy nidugi'px majmocx jäy. ¹⁵ E jadu'n yajty co Jacobo oy chinaydacpicy jim Egipto. Jim oy comjey y'o'cni. Nañ jadu'n jim ajcxy y'o'cy may ñich ajt nmij'ap nmijteedy. ¹⁶ E chi Jacob yjuugy ymígüg com jey yajpidzimy Jacob ypajc ma ñaaxtigíy, e chi ajcxy yajnicxy jim Siquem, oy pidaaccixy ma je o'cpi jut huídibi Abraham anajty ti juy meeñyigíxy ma Hamor ymang jim Siquem.

¹⁷ Chi Esteban yjacmínañ:

—Ytimypadaanipy anajty tiempo nej anajty Dios ti yaj'ahuanüy Abraham. Ti anajty yi judíojäy ooy ymayüyñi jim Egipto. ¹⁸ Chi oy jadüg rey ytigüiy ane'mbi huidibi ca' ix'y'adyii José. ¹⁹ Je rey yhuin'ññ ich ajt nmij'ap nmijteedy, e oy ajcxy chaachytuun. E chi ane'my co huen y'ung ajcxy nügüeytaaygixy huidibi anajty ajcxy ma'xung'ajtp, jigix y'ó'ccixipy. ²⁰ Huin'it tiempo oy yma'xung'ajty Moisés, je huidibi ooy Dios jäygidacy. Chi Moisés ytaj yteedy tugüg po' yajyeeci ma ytijc. ²¹ Co ajcxy yajnügüeci, chi je rey ññx je' agondigüiy, e yajyeegy jadu'n nej yci'm'ung. ²² Paady Moisés xpijcy tüg'óciy jadu'n nej Egipto jäy anajty ajcxy y'ixpijcyty, e ooy ymadacy müd y'ayuc etz müd ytung.

²³ Co Moisés anajty müdity huixchigüipx jimijt, chi pidacy yhuinma'ñ co nicxy ixa'ñ je' y'amigügtijc je Israel y'ap y'oc. ²⁴ Chi Moisés ijxy co tüg egipciojäy chaachytuñyii tüg je' y'amigüg. Chi Moisés yaj'o'cy je egipciojäy, yaj'ahuimbijty nej anajty y'amigüg yajtzaachytuñ. ²⁵ Hue' Moisés tijy co je' y'amigügtijc ajcxy huen nejhüiy huinjihuüy co Dios nihua'naanip ma ymüdzip müd Moisés ycixpi. Chi ajcxy ca' huinjihuüy co Moisés nihua'naanip. ²⁶ Com jabom Moisés paty mejtz Israel jäy chachtziptungixy. Chi Moisés jayajxemaañ je tzip, chi nimay: “Miich ajcxy nay'amigüg'ajtip, ¿nej co mdziptungixy miich ajcxy miñ xyipy?” ²⁷ Je huidibi anajty ymügüg tzaachytuumb huin'it najztijüiy Moisés, nimay: “¿P'in ti xypidägy huindzin etz tiydumbi ma ich ajcxy? ²⁸ ¿Nej xyaj'ögaamich jadu'n nej axiy

myaj'o'cy yi egipciojäy?” ²⁹ Co Moisés jadu'n midoy, chi yqueegy, ñicxy jim ma Madián naaxjot. Moisés jecy y'adzinaay jim Madián naaxjot, e jim oy ypicxy. Chi ytöxyijc paty metz ymang.

³⁰ Huixchiguipx jimijt naxy, huin'it jim adügtuum ma je cop huidibi yxii Sinaí, ñayguëxíci tüg ángel jinjoty ma tüg quipymang huidibi anajty tzachtooyb. ³¹ Chi Moisés ooy jihuüy huinmaay müd je' ycixpi huidibi anajty y'ijxyp. Co oy mihuingoñ, chi midoy co je Huindzin Dios ñimäyii: ³² “Íich Dios huidibi mmij'ap mmijteedy ajcxy Abraham, Isaac etz Jacobo Dios'ajtpy.” Chi Moisés chiyuygoty, ca' anajty ocjac-huindicxpedaani. ³³ E je Huindzin Dios nimaayi: “Jen mgig, com je it ma miich mdinäy, Dios yi' y'it. ³⁴ Íich ti n'ixyich njäyich nej tzaachypi paatcixy jim Egipto. Ti nmidooyich co y'ajcxy yäxy ytinäy müd je tzaachypi ycixpi. Ti ngidägyich co ajcxy ngohuaanip. Íich miich nguexamyb jim Egipto ma yi Israel jäy ajcxy.”

³⁵ Chi Esteban yjacmínañ:

—Co Moisés oga'n ñicxy ma íich ajt nmij'ap nmijteedy ca' ajcxy cöbijcy huen y'ane'müyb, chi ajcxy ymínañ: “¿Pín ti xyñimäy co íich miich ajcxy nhuindzin'adüyb?” Co mimetz'ocpi Moisés ñicxy ma yi Israel jäy, je taabi anajty je ángel ti ymigapxyii jinye'ñ agujc, chi ajcxy cöbijcy. ³⁶ Je Moisés je' yajpidzim íich ajt nmij'ap nmijteedy jecy'ajty jim Egipto. Moisés ytuun oy mijhuinmañ etz ijxpejt huixchiguipx jimijt jim Egipto, jim ma tzaptz mejy, etz jim ma mijtigüduum. ³⁷ Je Moisés huidibi jecy'ajty nimay je Israel jäy: “Dios y'ijxtihuipy tüg jäy ma miich ajcxy m'ap m'oc

huidibi najtzcapx̄ihuipy yi' y'ayuc, jadu'n nej ti xy'ijxt̄iyich ma miich ajcxy. M'amido'ijtip ajcxy yi' y'ayuc.” ³⁸ Je Moisés jim je' anajty m̄jtiġiduum m̄id je mayj̄y. Chi jim je Dios y'ángel m̄id m̄ydacy ma je cop huidi yx̄i Sinaí, etz Moisés yajnajx Dios y'ayuc ma ìch ajt nm̄ij'ap nm̄ijteedy. Moisés ycöb̄ijc Dios y'ayuc huidibi jugy'ájt̄in huinix̄ibi m̄id, etz jayhui'my m̄id ìch ajt yc̄ixpi.

³⁹ Chi ìch ajt nm̄ij'ap nm̄ijteedy ajcxy jecy'ajtpy ca' anajty ajcxy capxcöb̄igaanḡixy Moisés, ca' anajty cöb̄ijcc̄ixy je' y'ané'm̄in, chachhuimbidaanḡixy jim Egipto. ⁴⁰ Chi ajcxy Aarón n̄imay: “Ndzojcp̄ich ajcxy co miich oydun t̄üg Dios huidibi ìch ajcxy xyhuinhuoohuip, com ca' nnejhūiyim ti jada' ti yjadyii je Moisés huidibi ajt xyajt̄zoonim Egipto ñaaxjot.” ⁴¹ Chi oyduñ ajcxy t̄üg huajmang. Chi huindziḡiy ajcxy je huajmang huidibi anajty ti yajcoj̄c̄ixy, e ooy ajcxy m̄ijotcujc'ajty huidibi c̄i'm anajty ti yajcojy. ⁴² Huin'it x̄i ajcxy Dios y'ixmajtzi, huen ajcxy ojadaty yi x̄i, yi po' etz madza'. Com jadu'n Dios y'ayuc cojaaybi cojaay co Dios jadu'n ym̄inañ:

Israel j̄y ajcxy canan ìch je' huidibi ti mhuindziḡiyḡixy jim m̄jtiġiduum huixchiguip̄x jim̄ijt.

⁴³ Ti m̄giyn̄ic̄c̄ixy Moloc yt̄ijc etz yi Renfán ymadza', tzadzech, quipychech etz oori oyduñ huidibi miich ajcxy c̄i'm myajcoj̄ huidibi anajty ajcxy m'ojadadamy. Paady ìch miich ajcxy nyajp̄idz̄imaanḡixy ma yi mnaaxjot, e nguexaanḡixy j̄iguem jim Babilonia n̄inaxy.

44 Chi Esteban yjacmīnañ:

—Jim mījtīgīduum ḡch ajt nmīj'ap nmījteedy ymīd anajty cochactījc ma anajty ajcxy Dios huīndzīgīy. Jīiby anajty ajcxy yujccīy je tzaa ma Dios ytīy'ajt ycojaayīty. Je cochactījc ajcxy ycoj jadu'n nej anajty tī yaj'ane'myīī Moīśés, e nej anajty yajni'ixīyīī nej tunīpy. ⁴⁵ Hīch ajt nmīj'ap nmījteedy mīhuī'm je cochactījc, e ḡch ajt nmīj'ap nmījteedy huīdībī mīīñ ma jada naaxjot mīd Josué, chī mīmīīñ ajcxy je cochactījc je taab ajcxy mīmadacy je ymīdzip canaag'agajp. Dios yajpīdzīm je' ajcxy ymīdzip ma je naaxjot, jīgīx yajcīdīgīhuīp ḡch ajt nmīj'ap nmījteedy. Yajtuuñ ajcxy je cochactījc, īxtī coonī David ytīgīy ane'mbī.

⁴⁶ Dios yjāygīdaac je rey David, e David yjacoja'ñ anajty tūg tījc oyduñ ma jēbī yaj'ojadaty yajhuīndzīgīy Dios, je Dios huīdī Jacob mījpidac jecy'ajty. ⁴⁷ Per Salomón je' oy cojy Dios ytījc. ⁴⁸ Oy yī Dios tzajpjtopyī ca' chīnāy ma yī tījc tībī jāy cojy. Jadu'n nej je Dios y'ayucnajtzcaxīyībī jecy'ajty jaybety co Dios jadu'n ymīnañ:

⁴⁹ Je tzajp hue' je' ḡch n'ane'mdac, jada naaxhuīñyībī ḡch ndecypocxtac. ¿Tī tījc ḡch mīīch ajcxy xycojaanīp? ¿Ma je it huīdībī it ma ḡch jēbī nbocxy?

⁵⁰ ¿Nej cay ḡch tī n'oydundāy tūg'ócīy?

⁵¹ Mīīch ajcxy ooy mjtjūuñīty, ca' mgapxymīdoy Dios. Jadu'n Esteban yjacmīnaañ:

—Jadu'n mīīch ajcxy mjt mhuīnma'ñ mīdīty jadu'n nej jāy ajcxy huīdībī ca' Dios ytīy'ajt nejhūīyī. Mīīch ajcxy jātyīm mīdzip'ajtpy je Espīritu Santo. Mdūgīyb ajcxy mīd mmīj'ap mmījteedy.

⁵² Miich ajcxy mmij'ap mmijteedy chaachytuun tüg'óciy Dios y'ayucnajtzcaxiyybi. Yi' ajcxy yaj'o'c Dios y'ayucnajtzcaxiyybi huidibi jayijp'aty najtzcaxiyy co ymina'ñ tüg jäy huidibi tudägyip. E co je tudägy jäy ymiñ, chi miich ajcxy agojix myaj'o'cy. ⁵³ Je Dios y'ángel miich ajcxy xymooy je Dios ytiy'ajt, e ca' ajcxy mgöbijcy.

Yajtzaagögätzcixy Esteban

⁵⁴ Co je mayjäy midoy jadu'n nej Esteban yminañ, chi ajcxy mijotmätcoty Esteban, chi ytigiiy ajcxy tützmucxpi tützqueetpi. ⁵⁵ E chi je Esteban jihuiy je Espíritu Santo ma yjot yhuinma'ñ, chi chajp'ijxy, e ijxy yi Dios y'oy'ájtin etz ijxy Jesús ytinäy a'oy'amy ma Dios Teedy. ⁵⁶ Chi Esteban nimay je mayjäy:

—ijxcix! N'ijxypich yi tzajp ahuädz, e n'ijxypich je jäy huidibi tzoon tzajpjoty ytinäy a'oy'amy ma Dios Teedy.

⁵⁷ E chi je mayjäy ajcxy ytätz'ac amo'cxy, chi ajcxy ytigiiy huambi jihuiyybi, e chi ajcxy nimujcy yajmujcy Esteban. ⁵⁸ Chi ajcxy yajpidzimy Esteban cajppa', je' oy cögätzcixy. Je tiy'ajt yejcpí huidibi jadu'n idütz, chi yjocxhuit ajcxy yajmihuim'y tüg yeeg'anäg huidibi anajty yxi Saulo. ⁵⁹ Jim anajty ajcxy Esteban tzachcätzcixy. Chi Esteban Dios mibijctzoy, yminañ:

—Huindzin Jesús, cöb'ijcigich n'alma.

⁶⁰ Huin'it ycoxtinay'ahuuy, e chi yaaxqueegy mic yminañ:

—Huindzin, ca' mbocy ixipy nej ajcxy xytuñich. Co jadu'n Esteban yminanday, chi oy y'ögy.

8

Saulo pahuıdijttägy ooy mibıjcpıdijc

¹ Saulo ytuun quıpxycapxy mııd huıdibi ajcxy yaj'o'c Esteban.

Huin'it xıı yaj'ıxhuıdijt yajpahıdijt pinjaty anajty Jesús mibıjcp jım Jerusalén. Tüg'óciy je jäy ajcxy huıdibi Jesús mibıjcp anajty yqueecuacxtay, ñıcy ajcxy jım Judea ñaaxjot etz Samaria ñaaxjot. Jëyi je majmetzpi apóstoles ajcxy jac-huı'mııy. ² Nijëjity yëydıj huıdibi Dios huındzigııyb oy yajnaxtıgııy Esteban. E ooy ajcxy jotmay jıhuııy, yaaxy ajcxy mııd je' ycıxpi. ³ Chi Saulo ooy ixhuıdijtcoty pahuıdijtcoty huıdijaty Jesús mibıjcp etz tıj tıj anajty yajpidzımy pahuıch pajuguty yëydıjctıj etz töxyjäydıj, e pıdaaccıxy anajty pujxtıgoty.

Jım Samaria ajcxy capxhuäcxy Dios y'ayuc

⁴ Je huıdı ajcxy queecuacxtay ycapxhuäcxyp anajty ajcxy Jesús y'ayuc huen tim ma'amy huıdijtcıxy. ⁵ Nıdügti huıdibi anajty yxıı Felipe ñıcy jım Samaria, ytıgııy y'ayuccapxhuäcxpi, yajnimay ajcxy Cristo ytıy'ajt. ⁶ E je jäy ajcxy ñayyöymujci nıdüg'óciy ajcxy y'amıdo'ıjtcıxy janch amoñyi jadu'n nej Felipe anajty ymıydägy e ijxyp anajty ajcxy je mıjhuınma'ñ huıdibi Felipe anajty ytumyb. ⁷ Com may anajty jäy jım huıdibi mııd ca'oybi ma yjot yhuınma'ñ, e tzoocp anajty ajcxy. E co je ca'oybi anajty ypidzımy ma je jäy, chi je jäy ooy yjacyaaxqueecy. Etz nañ mayjäy anajty chögy huıdibi ca' yci' ytecy yücxy etz tecyma'tpi. ⁸ E jadu'n je mayjäy ajcxy anajty jım ooy yjotcujctıy.

⁹ Jim anajty tög yëydijc huidibi anajty yxii Simón huidibi anajty ti ni'ixpigiy huijyjäy huinma'ñ, e ooy anajty may Samaria jäy huin'ñ, ymina'ñ co je' anajty ymijity yjanchity. ¹⁰ Tüg'óciy jäy anajty oy amido'ijtcixy Simón y'ayuc, pi'ctijc etz mij'anäctijc, e yminaangixy:

—Jadayaabi yëydijc ymiiid jada Dios ymic'ajt.

¹¹ Ooy anajty je jäy ajcxy Simón mijnicxpejtcixy, com miiid je mañ'ajt anajty jecy ti chachhuin'ñigixy. ¹² Co je Samaria jäy mibijcy je ayuc jadu'n nej Felipe ñimiydacy Dios y'ané'min etz Jesucristo, chi ajcxy ñiibejty yëydijctijc etz töxyjäydijc. ¹³ Etz je Simón, je huijyjäy, nañ jadu'n mibijcy e ñiibejty. Chi Simón puyöyiy Felipe, ooy jihuüy huinmaay jadu'n nej je mijhuinma'ñ huidibi anajty Felipe ytumyb etz jadu'n nej anajty Dios ymic'ajt ijxi.

¹⁴ Co ajcxy je majmetzpi apóstoles ajcxy, huidi anajty jim Jerusalén, nejhuüy co je Samaria jäy anajty ti cöbijccixy Dios y'ayuc, chi ajcxy quejxy jim je Pedro etz Juan. ¹⁵ Co Pedro etz Juan ya'ty jim Samaria, chi ajcxy Dios mibijctzoy miiid je mibijcpidijc ycixpi, jigix ajcxy ymöhuiyb je Espíritu Santo. ¹⁶ Com ca'ni anajty je' ajcxy ñicidägyii, jëyi anajty ti ñiibejtcixy ma Huindzin Jesús yxii. ¹⁷ Huin'it Pedro etz Juan cñixajy ajcxy, e chi je Espíritu Santo y'adigiiy yjottigiiy ajcxy.

¹⁸⁻¹⁹ Co Simón ijxy co je Espíritu Santo y'adigiyii yjottigiyii co yi apóstoles ajcxy ycñixajy, chi Simón yaj'ahuaniiy je' ajcxy meeñ, yminañ:

—Mooygich nañ jadu'n yi mic'ajt jigix co ngñixájibich hueñypinity nañ jadu'n jëbi ajcxy

je Espírítu Santo y'adigíyii yjottigíyii.

²⁰ Chi Pedro nimay Simón:

—Mi'ögíhuipy miich mmeen, miid co mhuinma'ñ ti mbidägy co meeñgyix mbada'ñ je huídibi Dios ñiyejcp. ²¹ Com miich ca' xypaady jadayaabi tung, com miich mjot mhuinma'ñ ca' ytudägity ma Dios. ²² Jothuimbit e ixmatz yi mjibic-huinma'ñ, e mibijctzou Dios, ca' jécyity xyhuinmeecxipy jadu'n nej jibic mjot mhuinma'ñ mmidity. ²³ Com janch ta'm miich mjot mhuinma'ñ, e yi jibicpi hue' xymidity mach.

²⁴ Chi Simón y'adzooy:

—Mibijctzou je Huindzin Dios miid iich ycixpi, jigix ca' ti xyjadipyich jadu'n nej miich ti xyñimäyich.

²⁵ Co Pedro etz Juan tıy'ajt yejcy etz capxhuäcxy Dios y'ayuc jim Samaria, chi ajcxy yhuimbijty jim Jerusalén. Chi ajcxy canaag agajp ñaxıy jim Samaria ñaaxjot, e capxhuäcxy Dios y'ayuc nej ajcxy y'alma nıdzocın paadipy.

Felipe miid je Etiopía jäy

²⁶ Huin'it xı Huindzin Dios y'áangel migapxy je Felipe, nimay:

—Tzoon ya, nicx ma madzäcruudz ypidzımy, ma je tü'aa huıdi tzomb jim Jerusalén huıdibi nicxp jim Gaza.

Je' je' je tü'aa huıdibi adügtuum najxp. ²⁷ Felipe tim janitzon e ñıcxy, e tü'am naybaatti miid tüg Etiopía jäy. Hue' je' anajty eunuco, mıjtungmiid jim Etiopía. Yi' je' tesorero'ajt anajty ma je töxyjäy huıdibi anajty yxı Candace huıdibi anajty ane'mb jim. Je eunuco jim anajty ti y'oy Jerusalén Dios

ojadajtp. ²⁸ E chi yhuimbijtni anajty ma ycajp, iñaayb anajty carretijoty yam chachnecycapxy. Hue' anajty chachcapxyp je Dios y'ayuc huidibi Isaiás ycojaay. ²⁹ Chi je Espíritu ñimay Felipe co huen nicxy najtzpadíy je carreti ma je eunuco anajty y'iñäy.

³⁰ Co Felipe mihuingoñ je carreti, chi midoy co je jäy anajty capxy je necy huidi Isaiás yjaay, chi y'amidooy:

—¿Nej mhujnhuñyib huidibi mgapxyp?

³¹ Chi je jäy y'adzooy:

—¿Nej ñch nhujnhuñhuipy pen ca' pin xyajnimäyich?

Chi je eunuco ñimay je Felipe co huen mid iñäyii carretijoty.

³² Je huidibi anajty je eunuco chachcapxyp jadu'n je' anajty ymina'ñ:

Jadu'n ajcxy nicxy yaj'ögy nej jäy borregi nicxy yaj'ögy. Je' amon'ijty jadu'n nej borregi amon'ity co jäy nime'pxy. Ni tüg'aa huam ycaminañ.

³³ Ti jäy yajtzöyduñyii, ca' ajcxy a'ixiiy co yjanayñigapxtüdaani. Ni y'ap y'oc ycaca'ty pin ocnigapxtüdüb. Co yaj'öci, chi chooni ya naaxhuiñ.

³⁴ Chi je eunuco y'amidooy Felipe:

—Tunmay'ajt yajnimaygich pin jada ayucnajtzcapyñyibi ñimiydacy, ¿ci'm ñayñimidyägyii o ji jada huingbi pin nimiydacy?

³⁵ Chi Felipe yajtzondacy je ayuc capxticxin ma jadayaabi Dios y'ayuccojaaybi ñecy. Chi yajmüdmiydaaci nej Jesús yajty y'ayoy. ³⁶ Co ajcxy ñajx ma tüg ñi, chi je eunuco yminañ:

—Cha ñi, ¿nej ca' iich jëbi huaad nniibetyi?

³⁷ Chi Felipe y'adzooy:

—Pen mmiibijcipy Jesús miid tüg'óciy yi mjet mhuinma'ñ jëbi mniibety.

Chi je jäy y'adzooy:

—Nmiiijcipyich co Jesucristo Dios yi' y'ung.

³⁸ Chi je eunuco nimay je carreti huindzin co huen yajtinayxipy je' carreti. Chi nimetz ajcxy ñicxy ma ñi, e chi Felipe yajniibejty je eunuco.

³⁹ Co ajcxy ñiibidzimy, chi je eunuco ijxtigoy je Felipe. Jadu'ñyi je Huindzin Dios y'Espíritu yajnicxi. E chi je eunuco ytü yajyöyñi jotcuyc. ⁴⁰ Felipe yajpaty jim Azoto, chi ñajxy cajp cajp capxhuäcxi Jesucristo y'ayuc ixti yja'ty jim Cesarea.

9

Saulo yjothuimbijty

¹ Ooy Saulo tzach'ixhuuidijty pahuidijty Jesús yjäy, y'ahuändacy ooy, e yaj'oga'ñ anajty ajcxy. Paady oy icy je teedy mjtungmiidpi, ² pijctzoy cötújcin, co anajty ñicxa'ñ jim Damasco ma yi judíojäy ajcxy ñaymujctac, madza'ñ pinjaty Jesús y'ayuc miibijcip. Saulo yajmiina'ñ anajty ajcxy mach jim Jerusalén huen yeydijctijcity huen töxyjäydijcity. ³ Jim anajty Saulo ñicxy mihuingoñ je Damasco cajp. Huin'it jotcömoñyi je tiicxin huidi tzomb tzajpjoty, ñigidaaci jühuidity je Saulo.

⁴ Huin'it Saulo yciday, e midoy co ñimäyii:

—Saulo, Saulo, ¿na'amy co xychach-pahuidijttägyich?

⁵ Chi Saulo yajtiy:

—¿Mbin miich, Huindzin?

Chi midoy co y'adzoyii:

—Ich je' Jesús, je huidibi miich mdzach-pahuidijtacy, ci'm nayyajtzaachytunyii jadu'n nej huajyuub co jipconebi'y huidi mid ñuumygyyii.

⁶ Chi Saulo chiyuygoty chachchigiiy, e yminañ:

—Huindzin, ¿ti mdzojcpy ndunipych?

Chi je Huindzin Jesús ñimaayi:

—Pidig etz nicx cajpjoty, e jim nyajnimähuiipy ti jëbi mduñ.

⁷ Je yëdijctijc huidibi anajty Saulo ymid ooy ajcxy ñay'adzigiyyi, co midoy je' ajcxy ayuc e ca' ajcxy ni pin ma y'ijxy. ⁸ Chi Saulo ypidigy, e co huindicxici ca' pin ma oc'ixni. Chi ajcxy majch Saulo ma yci', e chi ajcxy huijtnicxy jim Damasco. ⁹ Tugig xii Pablo jim y'ijty huiintz, ca' ycaay'uucy.

¹⁰ Jim Damasco anajty tög yëdijc chinäy huidibi Jesús y'ayuc mibijcip, huidi anajty yxii Ananías, cumäyjoty Dios ñimaayi:

—¡Ananías!

E chi je' y'adzooy:

—Cha ich, Huindzin Dios.

¹¹⁻¹² Chi je Huindzin Dios ñimaayi:

—Pidig, nicx ma je tü huidibi yxii Derecha, e jim ma Judas ytijc yajtiu tög Tarso jäy, huidi yxii Saulo. Dios mibijctzoob je' jim cham, cumäyjoty ti huin'ijxy tög yëdijc huidi yxii Ananías, co oy ñimiñyii, e ycinxajiiy jigix y'ijxigip jadüg'oc.

¹³ Chi Ananías y'adzooy:

—Huindzin Jesús, mayjäy ti xyajmidmïydägyich ajcxy jadu'n nej yi Saulo jibic y'idich jim Jerusalén mid miich mjäy ajcxy. ¹⁴ Jadachambi ti mimiñ

ya je necy, ma teedy mijtungmüdpí ti ycötujcmöyíi, co huen majztäy je jäy, e yajnicxtähuipy jím Jerusalén, tüg'óciy pinjaty ojadajtp miich mxii.

¹⁵ Chi je Huindzin Jesús nimay Ananías:

—Nícx, com ti ñich nhuin'ixy yijibi yëydíj, jigix ñich nxii etz n'ayucich capxhuäcxipy ma tüg'óciy naax cajp huídi ca' yjudíojäyity, etz ma yi reydíj, etz nañ jadu'n ma yi judíojäy ajcxy. ¹⁶ ñich yi' nyajnimähuipy tüg'óciy, nej ayo'n yajnaxipy müd ñich nxii ycixpi.

¹⁷ Chi Ananías ñicxy ma Saulo anajty ti yjättägy, co ytigíy tigoty, chi cñixajy Saulo, e chi nimay:

—Migüg Saulo, je Huindzin Jesús huídibi nayguëxíci jím tü'am ma miich anajty miiñ, yi' ti xyquexyich jigix m'ijxígy jadüg'oc, etz je Espíritu Santo xyñidígíhuip xycödígíhuip.

¹⁸ Mic'amy ycäy ma Saulo yhuin jadu'n nej acx ñimeeñ, chi y'ijxígy. Huin'it Saulo ypidígy e chi yajniibejtí. ¹⁹ Chi Saulo ycaay y'uucy, e chi ymic'píjcy jadüg'oc. Chi jím müd'íjty jecy huídibi ajcxy ixpíjci Jesús y'ayuc jím Damasco.

Saulo capxhuäcxy Dios y'ayuc jím Damasco

²⁰ Chi janch mic'amy Saulo ytigíy Dios y'ayuccapxhuäcxp ma je judíojäy ajcxy ñaymujctac jím Damasco, ymínañ co je Jesús hue' je' Dios y'ung. ²¹ Tüg'óciy pinjaty anajty midoohuip Saulo y'ayuc, ooy ajcxy jihuñy huinmaay, etz ñayñimáayigíxy:

—¿Nej ca' jada' yjéjity je huídibi tzachya-jcödígoyam yi jäy ajcxy huídibi Jesús yxii miyaax ojadajtip jím Jerusalén? ¿Nej ca' jada yjéjity huídi

anajty ti ymiiñ ya jäy ymajtzpi, e nicxy cïyega'ñ ma teedy mïjtungmïdpi?

²² Je Saulo capxhuacxip anajty Jesús y'ayuc huinmic jotmic, e nigapxtäy co Jesús hue' je' je Cristo, chi yi judíojäy ajcxy huidi anajty jim tzinaayb Damasco cijx ajcxy yhuinma'ñ tigoydäy.

Saulo yqueecy ma judíojäy ajcxy

²³ Ti anajty hueeni xi tiempo ñajtzniñicxiyñi, chi je judíojäy ajcxy ñaygapxi co yaj'ögaangixy je Saulo. ²⁴ Saulo ñejhuñy co anajty yaj'öga'ñyii. Chi jim anajty ajcxy y'ahuixyii xim tzuum ma je poch aguu cajppäbi, jim anajty yaj'öga'ñyii. ²⁵ E je jäy ajcxy huidibi anajty ymïpïdacy Jesús, chi je' ajcxy codïyñajxy je Saulo mïjcatchoty ma je pochycop huidi je cajp mïd jübojtz'ahuidïtyity, e jadu'n je' choocy.

Saulo yajpaady jim Jerusalén

²⁶ Co Saulo yja'ty jim Jerusalén, oy japuyöyihuaañ je mïbijcpïdijc ajcxy. Nidüg'óciy anajty ajcxy ooy tziñygyixy anajty com ca' anajty mïbijccixy co je Saulo ti anajty yjothuimbity. ²⁷ Chi Bernabé yajnicxy Saulo ma je nimajmetzp apóstoles ajcxy yajpaady, e chi yajmïdmïydactay nej Saulo anajty ti ixy je Huindzin Jesús tü'am, e nej anajty Saulo Jesús y'ayuc ti capxhuäcxi huinmic jotmic jim Damasco. ²⁸ Huin'it Saulo yhui'my jim Jerusalén, e mïd huidity anajty ajcxy. ²⁹ Aamic jotmic capxhuäcxy je Huindzin Jesús y'ayuc, etz mïd miydaaccixy e ñaymicmigápxigixy mïd je judíojäy huidibi griego ayuc caxp. E je' ajcxy niñuinmayñyb co yaj'ögaangixy. ³⁰ Co je

mibijcpidijc nejhuiy, chi ajcxy yajnicxy je Saulo jim Cesarea, e chi ajcxy quejxnajxy huen nicxy jim Tarso.

³¹ Huin'it tiempo je' ajcxy huidijaty mijpidacp Jesús, jotcujc anajty chinaaygixy, e nigí anajty ixpijc'idich Dios y'ayuc ytiy'ajt, jadu'n nej yi huidibi ajcxy tzinaayb ma yi Judea ñaaxjot, Galilea ñaaxjot, etz Samaria ñaaxjot. Chi ajcxy ooy yajmij'ajtcixy je Huindzin Jesús, e muid je Espiritu Santo ypubéjtin, nigí anajty yjacmayiygixy.

Pedro yajzoocy Eneas

³² Co anajty Pedro yhuidijty cogapxiy cajp cajp je mibijcpidijc ajcxy, y'oy nañ jadu'n ma je mibijcpidijc ajcxy huidibi tzinaayb jim Lida. ³³ Jim minaybaatti tüg yëydijc huidibi anajty yxi Eneas, huidibi anajty ti ypa'm'ijtni tuctujc jimijt, hue' je' anajty ycixuxy ytecyxuxy. ³⁴ Chi Pedro nimay:

—Eneas, Jesucristo xyajzoocp, pidig, etz yajpidig yi mmaabejt.

Chi Eneas mic'amy ypidigy. ³⁵ Chi ijxy tüg'óciy jäy huidibi tzinaayb jim Lida etz Sarón. Chi ajcxy yjothuimbijttay nidüg'óciy, ixmajztay tüg'óciy yi ñi'ap huinma'ñ e jijptigyiy yi Huindzin Jesús y'ixpijcin.

Co Dorcas y'o'cy, chi yjugypijcy jadüg'oc

³⁶ Je huin'it tiempo jim Jope, jim anajty tüg töxyjäy chinäy huidibi mibijcp Jesús, hue' anajty yxi Tabita, je' huidi griegojäy ytijyp Dorcas. E je Dorcas oy xi tiempo anajty yajnaxy mi'oyjäy'aty yi jäy ajcxy. ³⁷ Jadu'n yjajti huin'it tiempo Dorcas ypa'mbejty, e chi ytimy'o'cy.

Co ajcxy yajtziiday, chi ajcxy je öcpi yajnicxy ma je tijc mimejtzñihuijtzpetypi. ³⁸ Je Jope cajp naymihuingon'ajtíp anajty mïid Lida cajp ma anajty Pedro yajpaady, co mibijcpidijc ajcxy anajty nejhuiy co je' anajty yjímity, chi ajcxy mejtz yëydijc quejxy co huen nimäyii:

—Min tzojc ya Jope.

³⁹ Huin'it Pedro ñicxy mïid je' ajcxy. Co jim yja'ty, chi ajcxy yajnicxy ma je tijc mimejtzñihuijtzpetypi, e jim anajty ajcxy je co'ögy töxyjäydijc ajcxy ytínayjühuidityi ma je öcpi, chachyaaxcixy. Chi ajcxy Pedro yaj'ijxy je huit nïjen huídibi Dorcas anajty ti yaj'oyïy co anajty yjugy'atyñi. ⁴⁰ Mïc'amy je Pedro quejxpídzimday je jäy ajcxy. Chi ycoxtínay'ahuïy, e Dios mibijctzoy. Chi huindicxpejty je öcpi, nimay:

—Tabita, pídig.

Huin'it Tabita yhuindicxïgy, e ijxy je Pedro, chi iñaygugïy. ⁴¹ Chi Pedro majtzi yci', e chi huijtzïgy. Chi yaaxi ymigügtijc etz co'ögytöxyjäydijc ajcxy, chi ajcxy yajcïdigïy juugy. ⁴² Tüg'ócïy jäy ajcxy jim Jope nejhuiyday co Pedro yajjugypijcy je Dorcas. E mayjäy mibijcy je Huindzin Jesús. ⁴³ Jadu'n yjajty co Pedro y'ijty jim Jope canaag xii ma je coodzpi ytijc huídi anajty yxii Simón.

10

Pedro etz Cornelio

¹ Jim Cesarea anajty tüg tungmïidpi huídi anajty yxii Cornelio, hue' je' anajty capitán'ajtp ma tüg batallón soldado ajcxy yxiiip, la Italiana. ² Je Cornelio ooy anajty ytudägyity, etz je' mïid tüg'ócïy

y'ung ytöxyijc ooy anajty yajmij'ajtcixy Dios. Je Cornelio nañ jadu'n ypubety mïd meeñ je judíojäy ayoobtijc, e je' Dios ojadajt anajty jabom jabom. ³ Tüg xï, minacyxï anajty, Cornelio huin'ijxy janch huädz Dios tüg y'áγγελ ñigidaaci, e ñimaayi:

—¡Cornelio!

⁴ Chi Cornelio huindicxpejty je áγγελ janch tzigïyb anajty, e chi yajtïiy:

—¿Ti Huindzin?

Huin'it je áγγελ y'adzooy:

—Jadu'n nej mDios'ojadaty etz jadu'n nej mbubety ayoobtijc ti Dios jäygidägy. ⁵ Quex mjäy jim Jope, huen nicxy yajtzoñ Simón, huidibi nañ jadu'n yajtijp Pedro. ⁶ Jim je' yja'ttacy ma jadügpï Simón, je cootzpï huidi ytijc mïhuingon mejypa'. Je Pedro xyajnimáhuipy ti mdunipy.

⁷ Co je áγγελ ñicxni huidi anajty ti ymigapxyii, chi Cornelio yaaxi mejtz ytumbi, etz tüg soldado huidi Dios capxymidoob, etz huidibi je Cornelio ooy ymijnicxpedyii. ⁸ Chi yajmïdmïydactay nej je áγγελ ñimaayi, chi ajcxy quejxy jim Jope.

⁹ Com jabom jim anajty je quejxyöybi ajcxy ñicxy mïhuingon Jope, cujc yxï anajty, e chi Pedro ypejty ma tijcnïcx Dios ojadajtp. ¹⁰⁻¹¹ Ooy Pedro anajty yuubögyii, e ooy jacaya'ñ, jimni anajty yjïcxy yaj'oyïyii. Chi Pedro huin'ixy je tzejp ahuädz, e huin'it ijxy quidägy jadu'n nej poob huit mijpï yxóchtïy majaty ytaatz. ¹² Jiiby ma je poob huit, jiiby anajty canaagnax iyujc huidijaty mïdaax yci' ytecy etz tza'ñ etz joon. ¹³ Huin'it Pedro mïdoy co anajty ñimäyïi:

—Pedro, pidïg nicxy yaj'ög yi iyujc etz tzüdz.

14 Chi Pedro y'adzooy:

—Ca', Huindzin, caminaabi ñich ti njicxy huídibi jibícip etz huídibi ca' ñigödúcyity nicxy judíoJay jicxcixy.

15 Huin'it jadüg'oc ayuc midoy ñimäyii:

—Huídibi Dios yajhuäch ca' huaad mdiyy co yí yjibicity.

16 Tugüg'oc jadu'n yjajti, chi je poob huit ypättigiyñi tzajpjoty. 17 Jim anajty Pedro

tzachhuinmay nej anajty yhuimbizimy je tibi icy co yja'ty ma tijc aguu je Cornelio yquexyöybi huídi ajcxy anajty nidihuip yajtihuip je Simón ytijc.

18 Chi ajcxy mic ycogapxiy yajtiy pen jim anajty yjättägy Simón huídibi anajty nañ jadu'n yajtiyp Pedro. 19 E je Pedro je' anajty chachhuinmaayb tibi icy, chi je Espíritu Santo Pedro ñimaayi:

—Tugüg yëydijc ji xy'ixtäy. 20 Pidüg e minac, nicx mïd je' ajcxy, e ca' ti mhuinmay, com ñich jadu'n ti nnimäy co huen xy'ixtäy.

21 Huin'it Pedro yminajcy ma je' ajcxy, je Cornelio quexyöybi, nimay ajcxy:

—Iich je' huídibi miich ajcxy m'ixtaayb, ¿ti ycixpi co ti mmiingixy?

22 Chi ajcxy y'adzooy:

—Yí ñich ajcxy ti xyquexyich yí Cornelio huídibi capitán'ajtpi, je' tudägy Jay huídibi Dios yajmij'ajtp, je huídibi tüg'óciy judíoJay ooy tzójccixy, etz cömaaygixy. Huindzin Dios tüg y'ángel ñimay Cornelio co miich miiñ nyajhuoy, jigix mnicxip ma yí ytijc, e y'amido'ida'ñ ajcxy nej miich myaj'ixpiga'ñ.

²³ Chi Pedro yajtijctigüy je' ajcxy. Chi ajcxy jim ymaahui'my. Com jabom Pedro ñicxy müd je' ajcxy, e chi nijëjity ypanicxi huidibi mijpidacp Jesús huidi anajty ajcxy tzinaayb jim Jope.

²⁴ Com jabom ajcxy yja'ty jim Cesarea ma Cornelio anajty y'ahuixy tügmucy müd yjugymigüg, etz nijëjity pin ooy müd ñaymigüg'adyii, huidijaty anajty ajcxy jayijp ti nimäy. ²⁵ Co Pedro oyjäty ma je tijc, chi Cornelio ytijcpidzimy oy yijpcobadiy je Pedro, e chi ycoxtinay'ahuixy yajmij'adañ anajty je Pedro. ²⁶ Chi Pedro huijztinayigy je Cornelio, e nimay:

—Tinayig, ca' xyajmij'idañich, nañ jadu'n ich njäyity nej miich.

²⁷ Müd anajty ycapxy ymiydägy co ytijctigy, jiiiby anajty mayjäy ni'amugi'ahuijxcixy. ²⁸ Chi Pedro nimay ajcxy:

—Miich ajcxy mnejhuixy co yi judíojäy ycostumbre capx'aducy ca' huaad judíojäy yöymucy müd huidibi ca' yjudíojäyity, ca' huaad ytigüygixy ma ajcxy ytijc. Per Dios ti xyajni'ixiyich co ca' huaad nmınañich ca' oyjäyity huádzjäyity pinjaty. ²⁹ Paady co oy ti xyajhuoyijich ti nmiñich, ni ca' huam ti nmınañich. Nnejhuixhuaamyich na'amy co oy ti xyajhuoyijich.

³⁰ Chi Cornelio y'adzooy:

—Cham ymimidaaxxiñy, jadu'n nej jadachambi hora, ya ich anajty ma ndijcich, jaygay jay'ügy nDios'ojadatyich. Com hue' anajty mijminacy xi mina judíojäy ajcxy ycapxtaaccixy, co tüg ñayguëxici jadu'n nej jäy müd ypoob huit janch adicxp. ³¹ E je ángel xyñimaayich: “Cornelio,

Dios ti xymidoohui m'oración e ti jadu'n jäygidägy jadu'n nej mbubety yi ayoobtjic ajcxy. ³² Quex mdumbi jim Jope, huen nicxy yajtzoñ Simón huidi nañ jadu'n yajtjip Pedro. Jim Pedro yja'ttägy ma je cotzpi ytjic huidibi yxñ Simón, huidibi tzinaayb mihuingon mejypa'. Co je' ymiinipy, chi xymidmiydägiy.” ³³ Paady nguejxyich janch mic'amy huen nicxy xy'ijxtäy. E ti may'ajt mduñ co ti mmiiñ. Jadachambi cha ñich ajcxy nidüg'óciy ma Dios yhuinduu. E n'amido'idáangixyich tüg'óciy je y'ayuc huidibi je Huindzin Dios ti xyaj'ane'my jébi xyajnimaaigyxy.

Pedro Dios ytiy'ajt nigapxy nimiydacy ma Cornelio ytjic

³⁴ Huin'it Pedro ytigiyy y'ayuccapxhuäcxpi, nimay ajcxy:

—Jadachambi huinjihuñybich, co yi Dios ca' ni tüg'ixy'ixy jäy, y'actzojctaayb hueñypinity. ³⁵ Dios ycöbicipy hueñypinjäyity huidibi tzinaayb huen huidibi naax huen huidibi cajpity, pen chigñyb ajcxy Dios, pen tumyb oybi. ³⁶ Dios ti quexy yi' ytiy'ajt ma yi Israel jäy ajcxy, yajnimay co ji cham jotcujc'ájtñ mñd Jesucristo ñich ajt nHuindzin. ³⁷ Miich ajcxy mnejhuñyb yajxon nej ti ytunyii ti yjadyii ma judíojäy ajcxy ñaax ycajp chondacy jim Galilea, Juan el Bautista ti anajty capxhuäcxñ Dios y'ayuc ytiy'ajt etz yjäyyajñibety. ³⁸ E mnejhuñyb miich ajcxy co Dios yejc je Jesús je Nazaretpi je Espíritu Santo, e nej Jesús yhuidijty e tuuñ oy'ájtñ, etz mñjhuinma'ñ, jadu'n nej yajtzocy je jäy ajcxy huidi anajty ane'm'ijtp ma yi mujcu'. Com Dios anajty mñd y'ity je Jesús. ³⁹ ñich ajcxy je tiy'ajt

nm̄idich t̄üg'óciy jadu'n nej Jesús yjajty y'ayoy jim Judea naaxjot etz jim Jerusalén. Huin'it ajcxy Jesús yaj'o'cy cruudzcíxy. ⁴⁰ E Dios yajjugypijcy coduḡiḡ xii, e chi yajnayguëx̄ici ma ìch ajcxy. ⁴¹ Ca' ti yajnayguëx̄igyii ma t̄üg'óciy jāy, jēyi ma ìch ajcxy huidi jayijp Dios yhuin'ijx jigix̄ t̄iy'ajt nyegipyich. Ìch ajcxy caaymujc uucmujc huin'it co yjugypijcy ma y'o'cy. ⁴² Ti xyquexy ìch ajcxy ayuc ngapx-huäcxpi ma mayjāy ajcxy etz nid̄iy'ajt'adipyich ajcxy co Dios Jesús ti pidāgy mij'ane'mbi ma yi juugyp̄i etz ma yi ögypi. ⁴³ Nañ jadu'n jecy'ajty t̄üg'óciy Dios y'ayucnajtzcax̄iibi ñim̄iydac ajcxy Jesús, e yminañ ajcxy co t̄üg'óciy je jāy ajcxy pinjaty mibijc je Cristo, Dios huinmecx̄ib ajcxy ypocy.

Je Esp̄iritu Santo ycidacy ma je ca'p̄i ajcxy yjudíojäyity

⁴⁴ Yam anajty Pedro ycapxyñi co je Esp̄iritu Santo ñidiḡiyyi ycödigiyyi ajcxy nid̄üg'óciy huidijaty y'amido'ijt Pedro y'ayuc. ⁴⁵ E je judío mibijcp̄idijc ajcxy tiibi anajty miiñ m̄id Pedro, ooy ajcxy jihuiy huinmay co Dios quejx̄ Esp̄iritu Santo ma je jāy ajcxy huidibi ca' yjudíojäyity, ⁴⁶ co midoy ycapxcixy m̄id huingbi ayuc, etz cōmaygixy jāymejtzcixy Dios. ⁴⁷ Chi Pedro yminañ:

—¿Nej ca' jada' y'óyity co ñiibedipy ajcxy huidibi Dios ti ymóoyigixy je yEsp̄iritu Santo jadu'n nej ìch ajt xymooyim?

⁴⁸ Chi Pedro ni'ane'mdiyy huen niibejtcixy ma Huindzin Jesucristo yx̄i. Huin'it ajcxy Pedro cohuan̄iy huen huì'my t̄üg x̄i mejtz x̄i m̄id je' ajcxy.

11

Pedro yajm̄dm̄ydacy j̄m Jerusalén nej anajty ti ytuñyii ti yjadyii

¹ Je apóstoles ajcxy etz je m̄ib̄jcp̄id̄j̄c ajcxy hūidi anajty ajcxy j̄m Judea, m̄idoy ajcxy ayuc co nij̄j̄ity j̄y hūidi ca' yjud̄íōj̄ȳity ti anajty ajcxy cōb̄j̄ciy Dios y'ayuc. ² E co Pedro yhuimb̄ijty Jerusalén, chi nij̄j̄ity jud̄íōj̄y ajcxy ōy Pedro, je' ajcxy hūidibi tzachm̄ijp̄idaacc̄xp jud̄íōj̄y ycostumbre jadu'n nej ajcxy tiy'ajtt̄īyḡixy ymang. ³ Je' ajcxy n̄imay Pedro:

—¿Na'amy co oy ti m̄go'ix̄īy j̄y ajcxy hūidi ca' yjud̄íōj̄ȳity, etz ti m̄gay m'ǖgy m̄id je' ajcxy?

⁴ Chi Pedro n̄im̄ydactay t̄üg'ó̄ciy jadu'n nej anajty ti yjaty, chi ym̄inañ:

⁵ —J̄im̄ ñ̄ch anajty Jope nDios'ojadatȳich. Chi nhuin'ijxȳich jadu'n nej t̄üḡ m̄ij poob huit chooñ tzajpjoty, cid̄ägy ma ñ̄ch nhuinduu, xóch̄ity anajty ma m̄idaax ytaatz. ⁶ Co n̄nim̄ijhuägȳich n'ixa'ñ̄ich ti jiiby, chi n'ijxȳich may iyujc, jiiby iyujc m̄idaaxp̄i yci' ytecy, jiiby ahua'n̄bi iyujc, jiiby tza'ñ̄, etz joon. ⁷ Chi n̄m̄idooȳich t̄üḡ ayuc hūidibi xyñ̄imaayb̄ich: “Pedro, p̄id̄iḡ, yaj'öḡ ȳi iyujc etz tzüd̄z.” ⁸ Chi n'adzooȳich: “Ca' Huindz̄in, com cam̄inaabi ndz̄uch̄ich iyujc hūidibi ca' ñ̄igo'adúcȳity jud̄íōj̄y ajcxy tzüd̄zipy.” ⁹ Chi m̄imetz'ocp̄i t̄üḡ ayuc tzajpc̄ixy xyñ̄im̄äȳich: “Hūidi Dios ti yajhuäch, ca' huaad mdijy co ca' y'oychú'tzn̄ity.” ¹⁰ Tuḡiḡ'oc jadu'n yjajt̄i, chi je poob huit yp̄ätt̄iḡiyñ̄i tzajpjoty. ¹¹ Huin'it xyñ̄im̄iñ̄ich je quexyöybi niduḡiḡ, chooñ ajcxy j̄m̄ Cesarea. ¹² Chi je Esp̄iritu xyñ̄imaaȳich, co min n'ocn̄icx̄ich m̄id je' ajcxy,

ca' ma ni ti nhuinmayipyich. Mïd nicxyich nidugig nmigügtijcich. Chi ñich ajcxy ndigüy ma je jäy ytijc. ¹³ Je codijc xyajmïdmiydaacich co je' anajty ti huin'ixy tüg ángel ma ytijc, ñimäyii: “Quex mdumbi ajcxy jim Jope huen nicxy yajtzoongixy Simón huïdibi jäy ytijpy Pedro, ¹⁴ e je' xyajnimähuip nej jëbi Dios m'alma xyajnidzoocip, miich etz tüg'ócüy mjïn mdijc mjuugy-migüg.” ¹⁵ Co Jesús y'ayuc ngapxhuäcxtzondaacich, chi je Espïritu Santo ñidigüy ycodigüy je' ajcxy. Tim jadu'n nej xyñidigüyim xycodigüyim je jayijp'atypi. ¹⁶ Huin'it njäymejtzcoodyich nej je Huindzin Jesús yminañ: “Janch Juan, je Bautista, jäy yajniibejt mïd ñi, e Dios jäy ajcxy y'adigihuiyb yjottigihuiyb je Espïritu Santo.” ¹⁷ Pen Dios ti ymöyii je jäy ajcxy huïdibi ca' yjudíojäyity tú'ciy mïd huïdibi ñich ajt ti xymooyim co nmibijcim Jesucristo. ¿Ocjectim pin ñich co Dios nmïdzip'adiybich?

¹⁸ Je mibijcpidijc ajcxy jim Jerusalén, co ajcxy midoy Pedro y'ayuc, chi ajcxy y'amonday. Chi ajcxy Dios jäymejch cömay, chi ajcxy yminaangixy: “Dios jadu'n ti ymina'ñ co je' ajcxy huïdibi ca' yjudíojäyity jëbi yjothuimbijtcixy, jigix Dios ymöhuïyb jugy'ájtïn huinixibi.”

Antioquía jäy ymidoo ajcxy Dios y'ayuc

¹⁹ Taabi jäy yaj'o'cy Esteban, chi jäy ajcxy ooy ixhuïdijtcoty pahuïdijtcoty Jesús yjäy jim Jerusalén. Chi nijëjity ajcxy yqueecy, nicxy ajcxy jim Fenicia ñaaxjot, etz jim Chipre, etz jim Antioquía. E capxhuäcxy ajcxy je oybi ayuc ma jadyii judíojäy, ca' ajcxy jac ni pin yajnimay. ²⁰ E nijëjity

mibijcpidijc huídibi jim anajty ajcxy yconaaxip ycojájpip Chipre etz Cirene, chi ajcxy ñicxy jim Antioquía. Chi yajmídmíydacy ajcxy je Huindzin Jesús y'ayuc míd griegojáy ajcxy. ²¹ E je Huindzin Dios ooy ypubejti je' ajcxy, e ooy mayjáy ixmajch je jibic-huinma'ñ etz mijpídaaccíxy yí Huindzin Jesús ytiy'ajt.

²² Co je mibijcpidijc ajcxy jim Jerusalén midoogíxyjada ayuc, chi ajcxy quejxy Bernabé jim Antioquía. ²³ Co Bernabé jim yja'ty, chi ijxy jadu'n nej Dios anajty oy'ájtín ti tuñ, chi oy yjotcugíy je Bernabé. Chi capxhuijy tüg'ócíy co huen ajcxy janch cíxyjot huinijot cuyduuni yí Huindzin Jesús y'ayuc ytiy'ajt. ²⁴ Com Bernabé oyjáy je' anajty, e ooy mijpídägy Dios y'ayuc etz ooy mídity je Espíritu Santo jotjoty huinma'ñjoty. Ymíd je' ycapxhuíjn ooy mayjáy mijpídacy Jesús y'ayuc ytiy'ajt.

²⁵ Co jadu'n yjajti, chi Bernabé oy ixtay Saulo jim Tarso, e co paty, chi mídmiñ Antioquía. ²⁶ Jadu'n yjajty jim ajcxy y'ijty tüg jimíjt, yaj'ixpijccíxy je mayjáy huídibi ajcxy jijptigíyíy je Jesús y'ixpijcin. Jim Antioquía oga'n yximoy cristiano, je jáy ajcxy huídibi mijpídacp Jesús.

²⁷ Huin'it tiempo nijéjty tiy'ajtnajtzcapxíybi chooñ Jerusalén ñicxy ajcxy jim Antioquía. ²⁸ Tüg huídi anajty yxí Agabo ytinay'ahuíy mayjáyjoty, e chi je Espíritu Santo yajcapxi, e ymínañ co mijyuu anajty ñaxcidäga'ñ huindu'ñybi naaxhuiñ. E janch jadu'n yjajti taab anajty Claudio y'ane'my. ²⁹ Huin'it je mibijcpidijc ajcxy jim Antioquía pídacp ajcxy yhuinma'ñ co quexaangíxy pubéjtín ma

ymigügtijc ajcxy huidi tzinaayb jim Judea, jadu'n nej pubéjtin pin tim yega'ñ. ³⁰ E jadu'n ajcxy tuuñ. E je meeñ tibi anajty ymucy yajmiguejxy ajcxy je Bernabé etz Saulo ma je mibijcpidijc tungmüdpí jim Judea.

12

Co Jacobo y'o'cy etz co Pedro yajpujxtijctigiyi

¹ Huin'it tiempo je rey Herodes yajmajtzi nijējity Jesús yjāy, e chi yajtzaachytuuni. ² Chi ni'ane'mdiy huen yaj'ogyii müd espada je Jacobo, je Juan y'uch. ³ Co je rey nejhuüy co je judío jāy ajcxy jadu'n ooy jāy gidaaccixy, chi ymajtzi Pedro nañ jadu'n. Hue' jadu'n yjajti xijoty, je xi mina tzajcaagy caaygixy huidi ca'pi ylevadura müdity. ⁴ Co Pedro yajmajch, chi yajpidacy pujxtigoty. E chi je rey ane'my co huen midaaxpicy soldado ajcxy cuend'adyi, tügpicyjaty midaax soldado ajcxy. Hue' anajty je rey ti huinmay xinxaxy anajty tıyduna'ñ Pedro mayjāy agujc. ⁵ Pedro jiiby anajty pujxtigoty janch oy cuend'aty. E je mibijcpidijc janch Dios mibijctzodib anajty ajcxy müd Pedro ycıxpi.

Dios y'ángel yajpidzimy Pedro pujxtigoty

⁶ Huin'it coodz ma ca'ni anajty yximiy, ma je Herodes anajty tıyduna'ñ Pedro mayjāyoty com jabom, Pedro maab anajty, e soldado agujc ajcxy cıxoch tecyoch anajty müd cadena, e jadügpicy soldado ajcxy pujxtijc'aguy anajty ajcxy ycuend'aty. ⁷ Chi janch timetiini yHuindzin Dios tüg y'ángel ñayguēxici ytināy ma Pedro yhuinduu, e je pujxtijc yaj'anıyday. E chi je ángel tijyücxı Pedro ma ycaach, chi yajmäyhuijy, e nimay:

—Pidǵ mic'amy.

Chi je cadena ycāday ma Pedro yci'. ⁸ Chi je ángel nımay Pedro:

—Ñayhuıni, yajtigi' mgǵ.

Co Pedro yajtigiyday ycǵ, chi je ángel ñımaayi:

—Yajtigi' mjocxhuit, e pajamgıch.

⁹ Chi Pedro pujxtıjc pidzımy axam ma je ángel, ni ca' nejhuıy pen janch anajty huıdibi je ángel tumyb, hue' jıhuıy jadu'n nej ycumäy. ¹⁰ Chi ñajxy ajcxy ma tügpıcy cuend'ajtpı, mic'amy ajcxy mımetzpi nıajxy. Co ajcxy yjaty ma mıjpujxtıjc aguu, ma mıjtüba', chi je' ci'm'ahuaach. Chi ajcxy ypidzımy. Ti anajty mıjyöygıxni co je ángel ixma-tzni Pedro. ¹¹ Huın'ıt Pedro yhuınma'ñımejch, chi ymınañ:

—Jadachambi nıhuıybıch co janch jada' co je Huındzin Dios ti quexy y'ángel, e yı' ti xyñıhua'ñıch ma Herodes, etz jadu'n nej tüg'ócıy judıójäy ajcxy anajty xytuna'ñıch.

¹² Co Pedro yjot yhuınma'ñ ymejch, chi ñıcxıy ma María ytıjc, je Juan ytaj, je Juan huıdi jäy ytıjpy Marcos, ma anajty ajcxy jım mayjäy tügmucy y'ıjtcıxy Dios mıbıjctzoogıxy. ¹³ Co Pedro tıjc'aguu cojxnojcy, je tıba'y'amybı, chi tüg töxy'anäg ypidzımy huıdi anajty yxı Rode, ıxa'ñ pın je' tıjc'aguu cojxnojcy. ¹⁴ Co oy yögmıdoy co Pedro je' anajty, chi ca' ytıjc'aguu yaj'ahuaach. Jeyı co poyıgy ñıcxıy tıgoty co anajty tzachjotcújıcy, nıgapxy co Pedro je' anajty ma tıjc'aguu.

¹⁵ Chi je jäy ajcxy nımay Roda:

—Mloocjıyb jada' mııch.

Chi je töxy'anäg y'adzooy co janch je' anajty. E je jäy ajcxy ym'inaangixy co ca' yi' yjējity, hue' jada' Pedro y'ángel.

¹⁶ Yam Pedro anajty tijc'aguu tzachcojxnocy co ajcxy yaj'ahuaach, chi ajcxy ijxy, chi ajcxy ooy chigiiy yjihuiy. ¹⁷ Pedro címüd ytiy'ajtyejcy co huen amoñ ajcxy. Chi yajmüdmüydacy nej je Huindzin Dios anajty ti yajpüdzimyii pujxtigoty. E nimay ajcxy co huen nicxy yajmüdmüydägy jada je Jacobo etz jacjadyii mibijcpüdjic.

Chi Pedro ñicxy huingbi cajp.

¹⁸ Co yximiiy, huin'it soldadtijc ajcxy ooy ytigiiy huambi jihuiybi huinmay'ahuüdjity, com ca' ne-jhuüygixy nej je' anajty ti ytunyü ti yjadyii müd Pedro ycixpi. ¹⁹ Chi Herodes ni'ane'mdüy huen nicxy yaj'ixtäy Pedro. E co ca' yajpaty, chi pijctzoy tiy'ajt ma soldado ajcxy huüdi anajty Pedro ti ycuend'adyii. Chi ni'ane'mdüy huen ajcxy nicxy yaj'ögyii. Chi Herodes chooñ jim Judea, chi oy chinaydacpicy jim Cesarea.

Herodes y'ögy

²⁰ Herodes janch ymijotmätpy anajty je jäy huüdibi tzinaayb jim Tiro etz Sidón. Chi je Tiro etz Sidón jäy ajcxy ñaygapxi nej jëbi huin-gohuägihuaangixy je rey. E ymimadac ajcxy co migapxy je Blasto je mïjtungmüdpü maabi rey Herodes ytijc. E chi ajcxy pijctzoy co huen tzip cixy naxy, com co ajcxy xijc mooc jim anajty yajt-zoongixy ma rey ñaaxjot. ²¹ Chi Herodes agapxtujcy tüg xii, chi je reyhuit yajtigiiy, chi iñaydac paty ma ycötujctac, chi migapxy ajcxy je jäy. ²² Chi je

mayjäy ajcxy ytiḡiḡy miç capxp miydaacp, chi ajcxy ymĩnaangiḡy:

—¡Jada jäy huĩdibi capxp, ca' jada yjäyity, jadu'n yi' nej tüḡ dios!

²³ E huin'ĩtiy Huindzĩn Dios y'ángel yajpa'mbejty Herodes, com ca' anajty huindziḡiḡy cõmay je Dios. Chi y'o'cy, tĩng je' tzütztaayi.

²⁴ Je Huindzĩn Dios y'ayuc miḡijc'idĩchpy anajty jäy, e yajcapxhuäcxp anajty hueñytĩmma'amyity.

²⁵ Co Bernabé etz Saulo ajcxy ytungmay jĩm Jerusalén, huin'it chooni ajcxy jĩm ymĩdnĩcxy huĩdibi anajty yxĩ Marcos.

13

Bernabé etz Saulo yajtzondaaccixy ytung huĩdibi ajcxy pátip

¹ Ma je' ajcxy huĩdi miḡpidacp Jesús jĩm Antioquía, jĩm anajty jadyii huĩdi Dios y'ayuc yaj'ixpiḡcp anajty, etz nañ huĩdibi tiy'ajt najtzcapxiyb. Jĩm anajty Bernabé etz Simón, huĩdi anajty ajcxy ytijpy el Negro, etz Lucio huĩdi tzoon Cirene ñaaxjot, etz Manaén huĩdi tüḡ yeectac miḡd Herodes, huĩdibi ane'm jĩm Galilea, etz Saulo.

² Tüḡ xĩ ajcxy ñayyõymújciḡiḡy jaygay jay'üḡy Dios ojadajtcixy. E chi je Espĩritu Santo ñĩmaayi:

—Huen piḡdáaciḡich ajcxy Bernabé etz Saulo ahuing jĩḡix ajcxy ytunĩpy ma je tung tĩibi nyajni-huohuĩyich.

³ Chi ajcxy yjacDios'ojadajty etz yjac'ayuu'ajty, e chi je jäy ajcxy cĩnĩxajy Bernabé etz Saulo, e chi ycapxycijxy miḡd je' ajcxy.

Je apóstoles ajcxy capxhuäcxixy Dios y'ayuc jim Chipre

⁴ Chi jada' je Espíritu Santo yquejxi Bernabé etz Saulo huen nicxy Seleucia, e jim ajcxy ybarcotigiiy nicxy ajcxy jim Chipre mejy agujcpi. ⁵ Co jim ajcxy yja'ty ma barco yjättac huidi yxii Salamina, chi ytigiiy Jesús y'ayuccapxhuäcxp ma je judíojäy ajcxy naymujctac. Tzooñ je Juan anajty nañ jadu'n je' anajty Bernabé etz Saulo pubéjtíp. ⁶ Huidijttay ajcxy ma je naax mejy'agujcpi, e yja'ty ajcxy ma je cajp huidi yxii Pafos. Jim ajcxy paty tüg judíojäy huidi anajty yxii Barjesús, hue' je' anajty huijyjäy, e ñaydiyii anajty co Dios ytiy'ajt najtz-capxiiyi, e ca' anajty yjanchity. ⁷ Je huijyjäy ooy miid ñaymigüg'adyii anajty je huidibi ane'm jim, hue' anajty yxii Sergio Paulo. Je Sergio Paulo ooy anajty ycohuinma'ñity, ooy y'ixpícyity. Chi ni'ane'mdiy co huen nicxy yajtzonyii Bernabé etz Saulo. Com je Sergio Paulo anajty midoohuaani je Dios y'ayuc. ⁸ Je huijyjäy, huidi nañ jadu'n yajtijp Elimas, midziptzoñ Pablo etz Bernabé, e tücci'y capx'adugañ ca'ydí je gobernador ymibicy. ⁹⁻¹⁰ Chi Saulo, huidibi nañ jadu'n yajtijpy Pablo, miid je Espíritu Santo huindicxpejty je huijy jäy, e nimay:

—¡Ooy mjibicjäyity miich, ooy m'anijity, mujcu' miich xy'ung'ajtp, ooy mmidzip'aty pinjaty oyjot oyhuinma'ñ miid! ¿Mina m'ixmadzañ nej mdzachyajtigoyañ je Huindzin Dios ytiy'ajt? ¹¹ Jadachambi je Huindzin Jesús xychachtunaamb, e mhuí'mip huiintz, etz ni ca' je xiiambi tzojc m'ixipy.

Chi je huijyjäy mic'amy yhuim'y huiintz coodz, chi ixtay pin oc-huijtznicxib com ca' anajty y'oc'ijxni. ¹² Co je gobernador jadu'n ijxy, chi mijpidacy Jesús y'ayuc, e chi ooy jihuiy huinmaay nej Pablo nimiydägy je Huindzin Jesús y'ayuc ytiy'ajt.

Pablo etz Bernabé yajpátcixy jim Antioquía etz Pisidia

¹³ Chi Pablo etz ymigügtijc ajcxy mïd ybarcotigiiy, chi ajcxy ñicxy Perge ma Panfilia ñaaxjot. Chi Juan puyöyduutni Pablo etz Bernabé, e chi ñicxni Jerusalén. ¹⁴ Pablo etz Bernabé ñajxy jim Perge oyja'tcixy jim Antioquía ma Pisidia naaxjot. Sábado xii ajcxy ytigiiy ma je judíojäy ajcxy ñaymujctac, chi ajcxy ixtactay. ¹⁵ Co ñecycapxtay ma Moisés ñecy etz Dios y'ayucnajtzcapxiybi ñecy, chi je naymujctac huindzin quejxy ayuc ma Pablo ajcxy, ñimaayi:

—Migügtijc, pen mmïd ayuc tiy'ajt mïd jäy yci xpi jëbi cham myajnimäy ajcxy.

¹⁶ Chi Pablo ytinayigy, yci' mïd ytiy'ajt yecy co huen amoongixy, e nimay ajcxy:

—Midoogix, miich Israel jäy ajcxy, etz huidibi Dios yajmij'ajtp. ¹⁷ Je Israel jäy Dios huin'ijxy ich'ajt nmij'ap nmijteedy jecy'ajty etz yajyujcpejt ajcxy micho'n co anajty ajcxy jim yjactzinäy Egipto ñaaxjot. Chi ajcxy yajpidzimmni mïd Dios ymic'ajt.

¹⁸ Dios je' ajcxy mihuindinay huixchigüipx jimijt jim mijtigiduum. ¹⁹ Je Dios huixtuc it naax cajp yajtigoy huidi anajty jim tzinaayb Canaan ñaaxjot, etz yajmoy je naax ich'ajt nmij'ap nmijteedy jecy'ajty jigix ajcxy jim chinähuipy. ²⁰ Midaax

migo'px jahuixchigöpx majc jimijt Dios mic'ajt mooy juez ajcxy huen ane'myii Israel jäy ixti mabaad Samuel je Dios y'ayucnajtzcapxiiyb ytungbijcy. ²¹ Huin'it ajcxy tög rey pijtzooy huidi ane'miib ajcxy. Chi Dios yajreytigiiy Saul huidi tuun huixchigöpx jimijt. Je Saul yteedy hue' je' anajty yxi Cis, hue' je' anajty Benjamín y'ap y'oc. ²² Chi Dios tungbijcy Saul e yajreytigiiy David, chi Dios yminañ: “Ti nbaadyich David, Isaí ymang, tög yëdyjc huidibi cuydundähuipy nej ndimdzocyich.” ²³ Ma David y'ap y'oc Dios yajniibijcy Jesús, jigix nihuäniipy yajniidzögipy je Israel jäy ajcxy, jadu'n nej anajty jécyip Dios yaj'ahuaniiy ajcxy. ²⁴ Ca'ni anajty Jesús miñ co Juan, je Bautista, capxhuäcxy Dios y'ayuc ma je Israel jäy ajcxy, nimaaygixy co copicy huen jothuimbijtcixy ma Dios, e huin'it jëbi ñiibéjtcixipy. ²⁵ Co anajty Juan y'o'cin huington, chi yminañ: “Ca' ich njëjity je Cristo, jadu'n nej mminaangixy. Jayip ti nmiiñich, jac'axam miina'ñ je Cristo; jacmic'ajt mid je' ca'ydi ich. Ca' xypaadyich nicxy yi' ycighuin nguejich.”

²⁶ Chi Pablo yjacminañ:

—Migügtijc, Abraham y'ijx y'oc etz pinjaty yajmij'ajtp Dios, Dios ti xyajniguexy jada ayuc nej ajcxy jëbi m'alma niidzoocin paady. ²⁷ Je jäy ajcxy huidi anajty ajcxy tzinaayb jim Jerusalén etz tungmidpi ajcxy, ca' ajcxy nejhuip pin je' anajty je Jesús, ni ca' anajty huinjihuuygixy y'ayucnajtzcapxiiybi ajcxy y'ayuc huidibi anajty yajcapx ma ajcxy ñaymujctac huindüg sábado. E je' ajcxy c'm yajpocycäy Jesús, e cuyduñ nej anajty ajcxy yjaybetyity ma Dios ñecy. ²⁸ Oy ajcxy

ca' paty pocy nej yaj'öccixipy Jesús, chi ajcxy nibijctzohu#y ma Pilato co huen nicxy yaj'ögyii. ²⁹ Co je jäy ajcxy cuydunday jadu'n nej anajty yjaybétyity ma Dios y'ayuc m#d je' ycixpi, chi ajcxy yajminajcy cruudzcíxy, etz oy yajnaaxtig#ygyxy. ³⁰ E Dios je Jesús yajjugypijc co anajty ti y'ögy. ³¹ Chi canaag'oc ñayguëxigo'ci ma ymigügtijc huidi anajty ti ym#dhuididyii co chooñ Galilea ñicxy Jerusalén. Jadachambi yi' je' ajcxy huidi tiy'ajt yejcpy ma je jäy ajcxy.

³² Je oybi ayuc #ch miich ajcxy nyajm#dm#ydcy cham, huidi Dios yajnimay #ch'ajt nmij'ap nmijteedy jecy'ajty. ³³ Je oybi ayuc ti Dios cuyduñ cham ma #ch ajt co yajjugypijcy Jesús co y'o'cy. Jadu'n yi' Dios y'ayucjojaaybi jaay jecy'ajty ma je Salmo necy mimetzpi ma Dios jadu'n yminañ: “N'ungich cham ti nyajjuugypicyich.” ³⁴ M#d jadayaabi ycixpi co Dios ti yajjugypicy Jesús co y'o'cy, jigix ñinicx ca yhuindigoopy jadu'n anajty jaybétyity ma Dios ñecy ma Dios jadu'n yminañ: “Nmöhuaamyich miich ajcxy je conúcxin huidibi nyajnimaaayich je David.” ³⁵ Paady nañ jadu'n Dios y'ayucjojaaybi jaay jadüg'it, ma yminañ: “Ca' Dios a'ixiy nicxy y'ung ñinicx yhuindigooy, je y'ung huidibi m#d huadz jot huinma'ñ.” ³⁶ Com janch co je David Dios huin'ijxy, jigix ane'mipy yi' yjuugy ymigüg ajcxy. E co ytung yajmay, chi y'o'cy, e je' y'alma ñaybaatti m#d je y'ap yteedy y'alma, e je' ñinicx huindigooy je'. ³⁷ Je Jesús huidibi Dios yajjugypijc ca' je' ñinicx yhuindigooy. ³⁸ Migügtijc, jëbi mnejhu#ygyxy, co je pocyhuinmeecxin yaj'#huäcxy yajcapxhuäcxy

müüd Jesús ycixpi. ³⁹ Müüd je' ycixpi pinjaty mibijcp ti ypocyajhuinmeecxcixy hüüdibi Moisés yley anajty ca'p pocyhuinmeecxin yecy. ⁴⁰ Nayguend'ájtigix, ix xyajcidacpejtcix je mij ayo'n jadu'n nej Dios y'ayuccojaaybi jaay jecy'ajty co Dios jadu'n ymínañ:

⁴¹ Midoogix üch n'ayuc, müüch ajcxy nixiicpi yajxiicpi, nay'adzigiüyigixy, ix m'alma myajtigooygixy. Com üch Dios ndumybich tüg mijhuinmañ ma müüch ajcxy mxii mdiempo. May müüch ajcxy ca' mmibigipy, oy pin xyjayajmüüdmíydáaccixipy.

⁴² Co Pablo ajcxy ypidzimy ma yi judíojäy ñaymujctac, chi je jäy hüüdibi ca' yjudíojäyity nimay je Pablo co huen nañ jadu'n yajmüüdmíydägiyb ma je jadügpí sábado. ⁴³ Co ajcxy yöyhuäcxni ma nayoöymujctac may judíojäy etz mayjäy hüüdi ca' yjudíojäyity hüüdibi jijptigiyüy je judíojäy y'ixpijcin, panícxy ajcxy je Pablo etz Bernabé. Pablo etz Bernabé capxhuiy ajcxy co huen paníxcixy je tiy'ajt jadu'n nej Dios tüübi tuñ may'ajt müüd jäy ycixpi, e ca' ajcxy ixmadzipy.

⁴⁴ Co sábado yxii paty, chi jäy ñayoöymujci jahuenjaty cajp jäy ycanicxtay co anajty tzachmidoohuaangixy Dios y'ayuc. ⁴⁵ Ca' anajty ajcxy yjotcúcity co je judíojäy ajcxy ijxy je mayjäy. Chi ajcxy ooy yjot'ambijccoty ni'ojüygixy etz nimaaygixy oy ni nej Pablo. ⁴⁶ Chi Pablo etz Bernabé ytigüy miccapxpi ymínañ ajcxy:

—Copicy anajty co üch müüch nyajnimähuipy Dios y'ayuc jayijp. Com ca' mgöbigaangixy Dios y'ayuc, e co ca' mnaybidáacigixy tudägy ma

jugy'ájtín m̄id huinix̄ibi, n̄icxyich n'ocyajnim̄äy ajcxy Dios y'ayuc huídibi ca' yjudíojäyity. ⁴⁷ Com jadu'n xy'ane'myich ajcxy yi Huindzin Jesús, e xyñimaayich ajcxy:

Ti ñch miich n̄idägy jadu'n nej t̄üg t̄icxin jain ma t̄üg'óc̄iy naaxhuiñybi jäy jigix myajne-jhuihuipy ajcxy je n̄idzooc̄in jigumbaad huindu'my naaxhuiñ.

⁴⁸ Co ajcxy jadu'n midoy huídibi ca' yjudíojäyity, chi ajcxy ooy n̄igi yjotcuḡiy, e chi ajcxy ym̄inandacy co je Huindzin Jesús y'ayuc ooy anajty y'óyity. E may ajcxy m̄ibijcy huídibi anajty Dios ti yajnigödunḡiy co paatip jugy'ájtín huinix̄ibi. ⁴⁹ E jadu'n jim yajcapxhuäcxy Jesús y'ayuc ma je jimbi naax cajp. ⁵⁰ E je judíojäy ajcxy minaygapxi nijëjity töxyjäydijc ajcxy tudägypi huídibi Dios yajm̄ij'ajtp, etz je mijjädijc, e je' ajcxy m̄id m̄ibid̄igy Pablo etz Bernabé co pahuojpquëgaangixy ma jejimbi naaxjot. ⁵¹ Chi Pablo etz Bernabé yc̄ig huinhuojpy, je' je' t̄iy'ajt̄ip co ca' jäygidacy ajcxy nej jäy anajty ytungixy. Chi ajcxy ñicxni jim Iconio. ⁵² E je' ajcxy huídibi mijpidaacp Jesús ooy anajty ajcxy yjotcujcity. E ym̄id anajty ajcxy je Esp̄iritu Santo ma yjot yhuinmañ.

14

Pablo m̄id Bernabé jim Iconio

¹ Jim Iconio Pablo etz Bernabé ytiḡiy ajcxy yquipxyi ma je judíojäy ñaymujctac, e oy yaxon ajcxy capxhuäcxy Jesús y'ayuc. E may judío etz griegojäy ajcxy ym̄ibijcy. ² Je judíojäy

ajcxy huídibi anajty ca' ymíbijccixy nigapxcoty ni'ojíygoty ajcxy huídibi ca' yjudíójáyity huen je cajp jáy ajcxy mijotmáđipy je mibíjcpíđjc. ³ Míid jada ycíxpi Pablo etz Bernabé yhuí'my je' ajcxy jecy etz capxhuäcxixy ajcxy Dios y'ayuc huinmic jotmic etz je Huindzin mijotcujc'ajtcixy ooy, e mooyi ajcxy je mic'ajt jébi ajcxy pa'mjäy yajtzögipy etz mijhuinmañ tungixy huídibi íjx-pejt'ajtp ma Dios ymic'ajt. ⁴ E je cajpjäy mejtzpicy je' anajty ajcxy, nijéjity ymíjpidacpy ajcxy yi judíójäy, etz nijéjity ymíjpidacpy ajcxy je Dios y'ayuccapxhuäcxpi. ⁵ Chi nijéjity judíójäy etz huídibi ca' yjudíójáyity ñaygapxi míid tungmíidpi co mijotmátcodaangixy etz tim tzaagögáđzaangixy Pablo etz Bernabé. ⁶ Co Pablo etz Bernabé nejhuiy, chi ajcxy yqueecy ñicxy ajcxy jim Litra etz Derbe jim Licaonia, e majaty naax cajp huídi huinduy'agonbi. ⁷ Jim ajcxy capxhuäcxy Jesucristo ytiy'ajt nej jébi ajcxy huaad y'alma nídzoocin paatcixy majaty cajp huíngonbi.

Tzaagätzcixy Pablo jim Litra

⁸ Jim Litra anajty tüg yéyđjc íñäy tecyma'tpi, caminaabi anajty yöy, com jadu'n anajty yma'xung'aty. ⁹ Je tecyma'tpi amido'ijtpy anajty Pablo y'ayuc, e Pablo íjxpy anajty co ymíid mibíjcin nej jébi chögy. ¹⁰ Chi Pablo mic nimay:

—Tinaayig.

Chi je tecyma'tpi tüg tipy ytínaygugíy, e chi ytigíy yöyb. ¹¹ Co je mayjäy ajcxy íjxy nej Pablo anajty pa'mjäy ti yajtzögy, huin'it ajcxy ytigíy huambi jihuíybi míid Licaonia ayuc chachmíinaangixy:

—¡Dios ajcxy jadu'n nej jäy ti ycidaaccixy ma ñch ajt!

¹² Yminaangixy co Bernabé je' anajty Júpiter, e je Pablo je' anajty Mercurio, com je' anajty capxp. ¹³ E je Júpiter teedy huidibi anajty tumb jim ma je Júpiter chajptijc cajppäbi, mimiñ toro ajcxy etz pijy. E je teedy müd je jäy ajcxy yhuindzigihuaangixy etz ojadadaangixy anajty Pablo etz Bernabé, yaj'ögaangixy je toro ajcxy. ¹⁴ Co Pablo etz Bernabé nejhuy, ca' ajcxy jäygidacy nej jäy anajty ajcxy y'ididzaangixy, chi ajcxy ci'm yhuit agiidziy, e ytigiy ajcxy mayjäy'agujc yam chachminaangixy:

¹⁵ —¡Yëdijctijc ajcxy! ¿Nej co jada jadu'n m'iditczixy? Nañ jadu'n ñch ajcxy jäyity, jadu'n nej miich ajcxy. Paady ñch ajcxy ti nmingixy ma miich ajcxy mgajp jigix ajcxy m'ixmadziy jada jadu'mbi huinma'ñ huidibi ca' choobaady ma Dios. E mijpidaaccixp je Dios juugypí huidi oyduñ tzajp etz naaxhuiñybi, je meyy etz tüg'óciy tijaty ya n'íxim. ¹⁶ Jecy'ajty Dios ixmajch je jäy ajcxy huen túngixy nej tzojccixy. ¹⁷ Oy Dios anajty jayecy tiy'ajt co je' Diosity, jatuñ jadu'n yi oybi müd miich ajcxy ycixpi. Dios yi' yajtuub etz yecy oybi cosecha e xymooyim mijcajee huidi ngaayim n'uucim e xyajjotcugiyim.

¹⁸ Oy anajty Pablo jadu'n jadim tzachnimaaygixy, ca'p ajcxy mimadacy co yi jäy ajcxy ca'p yaj'óccixipy je toro co anajty yhuindzigihuaangixy.

¹⁹ Huin'it xiñ nijëjity judíojäy yja'ty, chooñ jim Antioquía etz Iconio. Chi ajcxy yajnimay je mayjäy

co huen midziptzoongixy Pablo etz Bernabé. Chi mic'amy je mayjäy midziptzooñ Pablo etz cögäch ajcxy. Hue' ajcxy tijy ti anajty yaj'öccixy. Chi ajcxy oy ixjugucy cajppa'. ²⁰ Chi je apóstoles ajcxy jübigüy je Pablo, chi je' ypidügy, e ñicxy jadüg'oc cajpjoty. Com jabom Pablo etz Bernabé chooñ, ñicxy ajcxy jim Derbe.

²¹ Co Pablo etz Bernabé jadu'n capxhuäcxy je Jesucristo y'ayuc oybi jim Derbe, chi mayjäy ajcxy mijpidacy Jesús. Chi Pablo etz Bernabé ajcxy yhuimbijty Listra, Iconio, etz Antioquía.

²² Jim ajcxy jotmicmigapxy je mibijcpidijc ajcxy, e capxhuijy huen tügijp mibijccixy Dios y'ayuc, nimaaygixy:

—Co ndigihuaanim ma Dios y'ane'my copicy co nyajnájxim may ayo'n. ²³ Cajp cajp majaty mibijcpidijc yajpaady jim Pablo etz Bernabé yanjnibjcy nijejity yeydijctijc huen nigohuajc'ajtcixy je jäy ajcxy huídibi mijpidacp Jesús. Co anajty ti yajnibicy je' ajcxy huídibi nigohuajc'adipy, chi jaygay ajcxy y'ijty etz Dios mibijctzoy müid je' ajcxy yciXpi.

Pablo müid Bernabé yhuimbjtcixy Antioquía jim Siria naaxjot

²⁴ Pablo etz Bernabé ñajxy ajcxy Pisidia oy ajcxy yja'ty jim Panfilia. ²⁵ Chi Pablo etz Bernabé Jesús y'ayuc capxhuäcxi jim Perge, chi ajcxy ñicxy jim Atalia. ²⁶ Chi ajcxy jim ybarcotigüy ñicxcixy jadügtecy jim Antioquía ma anajty ajcxy ti yanjnibigyii Dios chójcin müid je tung huídibi anajty ti yajcixcixy. ²⁷ Co ajcxy yja'ty jim Antioquía, chi ajcxy huoomujcy je jäy ajcxy huídibi anajty

mijpidaacp Jesús, e yajmïdmïydactay tüg'ócïy nej anajty Dios ti ytuñ mïd je' ajcxy ycïxpï, nej anajty Dios ti yaj'ahuäch je tü'aa nej huaad mïbicy ajcxy je huidibi ca' yjudïojäyity. ²⁸ Pablo etz Bernabé ijt ajcxy ooy jim jecy mïd je mïbijcpïdijc ajcxy.

15

Mïbijcpïdijc ñayyöymujci ajcxy jim Jerusalén

¹ Je huin'it tiempo nijëjity jäy huïdi tzoön Judea yja'ty ajcxy jim Antioquía, e ytigïy yaj'ixpïjcp ma ajcxy je huidibi mijpidaacp Jesús, ymïnaangixy: “Pen myajnidzögamy ajcxy yi m'alma, copicy co ajcxy myajtiy'ajttiïhuipy jadu'n nej Moisés y'ane'my.” ² Chi Pablo etz Bernabé ñaymidziptzongooti ajcxy mïd huïdi anajty ajcxy tzomb jim Judea, e ca' ajcxy ñay'ayuc-huinjïhuïyï. Chi jada' yajniïbejti Pablo etz Bernabé etz jacjadyïi mïbijcpïdijc huen nicxy ajcxy Jerusalén yajtiydigïy ma je apóstoles ajcxy etz huidibi ajcxy nigohuajc'ajt je mïbijcpïdijc jim Jerusalén.

³ Je mïbijcpïdijc huidibi anajty ajcxy jim Antioquía oy ajcxy tüjïjphuhuïy Pablo etz je' ajcxy huïdi nicx mïd Pablo. Chi Pablo etz mïd yjaymïdtijc ajcxy ñicxy, e ñajxy ajcxy Fenicia ñaaxjot etz Samaria ñaaxjot. Yajmïdmïydaaccïxy je mïbijcpïdijc cajp cajp jadu'n nej jäy ajcxy huidibi ca' yjudïojäyity ti yjothuimbijtcïxy etz yajmïj'adaangixy Dios. E tüg'ócïy mïbijcpïdijc ooy ajcxy jäygidacy je Pablo y'ayuc.

⁴ Co Pablo etz Bernabé ajcxy yja'ty jim Jerusalén, chi je mïbijcpïdijc ajcxy cöbijci je apóstoles

ajcxy, etz je' ajcxy huidi nigohuajc'ajtp anajty je mibijcpidijc. Chi Pablo yajmüdmüydactay nej anajty Dios ti ytuñ müd je' ajcxy. ⁵ Chi nijëjity fariseojäy, tübi anajty mibijccixy Jesús, ytinayigy ajcxy juntijoty, e ymïnañ ajcxy:

—Copicy co huen yajtiy'ajttiý je jäy huidibi mibijcp Jesús huidi ca' yjudíojäyity, e copicy nyaj'ané'mim co huen ajcxy Moisés ycötüjcin cuyduuni.

⁶ Chi ñayyöymujci je apóstoles ajcxy etz huidi ajcxy nigohuajc'ajtp je mibijcpidijc, co capxyöyaangixy je fariseojäy y'ayuc nej yhuí'mip. ⁷ Ca' ajcxy tzojc ñay'ayuc-huinjihuiyí, chi Pedro ytinayigy ymïnañ:

—Migügtijc, mnejhuíyb ajcxy co jayhuin Dios ti xyhuin'ixyich ma miich ajcxy, jigix nyajnimähuibich jäy ajcxy huidibi ca' yjudíojäyity je Jesús ytiy'ajt oybi nej ajcxy y'alma nidzoocin paadipy. ⁸ E Dios huidi nejhuíyb jäy yjot yhuinma'ñ xyaj'ijxich je tiy'ajt co yejcy Espíritu Santo ma yi' ajcxy nañ tim jadu'n nej ytuuñ ma ñch ajt. ⁹ Dios tú'ciy ytuñ müd ñch ajt etz müd yi' ajcxy, müd co yi' ajcxy mibicy Jesús paady Dios yajhuaatzí ajcxy yjot yhuinma'ñ. ¹⁰ Jadachambi, ¿nej co ca' mhuinjihuíhuaangixy mibigaangixy nej Dios ytuñ müd huidibi ca' yjudíojäyity? ¿Nej co adzip myajnihuidzaangixy je costumbre huidi ni ñch ajt ni n'ap ndeedy ca' ti mimadägy nicxy cuydundaaygixy? ¹¹ Janch ñch ajt nmibijcim co müd je may'ajt huidi Jesús ti tuñ müd ñch ajt ycixpi ti nbaatim n'alma ñidzoocin. Nañ tim jadu'n je' ajcxy huidi mibijc Jesús huidi ca' yjudíojäyity

ypaat y'alma nĩdzoocĩn mĩd je may'ajt huĩdi Jesũs tĩ tuĩ.

¹² Huin'it je jã y'ajcxy y'amunday, y'amĩdo'ijtcixy nej Bernabé etz Pablo nimĩydaaccixy nej anajty Dios tĩ tuĩ mĩd yĩ' ajcxy, jadu'n nej ajcxy tĩ ya-jtzögy pa'mjãy mĩd Dios ymic'ajt, etz jac tijaty mijhuinma'ñ huĩdi tĩ tuĩ ma yĩ jã y'ajcxy huĩdi ca' yjudĩojãyity. ¹³ Co Pablo etz Bernabé ajcxy mĩydactay, chi Jacobo ymĩnañ:

—Migũgtijc mĩdo'mbĩjcgĩch ajcxy ĩch n'ayuc.

¹⁴ Simón Pedro tĩ xyajmĩdmĩydaacĩm nej Dios may'ajt tĩ tuĩ oga'n ma huĩdibĩ ca' yjudĩojãyity, co huin'ijxy huĩdi yĩ' yjãy'adaanĩp ma yĩ' ajcxy.

¹⁵ Quipxy jada ñaybadyĩ mĩd huĩdi je Dios y'ayucnajtzcapxĩybi jecy'ajty ycojay, ¹⁶ co jadu'n ymĩnañ:

Co anajty jadu'n tĩ y'ocjadyĩ, chi nhuimbĩdĩpyĩch ya naaxhuĩñ. Nyaj'oyĩhuĩbĩch jadũg'oc je naax cajp huĩdi David anajty y'ane'myb huĩdi anajty tĩ y'octĩgooybi jadu'n nej tũg tĩj huĩdi tĩ yciday. Ma David y'ap y'oc nyaj'a'oyĩhuĩbĩch jadũg naax cajp, jadu'n nej jã y'tijc cojy huinjemybi.

¹⁷ Jĩgĩx jacjadyĩ jã y'ojadadĩpy ajcxy yĩ Dios. Nañ jadu'n je' ajcxy huĩdi ca' yjudĩojãyity, huĩdi ĩch njãy'adaanĩp.

¹⁸ Jadu'n je Huĩndzĩn Dios jécyĩp jada tĩy'ajt jadu'n yejcy.

¹⁹ Chi Jacobo yjacmĩnañ:

—Paady ĩch jadu'n nmĩna'ñĩch co ca' huaad n'amayĩyĩm ajcxy huĩdi ca' yjudĩojãyity huĩdi ajcxy tĩ mĩjpidãgy Dios. ²⁰ Hue' janchtiy tzoc

nijayíyim co ajcxy ca' tzüdzipy huidi jäy ya-jhuindzigíyib ídolos, etz ni ca' huaad migapxcixy huingbi töxyjäy, etz ni ca' huaad tzützcixy iyujc huidi jaty jäy yöc-huiddyí, etz ni ca' huaad jüxcixy tijaty iyujc ni'py. ²¹ Jecy'ajty ixti chamni tüg tüg cajp, ji pin #hua'cxp capxhua'cxp Moisés yley majaty nanyöymujctac naag naag pocxinxi.

²² Chi je apóstoles ajcxy etz je huidi nigohuajc'ajt yi mibijcpidijc, müid tüg'óciy Jesús yjäy pidacy ajcxy yhuinma'ñ co huin'ixaangixy nijëjity jäy ma je' ajcxy etz quexaangixy jim Antioquía quipxyi müid Pablo etz Bernabé. Chi ajcxy yajnibejty Judas, huidi nañ jadu'n yajtijpy Barsabás, etz müid Silas, yëydijctijc huidi ajcxy capxpaadip. ²³ E je' ajcxy yajmiguejxy necy nej anajty ti jaay: "Ich ajcxy apóstoldijc, etz huidi nigohuajc'ajt yi mibijcpidijc, etz nidüg'óciy mibijcpidijc, cham ich ajcxy nguexy capxpocxin ma ajcxy mibijcpidijc huidi ca' yjudíojäyity huidi ajcxy tzinaayb jim Antioquía, etz huidi ajcxy tzinaayb Siria etz Cilia nãaxjot. ²⁴ Ti ich ajcxy nejhuíyich co nijëjity jäy ti xyñinixcixy, choñ ma ich ajcxy, ca' ich ajcxy ngötujcin mooy, e xy'amayíyigixy jim müid y'ayuc, e xyajhuinma'ñtigoya'ñ ajcxy, co ajcxy xyñimaaygixy co copicy co myajtiy'ajttíhuip ajcxy m'ung, etz mbayöyipy ajcxy je Moisés ycötújcin. ²⁵ Paady ich ajcxy ti nnygápxi gixy nidüg'óciy co yajnibedipyich nijëjity jäy huidi yajpaatp ma ich ajcxy co huen nicxy xy'íjxcixy niguípxyi müid nmigügtijcich huidi ooy ndzocyich, je Bernabé etz je Pablo. ²⁶ Je huidi ajcxy yjugy'ajt ti yoxy ti toogy müid ajt nHuindzin Jesucristo ycixpi.

27 E jadu'n yam nguexyich ajcxy Judas etz Silas, e yi' ajcxy ci'm xyajmüdmüydägiipy tüg'óciy üch ajcxy n'ayuc. 28 Ti je Espíritu Santo huinma'n pídägy ma üch ajcxy nhuinma'n etz üch ajcxy ti nhuinma'n nbídägyich, co ca' nyajnübigiipy ajcxy ti-jaty ayuc tzaachypi, jëyi janchtiy je huidi copíciy. 29 Copicy co ca' ajcxy mdzüdziipy huidi jäy ya-jhuindzigüyb ídolos, ca' ajcxy ni'py mjücxixiipy, ni ca' ajcxy mdzüdziipy iyujc huidi yöc-huiity ti y'ögy, e ca' ajcxy mmigapxtigooygixiipy huingbi töxyjäy. Pen mguydundaayb ajcxy jada ané'min, oy anajty mdungixy. E Dios ajcxy xypubediipy xypudigihuipy.”

30 Jadu'n je' ajcxy huidi ti yajquexy nicxy ajcxy jim Antioquía. Jim ajcxy huoomujcy je mibijcpidijc, e yajcidiüy ajcxy je necy. 31 Co je mibijcpidijc je necy capxy, chi ajcxy ooy yjotcugüy müd je oybi ayuc tüibi anajty ajcxy yajnigüxyii. 32 Com Judas etz Silas hue' je' anajty Dios y'ayucnajtzcaxüybi, paady ajcxy yajjotcugüy jot'amij moy je mibijcpidijc müd je ayuc. 33 Jecy ajcxy jim yhuäcxijpy, chi je mibijcpidijc müd ajcxy ycapxycijxy, yajmihuanüy ajcxy Dios, chi ajcxy yhuimbijtni ma anajty ti choongixy. 34 Chi Silas yhuinma'nypidacy co anajty yhui'ma'n. 35 Nañ jadu'n Pablo etz Bernabé ijt ajcxy jim Antioquía, etz müd jac nijëjity ymügügtijc yaj'ixpijc'idühtzcixy etz capxhuäcx'idühtzcixy je Huindzin Jesús y'ayuc ytiy'ajt.

Pablo mümetz viaje

36 Ti xü tiempo anajty ñajtznünicxüyñi co Pablo nımay Bernabé:

—Jam'ajt nmigügtijc co'ixiym cajp cajp majaty ti ngapxhuäcxim Huindzin Jesús y'ayuc. Ooy njanejhuíhua'ñich nej ajcxy yajpaady. ³⁷ Bernabé ymíid nicxaamy anajty je Juan huídi yajtijp Marcos. ³⁸ E je Pablo ca' a'ixiy co míid nicxip Juan, com ti anajty y'ocpuyöydúutibi jim Panfilia, e ca' anajty ti yjacmídyajtyüyöyii je tung. ³⁹ E ca' ajcxy ñay'ayuc-huinjihuiyi miñ xyipy. Chi Bernabé míidnicxy Marcos e ybarcotigiyy ajcxy, chi ajcxy ñicxy jim Chipre. ⁴⁰ E je Pablo abicy huin'ijxy Silas huídi anajty míid ñicxa'ñ. Chi je mibijcpidijc míid ycapxycíjxy, chi chooni ti anajty je mibijcpidijc yajmihuaníyí Dios, ⁴¹ chi ñajxy jim Siria ñaaxjot etz Cilicia ñaaxjot jot'amijmooy je mibijcpidijc.

16

Timoteo mijhuäcpejty je Pablo etz Silas

¹ Chi Pablo etz Silas yja'ty ajcxy jim Derbe etz Listra. Jim ajcxy paty tüg jäy huídi anajty yxi Timoteo huídi anajty mijpidaacp Jesús. Judíojäy anajty ytaj'ajtpy, e griegojäy anajty yteedy'ajtpy. Je' ytaj nañ ymibijcpsy anajty Jesús. ² Je jäy ajcxy huídi yajmij'ajtp Jesús jim Listra etz jim Iconio ooy anajty oy nimíydaaccíxy Timoteo. ³ Pablo ooy jatzojcy co Timoteo ycajäymíid'ajti. Chi Pablo yajtiy'ajttiyyi Timoteo, jigix ca' ymíjotmädíyb je judíojäy huídi anajty ajcxy jim tzinaayb, com tüg'ócíy ajcxy nejhuiy co griegojäy teedy'adyii. ⁴ Cajp cajp ma anajty ajcxy ñaxy yajmídmíydaaccíxy ajcxy je mibijcpidijc je cötujcin huídi je apóstoles ajcxy, etz huídi nigohuajc'ajt je mibijcpidijc jim Jerusalén.

⁵ Je' ajcxy huïdi yajmij'ajtp Jesús cajp cajp nīgi ana-jty yjotmicpijccixy, etz mijpidaaccixy Dios y'ayuc, etz ñimayiy'iditczixy jabom jabom.

Pablo yhuin'ijx tüg Macedonia jäy

⁶ Je Espíritu Santo ca' a'ixiy nicx capxhuäccixy Dios y'ayuc jim Asia ñaaxjot. Paady ajcxy huingduum ñicxy yajyöyñajxy ajcxy Frigia ñaaxjot etz Galacia ñaaxjot. ⁷ Chi ajcxy jim yja'ty ma Misia ñaaxtziba'n. Chi huinmay co ñicxa'ñ ajcxy Bitinia ñaaxjot. E je Espíritu yajnejhuñy ajcxy co ca' yi'tzocy co jim nicxcixipy. ⁸ Chi ajcxy jüyöyñajxy Misia ñaaxjot, chi ajcxy y'idacy jim Troas. ⁹ Chi Pablo cumäyjoty huin'ijxy tüg yëydijc, huïdibi yconaaxity anajty Macedonia, ytinay'ahuñy ma Pablo yhuin-duu, e ycohuanñyii, ñimäyii: "Tun may'ajt nicx jim Macedonia, e jim xypubedipy ñch ajcxy." ¹⁰ Co Pablo jadu'n huin'ijxy cumäyjoty, chi ñch ajcxy n'ixtay barco huïdi nicxamb jim Macedonia. Nhuinjihuñy ñch ajcxy co jim Dios xyquéjxcixyich jigix jim ngapxhuäccibich Jesucristo ytiy'ajt je oybi nej jëbi ajcxy alma nidzooçin paadipy.

Pablo etz Silas jim Filipos

¹¹ Chi ñch ajcxy nbarcotigñy jim Troas nicxy ñch ajcxy tñyi ma naax mejy'agujcpi huïdibi anajty yxñ Samotracia. Chi com jabom ajcxy nja'tyich jim Neápolis. ¹² Co ñch ajcxy jim ndzooñ, chi ñch ajcxy nicxy jim Filipos. Filipos hue' je' romanojäy ycajp. Je' je cajp jac mijpi ma je Macedonia ñaaxpa'. Jim ñch ajcxy nhuäccijpy jecy. ¹³ Tüg sábado nicxy ñch ajcxy cajppa', mihuingon tüg

mijnii, ma anajty judíojäy ajcxy miiđity Dios ojada-
jttac. Chi iich ajcxy n'ixtacy jim, e ngapxhuäcxich
ajcxy Jesús y'ayuc ma je töxyjäydijc ajcxy huidi
jim anajty ajcxy ti yöymujccixy. ¹⁴ Je Lidia ana-
jty y'amido'ijtp. Hue' je' anajty Lidia ycogajpity
jim Tiatira, e ytocpy anajty ucy huit oy jatypi.
Lidia yajmij'ajtpy anajty Dios, e je Huindzin Dios
yajyungiiyi yjot yhuinmañ, jigix amido'idipy nej
Pablo Dios y'ayuc capxhuäcxi. ¹⁵ Je Lidia niibejt
miiđ tüg'óciy yjuugy ymigüg, chi iich ajcxy xyc-
huaniiy, e xyñimáaygixich:

—Pen minamb ajcxy co nmibicyich je Huindzin
Jesús, miin jättaaccix ma iich ndijc.

Chi ooy xycohuaniiy iich ajcxy, ixti cooni jim
xyajhui'myich ajcxy.

¹⁶ Jadu'n yjajti tüg tecy co iich ajcxy anajty
ñicxy ma Dios ojadajtac, chi iich ajcxy nbaty
tüg tumbi töxy'anäg mañ'ajt miiđpi huidi ooy
ytiygapxy. Ymiiđ anajty yhuindzin ma ytuñ, e je'
yhuindzin ooy anajty ymeeñybaaty co je töxy'anäg
ytiygapxy. ¹⁷ Je töxy'anäg ypanicxy chach yam
Pablo etz iich ajcxy ymínañ:

—Jada yëydijc Dios tzajpjotypi ajcxy ymidumyb.
Capxhuäcxi ajcxy Dios y'ayuc jadu'n nej jëbi iich ajt
n'alma nüdzoocin paady.

¹⁸ Canaag xii jadu'n iich ajcxy xychach'amayiiy.
Co Pablo chijpin, chi yhuäc-huimbijty nimay je
mañ'ajtmiiđpi:

—Miiđ Jesucristo yxii n'ane'myich, pidzim ma
jada töxy'anäg.

Tim huin'ítiy je ca'oybi yajyöyduuty je töxy'anäg.

19 Co je töxy'anäg yhuindzin jadu'n ijxy co ca' y'ocmeeñybadaani, chi mïd je' ycixpi ajcxy majch Pablo etz Silas, e yajnicxy ajcxy ma je tungmïdpi ma je' ajcxy y'agujctijc. 20 Co ajcxy jiiby mïdja'ty ma je tungmïdpi, chi ymïnañ:

—Jada yëydijc ajcxy judíojäy jada, nigoo ajcxy ñaax yajmäty ycajp yajmäty, 21 etz yaj'ixpicxy ajcxy costumbre huïdi ca' huaad ñich ajt ngöbïjcim, e nihuaad ngatuunim, com hue' ñich ajt romanojäy.

22 Chi je mayjäy ajcxy mïddziptzoon Pablo etz Silas, e je tungmïdpi ni'ane'mdiy co huen ajcxy yajnijeñ yaj'ixjeñ huen yajhuojpcixy mïd matz. 23 Co ajcxy huojptay, chi pidacy ajcxy pujxtigoty, e ane'my ajcxy pujxtijc huindzin co huen cuend'ajtcixy yajxon. 24 Co je pujxtijc huindzin ypaati je cötujcin, chi pidacy Pablo etz Silas jac jiiby öc'am, e chi ajcxy ixmajch co'adzity ytecy ma je quipy huïdi yxï cepo.

25 Chi jadu'n yajty mijcuctz anajty, co Pablo etz Silas chach Dios ojadaajtcixy chach huin'ïgixy yi Dios, e jacjadyii machyjäy chach amidoo'ijtcixy.

26 Chi timïtiini uyx huinxijty pujxtijc poch. Chi y'ahuaatztay je pujxtijc agi', e y'adzïttuttay je cadena ma tüg'óciy machyjäy. 27 Chi oy ymähuijy je pujxtijc huindzin. Co jadu'n ijxy ac'ahuädz pujxtijc aguu, chi yajpidzïmy y'espada ñayyaj'öga'ñyii anajty. Com hue' anajty tijy ti je machyjäy yqueectäy. 28 Huin'it Pablo mic'amy migapxy je pujxtijc huindzin nimay:

—Ix nej mnayduuni, cheeby ajcxy nidüg'óciy.

29 Chi je pujxtijc huindzin pijctzoy jin, e ytigïy poyïgy pujxtigoty, janch tziyuuyb mïd tzig'i'ñ.

Chi ycoxtinay'ahuñy ma Pablo etz Silas ajcxy yhuinduu. ³⁰ Chi yajpidzimy Pablo etz Silas, e yaj'amidooy:

—Huindzin, ¿ti ñch jëbi nduñ jigix nïdzoocin nbáadibich?

³¹ Chi je' ajcxy minañ:

—Mibic Huindzin Jesús etz mbaadipy nïdzoocin, miich etz m'ungdöxyijc.

³² Chi ajcxy yajnimay je Huindzin Jesús y'ayuc tüg'óciy pinjaty anajty jim ma je pujxtijc huindzin ytijc. ³³ Mijcuctz je pujxtijc huindzin puji je Pablo ajcxy chaachí'au, e chi je pujxtijc huindzin ññibejtay ajcxy miid y'ung ytöxyijc. ³⁴ Chi je pujxtijc huindzin yajnicxy Pablo etz Silas ma ytijc, yajcaay yaj'uucy ajcxy. Ooy anajty ajcxy yjotcujcity nidüg'óciy, com ti anajty mibijccixy Dios.

³⁵ Com jabom je mijtungmïdipi quejxy mutztungmïdipi jim ma pujxtijc huindzin miid cötujcin huen najtzmadzïygixy Pablo etz Silas. ³⁶ Chi je pujxtijc huindzin nimay Pablo:

—Ti je tungmïdipi quexy cötujcin co jëbi nnajtzmadzïyich miich ajcxy. Nicxcix jotcujc.

³⁷ Chi Pablo migapxy je mutztungmïdipi, e chi nimay:

—Romanojäy ñch ajcxy. Yi cajptungmïdipi ti xyhuopyich miid matz mayjäy agujc, ni ca' jayijp ti xytidyuñich, e ti xypidägyich pujxtigoty. ¿Nej co jadachambi xyñajtzmadzïhua'ñich ameechi? Ca' jadu'n y'óyity. Huen mijtungmïdipi ci'm miñ xyajpidzïmgixich ñch ajcxy.

³⁸ Chi je mutztungmïdipi cijx nimydyactäy ma mijtungmïdipi tüg'óciy Pablo y'ayuc. Chi ajcxy

ñay'adzigiñyi co nejhuñyi co Pablo etz Silas hue' je' anajty ajcxy romanojã. ³⁹ Chi je miñtungmñdpi ñicxy ci'm oy capxjotcidãgy je Pablo etz Silas. Chi yajpidzimy pujxtigoty, e pijctzoy may'ajt huen hu-ingduum ñicxcixni. ⁴⁰ Co Pablo etz Silas ypu-jxtijcpidzñmy, chi ajcxy ñicxy ma Lidia ytijc. Jim ajcxy jadu'n ijxy miñijcpidijc, e jot'amijmoy ajcxy. Chi ñicxcixni.

17

Jim Tesalónica yjajti ooy capxy ayuc, ca' nay'ayuc-huinjihuñhuñ

¹ Pablo etz Silas ajcxy ñajxy Anfípolis, etz Apolonia, chi ajcxy yja'ty Tesalónica. Jim anajty judíoñã ajcxy tũg ñaymujctac. ² Com jadu'n anajty costum-bre mñdity, Pablo ñicxp anajty ma judíoñã ajcxy ñaymujctac sábado xñ. E tugñg sábado xñ jim capxy miydacy mñd je' jim Tesalónica. ³ Hue' anajty mñd miydaaccixy jadu'n nej jaybecyity ma Dios ñecy co Cristo copicy ayo'n yajnaxtãhuip, e chi y'ögipy, huin'it yjugypigipy. Chi Pablo ymñañ:

—Je Jesús huñdibi y'ayuc ngapxhuäcxibich, je' je' je Cristo.

⁴ Nijëjity judíoñã ymñijc ajcxy e mijyöybejty ajcxy Pablo etz Silas. Nañ jadu'n may griegoñã huñdi anajty Dios yajmij'ajtp, etz maytöxyjãydijc huñdijaty oy ymñpidacni ymñnicxpejt etz miñijc ajcxy Pablo etz Silas y'ayuc. ⁵ Je judíoñã huñdi anajty ca' ymñicy, yjotmãtcoty ajcxy. Huomujcay ajcxy amũgy jãydijc etz jibic jãydijc, etz naax cajp yajmãttay, anejptuuti agojxtuuti ajcxy Jasón ytijc'aguu tzach'ixtaaygixy Pablo etz Silas. ⁶ E co

ca' ajcxy paty Pablo etz Silas, chi ajcxy majch Jasón etz jacjadyii mibijcpidijc. Adzip ajcxy yajnicxy pahuijch pajugujcy ajcxy jim ma cajp tungm#dpi. Yam chachminaangixy mic:

—Jada jäy ajcxy je' huidi tzachya-jhuinma'ñy digooyb tüg'óciy naax cajp, nañ iyabaad ajcxy ti ymiingixy. ⁷ Jada Jasón ti Pablo etz Silas jim yajjättägy ma ytijc, tüg'óciy ajcxy m#ddzip'adyii je César huidi ane'mb, yminaangixy co ji jadüg rey, je' je' je Jesús.

⁸ Co jadu'n midoy, chi ajcxy ooy yajyumägy yaj'oxigy cajpjäy etz je tungm#dpi ajcxy. ⁹ Chi Jasón etz ymigügtijc yajmeeñeyjcy, chi najtzmadz#y ajcxy.

Pablo etz Silas jim Berea

¹⁰ Co oy ycodz#y mic'amy yi mibijcpidijc yajpidzimy ajcxy cajpjoty Pablo etz Silas, e quejxy ajcxy jim Berea. Co ajcxy jim yja'ty, chi ajcxy ñicxy ma judíojäy ñaymujctac. ¹¹ Jim Berea judíojäy ajcxy yjacm#d oyjot oyhuinma'ñ, ca'ydi judíojäy ajcxy jim Tesalónica. Je Berea jäy ajcxy ycöbijc ajcxy Jesús y'ayuc ym#d oyjot oyhuinma'ñ. Jabom jabom ixtaaygixy ma yjaybetyity ma Dios y'ayuc pen janch jadu'n ymina'ñ nej Pablo yaj'ixpicxy.

¹² May judíojäy ymibijcy etz may griegojäy huidibi ooy ymijpidaacni nañ jadu'n ymibijcy, töxyjäydijc etz yëydijctijc. ¹³ Co yi judíojäy jim Tesalónica nejhuiy co Pablo nañ jadu'n Dios y'ayuc capxhuäcxi jim Berea, chi ajcxy jim ñicxy, etz yajyumägy yaj'oxigy je cajp jäy ajcxy.

¹⁴ Mic'amy ajcxy, je mijpidaacpi Jesús, yquejx Pablo mic'amy, huen nicxy jim ma mejypa'. Chi

Timoteo etz Silas yjac-hui'my ajcxy jim Berea. ¹⁵ Je huídibi ajcxy Pablo jaymíid'ajt ymíidnicxy, míid ñicxy ajcxy ixti cooni yja'ty jim Atenas. Huin'it ajcxy yhuimbijty míid tüg ayuc co huen Timoteo etz Silas nicxy minaybadyii Pablo jim Atenas janch mic'amy.

Pablo jim Atenas ahuijxy Silas etz Timoteo

¹⁶ Co anajty Pablo ahuixy je Silas etz Timoteo jim Atenas, ooy anajty ytajy ymay co ijxy nejhuiiy co je cajp míid ooy may quipychech, tzaadzech, etz oori oyduñ huídi ajcxy dios'ajtpy. ¹⁷ Paady Pablo nimíydacy Jesús ma yi judíoájy ñaymujctac míid je judíoájy etz jacjadyii jáy huídi Dios míyaaxp ojadajtp. E jabom jabom míid míydaaccíxy pinjaty y'oymujcp cajp cujc. ¹⁸ Nijéjity ixpícytíjc ñay'ijxquípxigíxy y'ixpíjcín míid Pablo. Jim huídibi ni'ixpígíyb epicúreo ixpíjcín, etz cham huídi ni'ixpígíyb estoico ixpíjcín. Chi ajcxy nijéjity ymíinaangíxy:

—¿Ti jada jada' ajt xyajnímaayim jada yéydíjc capxymaaybi?

Chi jadyii ymíinaangíxy:

—Hue' jada ycapxhuäcxyp huingbi dios y'ayuc.

Jadu'n ajcxy ymíinañ co Pablo nimíydacy Jesús etz jadu'n nej jáy yjugypícy huídijaty ti y'öccíxyp. ¹⁹ Chi ajcxy míidnicxy Pablo ma je it ma je ixpícytíjc ñaymugyii huídi anajty yxií Areópago, chi ajcxy Pablo nímay:

—¿Nej jébi njátcíxích jada jemybi ixpíjcín huídi miích mmímimb? ²⁰ Com tí íich miích xyajnímaaygích ayuc ca'pi yhuinjihuíyñity,

e nejhuih̄huaamyich ajcxy nej yhuimb̄dzim̄y t̄üg'óc̄iy jada ayuc.

²¹ T̄üg'óc̄iy Atenas jāy etz nañ jadu'n hūidi ajcxy jim̄ adzinaayb, ca' anajty ni ti tungixy, j̄eyi n̄igoobi am̄ido'ijtc̄ixy etz m̄iydaacc̄ixy jemybi ayuc t̄iy'ajt.

²² Huin'it Pablo ytinaȳigy mayj̄ay agujc jim̄ Areópago, e yminañ:

—Atenas jāy, n'ijxyp̄ich co miich ajcxy ooy myajm̄ij'ajtc̄ixy canaagnax hūidibi miich ajcxy mdios'ajtpy. ²³ Com ti x̄ī ya n'ixyich canaagnax hūidi ajcxy m'ojadajtpy, chi ti nbaatyich t̄üg altar ma jadu'n yjaaȳity: “Je Dios hūidi ca' p̄in ix̄y'adyii.” Je Dios hūidi miich ajcxy m'ojadajtpy, e ca' ajcxy m'ix̄y'adyii, jada je' hūidi nyajnīmaayb ajcxy.

²⁴ Je Dios hūidi oyduñ naaxhuiñybi etz tzajp etz jac tijaty, ȳi' je' nihuindzin'ajttayb t̄üg'óc̄iy. Je Dios ca' chin̄ay ma tzajpt̄ijc hūidi jāy ajcxy cojpy.

²⁵ Dios ca' ni ti yajtigoy'ity hūidi naaxhuiñȳay jamōhuaanip. Dios ȳi' yejcp jugy'ajtin etz hūidibi nxejim̄, etz t̄üg'óc̄iy tijaty.

²⁶ E t̄ügpī n̄i'py t̄ügpī jot ti yaj'oȳiy t̄üg'óc̄iy ȳi jāy, jigix huen tzinaaygixy huindu'my naaxhuiñ. Dios t̄iy'ajt yejcp nej x̄ī tiempo ȳoȳipy, e ma jāy j̄ebi huaad chinaaygixy, ²⁷ jigix ixtaaygixipy Dios, jadu'n nej jihuiȳ ixtaaygixy tond̄ay xajt̄ay, com ca' je' jiguem̄ity ma ñch ajt nidüg nidüg.

²⁸ Dios ycixpī ñch ajt ndzinaayim̄ nyücxim̄ etz nji'ajtim̄, com jadu'n minañ miich ajcxy mboeta, hūidibi ñy yajcojpy: “Dios ñch ajt xy'ung'ajtim̄ xy'anäg'ajtim̄.” ²⁹ Pen Dios ñch ajt xy'ap'ajt xy'oc'ájt̄im̄ ca' huaad nhuinmañ̄ nb̄idaacim̄ co Dios yjadu'ñity nej oori oyduñ, plata oyduñ, etz

tzaadzech quipychech huidi jäy ti yaj'oyïy mïid yci'mhuinma'n. ³⁰ Dios ca' mïidïty jotcöduuyb je jäy chuuhuinma'n tiibi ñajxni. Jadachambi ane'mb Dios hueñytïmma'amyïty huen jäy ajcxy jothuimbijtcïxy. ³¹ Com ti Dios yajnihuinmayïy tüg xii mina tiyduna'n yi naaxhuiñybi jäy mïid je yëydïjc huïdibi ti huin'ixy, jada tiy'ajt Dios ti yaj'ixy yajnejhuïy tüg'óciy jäy co ti yajjugypïcy Jesús co y'o'cy.

³² Co ajcxy jadu'n midoy co yi öcpi yjugypïgïpy, chi nijëjïty ytigïy nixiïcpi yajxiïcpi. Chi jacjadyii ymïnaangïxy:

—Huaad iich ajcxy n'amïdo'idïpyïch miïch m'ayuc mina anajty jadüg'oc.

³³ Chi Pablo jim chooni ma je' anajty ajcxy. ³⁴ Chi nijëjïty jäy ypadzooni huïdi anajty ti mïbïcy Pablo y'ayuc. Ma je' ajcxy jim anajty tüg jäy huïdibi anajty yxii Dionisio, yi' je' anajty tungmïid jim Areópago. Nañ jadu'n tüg töxyjäy huïdi anajty yxii Dámaris ypadzooni, etz jacjadyii jäy.

18

Chi Pablo ñïcxy jim Corinto

¹ Co jada jadu'n ytuni yjajti, chi Pablo chooni jim Atenas, ñïcxi jim Corinto. ² Jim minaybaati tüg judíojäy huïdi anajty yxii Aquila, Ponto anajty ycogajpïty, namja'tni anajty mïid ytöxyïc Priscila. Jim anajty ti chongïxy Italia ñaaxjot, jëgïxpi co je mij'ane'mbi, Claudio, pidacy cötujcïn co huen tüg'óciy judíojäy pidzimdaaygïxy jim Roma. Chi Pablo oy cogapxïy Aquila. ³ Aquila etz Priscila ytung'ajtpy anajty cochactïjcxyuïi, com nañ cochactïjcxuuyb anajty Pablo, paady Pablo jim

yhui'my miid je' ajcxy. Chi ajcxy tú'ciy ytuuñ.
 4 Tüg tüg sábado xii Pablo ñicxy ma je judíojäy
 ajcxy ñaymujctac yajmiidmiydaaccixy Jesús y'ayuc
 ytiy'ajt etz capxjotcidaaccixy judíojäy etz nañ
 huidi ca' yjudíojäyity.

5 Co ajcxy Silas etz Timoteo yja'ty jim Cor-
 into, chooñ ajcxy Macedonia, chi Pablo adügjiyp
 ytiğiay ayuccapxhuäcxpi ma judíojäy ajcxy co Jesús
 je' je' je Cristo huidi je' ajcxy chach'ahuijxyp.

6 E je judíojäy ajcxy ytiğiay jotma'tpi, tzipcaxpi
 ahua'ngaxpi. Chi Pablo yhuit huinxijty, je' je' je
 tiy'ajt co puyöydüdaani ajcxy, e chi Pablo ymíñañ:

—Miich ajcxy miid mgi'mbocy ajcxy
 myajtigoyañ yi m'alma. Hich ca' ti pocy
 nmídidyich ma miich ajcxy. Cham nicxy Dios
 y'ayuc ngapxhuäcxich ma huidi ca' yjudíojäyity
 ajcxy.

7 Chi Pablo yöybojtni ma judíojäy naymujctac,
 chi ñicxy ma Justo ytijc. Justo ooy anajty Dios
 miyäxy ojadaty, e ymiid anajty ytijc mihuingon
 je judíojäy ñaymujctac. 8 E Crispo, je judíojäy
 ñaymujctac huindzin, ymibijc je' je Huindzin Jesús
 y'ayuc ytiy'ajt, miid tüg'ócay y'ung y'anäg, yjuugy
 ymigüg. Nañ jadu'n nijējity Corinto jäy co midoy
 Jesús y'ayuc, chi mibijcy e ñiibejty ajcxy. 9 Chi je
 Huindzin Dios nimay Pablo cumäyjoty:

—Ca' mdzigí, capxhuäcx'adítz n'ayucich, e ca'
 mni'amoñ. 10 Com hich miich nbubedipy, ca' pin jot
 miid'adipy nicxy nejaty xytuñy. Hich may hich ya
 nmídidy jäy ma jada cajp.

11 Chi Pablo yhui'my jim Corinto tüg jimijt jacup,
 yaj'ixpijcy jäy je Huindzin Dios y'ayuc ytiy'ajt.

¹² Huin'it tiempo co Galión ygobernador'ajty jim Acaya ñaaxjot, chi judíoJay ajcxy midziptzoñ je Pablo, yajnicxy ajcxy ma cõtujctac. ¹³ Chi ajcxy nimay je gobernador:

—Jada yëydijc tzach jäy yaj'ixpijcp co ca' ycopicyity yajcuydunipy Moisés ycõtujcin huidi jaybety ijtp.

¹⁴ Pablo capxamb anajty co oy yi Galión nimäy ajcxy je judíoJay:

—Pen yi Pablo ti ytundigooy o mijpocy ti tuñ, huin'it nmijpidägibich miich ajcxy m'ayuc, miich ajcxy judíoJay. ¹⁵ Pen je Cristo y'ayuc etz miich ajcxy mgõtujcin myajtzibiyb myajcapxyiyb, ca' ich huaad nyajtigiyiyich yijibi huinma'ñ.

¹⁶ Chi je gobernador y'ané'min pidacy co huen judíoJay ajcxy yajpidzimdayii ma je cõtujctac. ¹⁷ Huin'it tüg'óciy griegoJay ma je cõtujctac huijtzpidzimyb je Sóstenes, yi judíoJay naymujctac huindzin, e chi ajcxy cuy jibijpy huingojxy jipcojxy ma gobernador yhuinduu, e Galión ca' tuñcuenti.

Pablo yhuimbijtni Antioquía, e yajtzondacy midugigpi viaje

¹⁸ Jac-huäcxijp Pablo jecy jim Corinto. Chi yhuinma'ñypidacy co chonaani. Chi ycapxycijxni mid je mibijcpidijc, e chi ybarcotigiyñi ñicxni jim Siria ñaaxjot. Ñicxni quipxyi mid Priscila etz Aquila. Jim Cencrea, ca'ni anajty ybarcotigiyi, Pablo yajcöme'px cödza'm co anajty cuyduñ yhuandaacin. ¹⁹ Co ajcxy yja'ty jim Efeso, chi Pablo ñay'ixmajtz ajcxy mid Priscila etz Aquila, e ñicxy ma je judíoJay ajcxy ñaymujctac. Chi

m̄idm̄iydacy je judíoꝝäy ajcxy hūidi j̄im anajty ti ñayyöym̄újcigixy. ²⁰ Chi je judíoꝝäy ajcxy j̄im Efeso cohuan̄iy co huen jac-hui'my, e Pablo ca' a'ix̄iy co yhūi'm̄ipy. ²¹ Chi Pablo ycapxycijxni m̄id je Efeso jāy, chi ym̄inañ:

—Cop̄icy co j̄im x̄i nyajnaxa'ñyich Jerusalén, e nhuimbidiꝝyich jadüg'oc ma miich ajcxy, pen Dios jadu'n tzojcp.

Chi Pablo ybarcotiḡiy chooni j̄im Efeso. ²² Co anajty ti ypättiḡiy j̄im Cesarea, Pablo nicxy Jerusalén co anajty capxocxaangixy je m̄ibijcpidijc, chi mic'amy idaacni j̄im Antioquía. ²³ J̄im hueeni yhuäcxijpy, chi choñ jadüg'oc ñicxy cajp cajp ma Galacia ñaaxjot etz Frigia ñaaxjot jotmicm̄igapxcixy tüg'óc̄iy ȳi m̄ibijcpidijc.

Apolos Dios y'ayuc capxhuäcx̄i j̄im Efeso

²⁴ Huin'it tiempo yja'ty j̄im Efeso tüg jāy hūidi anajty yx̄i Apolos, hue' anajty ycoꝝáꝝp̄ity Alejan-dría. Ooy anajty oy ayuc capxhuäcx̄y. E yaxon nejhuiydāy Dios y'ayuc hūidi jaybety ijtp. ²⁵ Apolos ooy anajty ixp̄icȳity ma Huindz̄in Jesús y'ayuc e ooy yjotmiccapxy, oy anajty yaj'ixp̄icy nej je Huindz̄in Jesús yjajty y'ayoy. Oy jēda'ajty anajty janejhūiy nej Juan, je Bautista, jāy ajcxy yajn̄ibejty. ²⁶ Chi Apolos ytiḡiy capxp̄i miydaacp̄i ma je judíoꝝäy ajcxy ñaymujctac janch ni ca' chiḡiy chöyduñ. Chi co Priscila etz Aquila ajcxy m̄idooy Apolos y'ayuc, chi ajcxy yajn̄icxy ahuingujc, chi ajcxy oy yajm̄idm̄iydāgy jac-huädz Dios y'ayuc yt̄iy'ajt. ²⁷ Chi co Apolos anajty ñicxa'ñ j̄im Acaya ñaaxjot, chi je m̄ibijcpidijc jotmicm̄igapxy, e pube-jty ajcxy. Chi ajcxy nijaȳiy je m̄ibijcpidijc hūidi

ajcxy jim Acaya, huen ajcxy cöbigipy yajxon je Apolos. Co Apolos yja'ty jim Acaya ñaaxjot, chi ypubejti ooy pin anajty mibijcp Jesús y'ayuc, com Dios anajty may'ajt ti tuñ ma je' ajcxy. ²⁸ Chi je Apolos oy capxpídzimy mayjäy agujc co ca' yjanchity nej anajty ajcxy judíojäy yhuinmañ mĩdity, co Jesús ca' je' yjějity je Cristo. Je Apolos jim je' mic'ajt tzachpaady ma Dios y'ayuc ycojaayity co Jesús je' je' anajty je Cristo huĩdi anajty ajcxy y'ahuijxyp.

19

Pablo may mibijcpidijc minaybaati jim Efeso

¹ Jim Corinto anajty Apolos, co Pablo tegyi'm yajyöyñajxy mijyuugjot, chi oy yja'ty jim Efeso. Chi jim paty may mibijcpidijc. ² Chi Pablo y'amidooy je mibijcpidijc:

—¿Nej ti xy'adigiiy xyjottigiiy je Espíritu Santo taab ajcxy mmibijcy Jesús?

Chi ajcxy y'adzohuimbijty:

—Ni ngamidooyñi ñich ajcxy pen ji Espíritu Santo.

³ Chi Pablo y'amidooy ajcxy:

—¿Ti ñibejtin miich ajcxy mbaad?

Chi je' ajcxy y'adzooy:

—Je Juan, je Bautista, ñibejtin.

⁴ Chi Pablo yminañ:

—Juan jäy yajnibejt je', je' je' je' tıy'ajt co huen jothuimbijtcixy. E nimaaygixy anajty co huen ajcxy mibigipy je Cristo huĩdi jacmiinamni. Je' je' je' Jesús, je Cristo.

⁵ Co jada ajcxy jadu'n midoy, chi ajcxy oy ñibety mĩd je Huindzin Jesús yxi. ⁶ E co Pablo

cñixajy ajcxy, huin'it je Espíritu Santo y'adigiy yjottigiy ajcxy. Chi ajcxy ytigiiy capxpi miydaacpi tigachyjaty ayuc, e capxhuäcxy anajty ajcxy Dios y'ayuc. ⁷ Jëyi anajty nimajmetz yëydijctijc huidibi ajcxy nibejt.

⁸ Tugiiig po' Pablo jim yhuäcxijpy, e yöydiib anajty ma judíojäy ajcxy ñaymujctac capxhuäcxy Dios ytiy'ajt janch huinmic jotmic. Chi capxjotcidägy mayjäy müd Dios ytiy'ajt. ⁹ Nijëjity jotjuuñydic ca' ajcxy ymibijcy, jëyi ajcxy jibic tzachnigapxy Jesús ytiy'ajt ma jäy ajcxy yhuinduu. Chi Pablo puyöydúutcixni. Chi abicy yajnicxy je mibijcpidijc ma tüg escueltijc. Hue' je' je escuela huindzin anajty yxii Tirano, e jim Pablo Dios y'ayuc anajty capxhuäcxi jabom jabom. ¹⁰ Mejtz jimijt jadu'n jim chachyaj'ixpijcy, e tüg'ócüy jäy ma je Asia ñaaxjot ymidoday ajcxy je Huindzin Jesús y'ayuc, je judíojäy etz huidi ca' yjudíojäyity. ¹¹ E Pablo mayba'mjäy yajtzoocy müd Dios ymic'ajt etz ooy mijhuinma'ñ ytuñ. ¹² Ixti yajnicxy anajty ajcxy yhuít etz ypaayi huidi Pablo ñinicx anajty ti ypadyii, e yajpaatcixy anajty pa'mjäy, e je' anajty müd chooccixy, e nañ je' anajty müd ca'oybi ypidzimy ma jäy ajcxy y'ay yjot.

¹³ Chi nijëjity judíojäy huidi anajty huidijtp tzoymümbi, huidibi anajty yajpidzimgixyp ajcxy ca'oybi, jayajtzögaañ tüg pa'mjäy müd je Huindzin Jesús yxii co huen yajyöydüdyii je ca'oybi. Chi ajcxy nimaygixy je ca'oybi:

—Ich miich yam nimaayb müd Jesús yxii, je huidi Pablo ycapxhuäcxp, yajyöydüt jada jäy.

¹⁴ Jadu'n anajty y'iditczixy je Esceva ymang

ajcxy, je nihiuxtujcpi ajcxy. Je Esceva hue' je' anajty judíoꝝäy etz nihiundzin'aty teedy'adii. ¹⁵ Co je Esceva ymang ajcxy miꝑapx je ca'oybi, chi je ca'oybi y'adzooy:

—N'ix'atypich je Jesús, e nnejhuuybich pin je' Pablo, e miich ajcxy, ¿mbin miich ajcxy?

¹⁶ Chi je yëdyjc huidi ca'oybi anajty miid, ytiꝑꝑiꝑy tüꝑ ma je' ajcxy, ymiadactay je nihiuxtujcpi, e yqueectay ajcxy ma je tiꝑc nihuädz ixhuädz etz tzaachi. ¹⁷ Tüg'óciy jäy ajcxy huidi anajty tzinaayb jim Efeso, judíoꝝäy etz huidi ca' yjudíoꝝäyity nejhuyday ajcxy, chi ooy ajcxy chigiy e nimiꝑdaaccixy e cömaaygixy je Huindzin Jesús yxii.

¹⁸ E mayjäy huidi miꝑiꝑc Jesús y'ayuc ooy ajcxy ypocy nigapxtay, jadu'n nej anajty yi jibic mañ'ajt ajcxy ti mi'ijtcixy. ¹⁹ E mayjäy tiibi anajty capxy je mañ'ajt necy yajminday tüꝑ'óciy e no'ctay je necy ma jäy ajcxy yhuinduu. E co ajcxy maymujcy je libro tzou, chi naybaati jada' huixchiꝑꝑiꝑx majc mil plata meeñ (moneda mexicana naybaati jacnaxy jahueenjaty ycatüg miꝑo'px jamajcmocx tüꝑ mil). ²⁰ E je Huindzin Jesús y'ayuc niꝑi anajty yhuäcx'idich, niꝑi ymiꝑtiꝑiy'idich.

²¹ Co anajty jadu'n ti ytuñyii ti yjadyii, chi Pablo yhuinma'ñypidacy co niꝑcxy cogapxihua'ñ je miꝑiꝑcpiꝑc jim Macedonia etz Acaya. Chi anajty yjacniꝑxa'ñ Jerusalén e jadu'n ymiñañ co jim chondäga'ñ jadüꝑtecy e ñiꝑxa'ñ jim Roma. ²² Chi quejxy jim Macedonia mejtz je ypubejtpi, Timoteo etz Erasto. Chi Pablo je' yjac-hui'my jecy jim Asia.

Canay'ayuc-huinjihuühuü jim Efeso müd Dios y'ayuc ycixpi

²³ Huin'it tiempo tzip oy pidiñi jäy y'ocyumigni y'oc'oxigni müd Huindzin Jesús y'ayuc ycixpi. ²⁴ Co je', je plateri huüdi anajty yxii Demetrio, yaj'oyiy anajty ac plata Diana chajptijc'ung, e jadu'n anajty Demetrio etz jacjadyii jäy oy ymeeñybaatcixy müd je ytung. ²⁵ Chi Demetrio huomujcy ymügügtijc je huüdi jadu'mbi tung tumb, nimay ajcxy:

—Migügtijc, mnejhuüyb ajcxy co müd jadayaabi tung huüdi üch ajt nduunim, jada müd jotcuyc ndzinaayim njugy'ajtim. ²⁶ E müch ajcxy m'ijxpy mnejhuüyb co je Pablo chach yaj'ixpijcy co ca' yi' diosity huüdi jäy ajcxy yajcojpy. E Pablo ti ooy mayjäy capxjotcidägy, canan yaayi Efeso, nañ jadu'n ma tüg'óciy Asia naaxjot. ²⁷ Mij jada xyajtigoyaanim ma üch ajt n'adogii e nañ jadu'n je mijpi dios, je Diana, ytigoyipy, ca' ni pin oc-capxpaatnipy, je huüdi cham mayjäy y'ojadajtpy tüg'óciy ya Asia ñaaxjot etz huindu'my naax-huiñybi.

²⁸ Co jadu'n ajcxy midoy, chi ajcxy ooy yjotmätcooty, chi ytigüy ajcxy huambi jihuüyb, chachminaangixy:

—iCömay jada Diana, yi efesiojäy ydiosal

²⁹ Chi ajcxy yajhuinmäñydigoyday je cajp jäy e majch ajcxy je Gayo etz Aristarco, huüdi tzoon Macedonia, metz yëydijc, huüdi Pablo anajty ajcxy ymüd huüdiijtpy. Chi je cajpjäy ooy pahuijch pajugujcy ajcxy je Gayo etz Aristarco, yajnicxy ajcxy ma agujctijc huinduu ma jäy ñaymugyii. ³⁰ Chi Pablo yjatigihuaañ jäy agujc,

m̄idcapxa'ñ m̄idm̄iydäga'ñ anajty je mayjäy. E je m̄ibijcp̄idijc ca' ajcxy a'ix̄iy nicxy j̄iby ytiḡiy. ³¹ Nañ jadu'n nij̄ej̄ity Asia m̄ijtungm̄idp̄i hūidi anajty Pablo m̄id ñaym̄iḡüg'adyii, yajniḡuejxy ayuc, co ca' huaad ñ̄icxy ma jäy ñaym̄újciḡixy. ³² Je mayjäy tügm̄ucy anajty j̄itcixy, ooy anajty yhuaanḡixy yj̄ihūiyḡixy, ca' anajty ajcxy ñay'ayuc-huinj̄ihūiyḡixy. E je jacmaayb̄i ni ca' anajty nejh̄ūiyḡixy ti co chachnaym̄újciḡixy. ³³ Nij̄ej̄ity jäy hūidib̄i anajty ajcxy mayjäy agujc, je ajcxy yajm̄idm̄iydactay je Alejandro ti anajty tuun̄p̄ jajt̄p̄. Chi je judío jäy ajcxy tijp̄idz̄imy je Alejandro ma mayjäy agujc. Chi Alejandro c̄im̄id tiy'ajt yejcy co huen amonḡixy. Je' anajty ñ̄igapxt̄udamy judíojäy ajcxy. ³⁴ Co je mayjäy nejh̄ūiy co je' je' yjudíojäȳity, chi ajcxy ytiḡiy huaambi j̄ihūiyb̄i jahuenjaty ycamejtzhor̄ity, ym̄inaanḡixy:

— ¡Cömay ooy ȳi Diana, ȳi Efeso jäy ydiosa!

³⁵ Chi je cajp̄ jaayb̄i co anajty je jäy ti yaj'amoonḡixy hueeni, chi ajcxy nimay:

— Efeso jäy, tüg'óc̄iy ȳi naaxhuiñyjäy nejh̄ūiy co jada Efeso cajp̄ ȳi' cuend'ajtp̄ ȳi Diana chajpt̄ijc, je' Diana hūidi ooy ti yajcömay, etz ȳi Diana ñ̄inicx hūidi cä'u tzajpc̄ixy. ³⁶ Ca' huaad ni pin ym̄ina'ñ co ca' yj̄anch̄ity. Amonḡix, ca' ti md̄unḡixipy pen ca' jaȳj̄p̄ yajxon mh̄uinmaayḡixy. ³⁷ Com jada ȳeyd̄ijc ajcxy t̄ibi myajm̄iinḡixy, ca' ma ytundigooyḡixy, ca' ȳi' ma ajcxy j̄ib̄ic capxc̄ixy ma miich ajcxy md̄iosa Diana. ³⁸ Pen Demetrio etz hūidijaty m̄id ytuñ pen ym̄id x̄ihūin m̄id pinjaty, paady tungm̄idp̄i etz t̄iydundac j̄ij̄ity. J̄ebi nigapxy ma tungm̄idp̄i, j̄ebi miñ xyipy ñayñ̄igapxt̄úutiḡixy. ³⁹ E

pen huingbi ayuc huïdi miich ajcxy mbijctzooyb, copity jada y'oyihuipy ma jäy naymugyii. ⁴⁰ Ymiid jada ayo'n co nicxy nayyajxihuim co jäy cham ñaymihuididyii miid jada ycixpi nej yam ytunyii yjadyii e ni ti t'y'ajt ich ajt nganejhuim nej nmīnaanīm pen ji anajty xyaj'amidoohuim miid co jäy cham chachhuaangixy chachjihuiyigixy.

⁴¹ Co jadu'n miydactay, chi ycapxycijxy miid je naymujcpidijc.

20

Pablo ñicxy jim Macedonia etz Grecia

¹ Co je cajp jäy ycapxy'ayuc xeemy, chi Pablo huoomujcy je mibijcpidijc, e jaccapxhuijy ajcxy chi ycapxycijxni, chi chooni Efeso ñicxy jim Macedonia ñaaxjot. ² Cajp cajp Pablo oy co'ixiy je mibijcpidijc jaccapxhuijy ajcxy. Chi Pablo yja'ty jim Grecia ñaaxjot. ³ Chi Pablo yhuäcxijpy jim tugiig po'. Jim Grecia Pablo anajty ybarcotigihua'ñ ñicxa'ñ Siria. Co Pablo oy nejhuüy co judíojäy ajcxy ti yajnihuinmayiyii yaj'öga'ñyii barcojoty, chi yhuinma'ñybaty co huimbida'ñ tegyi'm, ñaxa'ñ jadüg'oc Macedonia. ⁴ Pablo mayjäy miid ñicxy, miidnicxy je Sópater huïdi anajty cogajp Berea, etz Aristarco, etz Segundo huïdi anajty cogajp Tesalónica, etz Gayo huïdi anajty cogajp Derbe, etz Timoteo, etz nañ jadu'n Tíquico, etz Trófimo huïdi tzoon jim Asia ñaaxjot. ⁵ Co jada mibijcpidijc ajcxy ñicxy jayijp, chi ajcxy xy'ahuijxyich jim ma je cajp huïdi xii Troas. ⁶ Co xii ñajxtay mina yajcaay je tzajcaagy je huïdi ca' miidity levadura, chi ich ajcxy ndzooni jim Filipos barcojoty. Co miigoox

xiiñi, oy ñich ajcxy naybáatigixy jim Troas. Jim ñich ajcxy yhuäcxijpy huixtujc xii.

Pablo co'ixiñy je mibijcpidijc jim Troas

⁷ Domingo xii ajcxy ñayyöymujci je mibijcpidijc chajcaagy ytujc-huäcxaangixy, e Pablo anajty ymigügtijc yjacyaj'ixpijcpy. Je' co anajty com jabom chonaani, paady oy ayuc jacyajyoñ ixti ycuje-hua'cxchumiiy. ⁸ Jiiby anajty canaag lámpara ytiicxy ma ajcxy anajty ti yöymujccixy ma tüg cuarto huidi anajty oy ycixity. ⁹ E tüg yeeg'anäg huidi anajty yxii Eutico, ma ventana aguu anajty y'iñäy. Com Pablo jecy oy yaj'ixpijcy, chi je yeeg'anäg ymäymajtzi, e tugüg nihuijtzpety anajty ycixity je tijc ma ycäy. Chi ajcxy yajpidigy ögy. ¹⁰ Co Pablo yminajcy, chi ñaygijxnajaji amineenmujcy je yeeg'anäg huidi anajty ti ycäy. Chi Pablo nimay ymigügtijc:

—Ca' mdzigiiygixy, juugy jada.

¹¹ Chi Pablo jadüg'oc ypejty ma je cuarto cixpi, chi chajcaagy tujc-huäcxy e yajcaay ajcxy, e jadu'n Pablo yjacmiydacy co oy xiiñiñy. Chi ycapxycijxni miid je' ajcxy, chi ñicxni. ¹² E je yeeg'anäg huidi anajty ti ycäy, chi ajcxy yajnicxy juugy, e ooy ajcxy yjotcugiy nidüg'óciy.

Choñ ajcxy Troas ñicxcixy Mileto

¹³ Chi ñich ajcxy jayijp nicxiigy barcojoty jim Asón co anajty jim nyajtzonáangixich Pablo, com ti anajty jadu'n miidnayñimáayigixich co je' tegyi'm anajty ñicxa'ñ. ¹⁴ Co ñich ajcxy naybaatti jim Asón, chi Pablo ybarcotigiiy miid ñich ajcxy. Chi ñich ajcxy ñicxy jim Mitilene. ¹⁵ Chi ñich ajcxy jim ndzoñ,

chi com jabom ñch ajcxy najxy mihuingon Quío, comaax ñch ajcxy nja'ty jim ma barco jättac huïdi anajty yxii Samos. Jim Trogilio ñch ajcxy nbocxy, com jabom ñch ajcxy nja'ty jim Mileto. ¹⁶ Chi Pablo ca' ñicxa'ñ jim Efeso co ca' yhuäcxiba'ñ jim Asia ñaaxjot, com tzojc anajty yjäda'ñ Jerusalén, com jim anajty yajnaxa'ñ Pentecostés xii.

Pablo yajmüdmüydacy je huïdibi ajcxy ane'mb je mibijcpidijc

¹⁷ Jim Mileto anajty Pablo, chi capxyñiguejxy huïdi ajcxy nigohuajc'ajtp je mibijcpidijc huïdi ajcxy jim Efeso. ¹⁸ E co ajcxy miiñ, chi Pablo yminañ:

—Miich ajcxy mnejhuüyb jadu'n nej ñch ti njäy'atyich ma miich ajcxy tüg'óciy je xii je tiempo nej oga'n nja'tyich ya Asia. ¹⁹ Jecy ñch ooy ti n'ityich müd miich ajcxy, nduñich ma nHuindzin Jesús ytung müd yung naxy njot nhuinma'ñich, etz müd huinnii jotmay, etz ti may ayo'n nyajnaxyich ma yi judíojäy ajcxy. ²⁰ Ca' ti n'ixmachich je ngapx'ayuc huïdi oyip müd miich ajcxy ycixpi. Ti nyaj'ixpicyich mayjäy'agujc etz tijc tijc. ²¹ Ti ndiy'ajt yecyich ma judíojäy etz cham ma huïdi ca' yjudíojäyity. Nnimaydaayich co huen jothuimbijtcixy ma Dios, etz huen mibijccixy ñch ajt nHuindzin Jesucristo. ²² Jadachambi nicxpich jim Jerusalén; adzip je Espíritu Santo xyquexyich e ni nganejhuüyich ti ñch jim xyjadamy. ²³ Co ñch cajp cajp ma nnicxyich, je Espíritu Santo xyajnejhuüybich co jim Jerusalén jäy ajcxy xypidäga'ñich pujxtigoty etz jim ajcxy xychaachytuna'ñich. ²⁴ Yi jadu'mbi

ayuc ca' ñich nduñich cuendi, jada njugy'ajtich ca' ti tzoohuity. Jëyi janchtiy co nyajcixipyich jada tung jotcuyc, e nguydunipyich je Huindzin Jesús y'ayuc, je tiibi xyajñibicyich jada tung. Ngapxhuäcxibich yi oybi Jesucristo y'ayuc ytiy'ajt jadu'n nej Dios may'ajt ti tuñ mïd jäy ajcxy ycixpi.

²⁵ E jadachambi nnejhuïybich co miich ajcxy ma ti ngapxhuäcxyich Dios y'ayuc, ca' miich ajcxy xy'ocjac'íjxcixni jadügtecy. ²⁶ Paady cham nnimäyich miich ajcxy, ca' ni ti ngo'adzohuipyich mïd miich ajcxy ycixpi. ²⁷ Com ti ngapxhuäcxyich ma miich ajcxy tüg'óciy je Dios y'ayuc je Dios yhuinma'ñ. Ni ti ayuc ni ti ytiy'ajt ti ngacoyüchich ma miich ajcxy. ²⁸ Naycuend'ájtigixy ci'm etz cuend'ajtcixy tüg'óciy jäy ajcxy huïdi yajmij'ajtp je Huindzin Jesús, jadu'n ajcxy nipaady nej tügpicy cöbixy, etz miich ajcxy huïdi nigohuajc'ajt je mibijcpidiyc jadu'n miich ajcxy nipaady nej cöbixy cuend'ajtpi. Je Espíritu Santo ti xyajñibíjccixy co mgüend'adipy ajcxy yi Jesús yjäy, huïdi ti cojuuy ajcxy ypocy mïd yci'mni'py co y'o'cy.

²⁹ Chi Pablo yjacmïnañ:

—Nejhuiybich co ya ndzónibich miinip huingbi jäy huïdi yajhuinma'ñydgoyam mibijcpidiyc, jadu'n nej ahua'n iyujc huïdi cöbixy tzüdzip. ³⁰ Ji ma miich ajcxy ji jäy yaj'ixpigam anii ma yjapadyii yaj'ixpigipy tiy'ajt oybi jigix yi mibijcpidiyc ypanicxiyb. ³¹ Naygüend'ájtigix, mjäymedziyb ajcxy jadu'n nej ñich tugüig jimijt ti nyaj'ixpicyich xim tzuum jabom jabom, mïd huinnii jotmay ti nyaj'ixpijccixy miich ajcxy nidüg nidüg.

³² Jadachambi ñich, nmigügtjicich ajcxy, Dios miich ajcxy nyajpuhuanñyb, nyajmihui'maamyich miich ajcxy Dios y'ayuc jadu'n nej Dios ajt xychojcm xyjihuiyim. Ma Dios y'ayuc miich ajcxy mbaadipy mic'ajt ma yi mibjcin, e mbaadipy ajcxy it lugar ma Dios quipxyi mñd ajcxy nidüg'óciy tiibi yajhuäch yjot yhuinma'ñ. ³³ Ni ti ñich ti nga'adzocy, ni pin yhuit ymeeñ huídibi n'ocjedñybich. ³⁴ Miich ajcxy mnejhuñyb co ti nduñich, mñd ngi'mgñich ci'm ti nnaymöyijich huídi nyajmayjajtpyich etz nañ jadu'n ti nbubetyich nmigügtjicich huídi ñich anajty mñd. ³⁵ ñich miich ajcxy ti nyajni'ixñygixy nej jëbi mdungixy, nej jëbi mbubéjtcixy migügtjic huídi pa'm'ijtp, etz huídi tijaty yajmayjajtp. Jäymedzi ajcxy je Huindzin Dios y'ayuc co ymínañ: “Jacjotcujc je' huídi yejcp, ca'ydi huídibi yajmooyb.”

³⁶ Co jadu'n ycapxtay, chi Pablo ycoxtinay'ahuñy mñd je' ajcxy, e mibjctzoy ajcxy Dios. ³⁷ Ytiñy ajcxy yaaxpi nidüg'óciy, e mineeñ ajcxy Pablo etz tzücx. ³⁸ Ooy ajcxy jihuiñy nej anajty ti ñimáayigixy ajcxy co ca' yjac'ixñyb ajcxy jadügtecy. Chi ajcxy oy najtzhuhuiñy jim ma barco.

21

Pablo ñicxy jim Jerusalén

¹ Co ñich ajcxy ngapxycijxy mñd je mibjcpidjic, chi ñich ajcxy nbarcotigñy, tiñy ñicxy ñich ajcxy jim Cos. Com jabom ndzooñich Cos ñicxy ñich ajcxy jim Rodas. Chi ñich ajcxy ndzooñ Rodas ñicx ñich ajcxy jim Pátara. ² Jim Pátara ñich ajcxy nbaaty

tüg barco huidi anajty najxp Fenicia ñaaxjot. Jim ñch ajcxy nbarcotigñy jadüg'oc, chi ñch ajcxy nnicxni. ³ Chi ñch ajcxy mmij'ijxy Chipre je naax mejy'agujcpi, anajty'amy je' yhui'my. Jacnicxy ñch ajcxy Siria ñaaxjot, chi je barco ytigñy ma yjättac jim Tiro co jim anajty chimydajc yajhuïma'ñ. ⁴ Jim ñch ajcxy nbaty jäy huidi anajty yajmij'ajtp Jesús, chi nmïdhuäcxijpich ajcxy huixtujc xñ. Je' ajcxy je Espiritu Santo yajnejhuïyï co Pablo ayo'n pada'ñ Jerusalén, paady ajcxy nimay Pablo co ca' huaad jim ñicxy. ⁵ Co huixtujc xñbi yca'pxy, chi ñch ajcxy ndzooni. E tüg'óciy mibijcpidijc müd y'ung ytöxyjic oy xytüjijphuohuïygixyich cajppa'. Jim ma mejypa' ngoxtinay'ahuïy ñch ajcxy, chi ñch ajcxy nmibijctzoy Dios. ⁶ Huin'it ñch ajcxy ngapxycijxni, chi nbarcotigñyñi ñch ajcxy e je mibijcpidijc yhuimbijtni ajcxy ma ytijc.

⁷ Co ñch ajcxy ndzooñ Tiro, chi nicxy ñch ajcxy Tolemaida. Jim ñch ajcxy ngapxpocxich je huidi anajty ajcxy mijpidaacp Jesús, e nmïdhuï'my ñch ajcxy jim tüg xñ. ⁸ Com jabom ñch ajcxy ndzooñ Tolemaida müd Pablo etz pinjaty ñch ajcxy anajty nmïd. Chi ñch ajcxy nja'ty jim Cesarea. E chi ñch ajcxy nicx ma Felipe ytijc, je huïdibi anajty capxhuäcxy Jesucristo ytïy'ajt je oybi. Je' je' huïdi tuun je nihuixtujcpi taabi ajcxy caayin uucin ya-jhuäcxy jim Jerusalén oga'n. Chi ñch ajcxy nhui'my müd je'. ⁹ Felipe midaax anajty ññx müdity, ca'ni anajty ajcxy ypijccixy. E je' ññx ajcxy anajty Dios y'ayucnajtzcapxñyipy. ¹⁰ Ti anajty ñch ajcxy jim nhuäcxiy canaag xñ co oy yjätty tüg ayucnajtz-capxñybi huïdi anajty yxñ Agabo, jim anajty ti

chooñ Judea. ¹¹ Chi Agabo y'oy xycogapxiygiy ma ñch ajcxy njättac. Chi Agabo Pablo yhuñ huijtzicci, e je' mïd ñaygïxojtz ñaydecyxojtzi, chi ymïnañ:

—Je Espíritu Santo jadu'n minamb co jim Jerusalén jadu'n judíojäy ajcxy cïxodza'ñ tecyxodza'ñ jada huñ yhuindzin, e nañ cïyega'ñ ajcxy ma huïdi ca' yjudíojäyity.

¹² Co jadu'n yajmïdoy, ñch ajcxy etz je Cesarea jäy ngohuanïy ñch ajcxy Pablo co ca' huaad ñicxy jim Jerusalén. ¹³ Huin'it Pablo y'adzooy:

—¿Nej co myaaxcïxy mïd ñch ycïxpi? ¿Nej ñch miïch ajcxy co njot nhuinma'ñ xyaj'amutzcïy? ñch nayyéjicïch mïd naygïxodzï naydecyxodzï, nañ jëbi n'ögïbïch jim Jerusalén mïd je Huindzin Jesús ycïxpi.

¹⁴ Co ca' ñch ajcxy mimadacy nicxy nyajhuí'ngïxyïch Pablo, chi ñch ajcxy n'amooni, chi ñch ajcxy ñayñïmaayi:

—Huen cuyduñ je Huindzin Jesús chojcin.

¹⁵ Co jadu'n yjajti, chi ñch ajcxy ndzonï ni'ixïy e chi ñch ajcxy nicxy jim Jerusalén. ¹⁶ Mïd nicxy ñch ajcxy nijëjity mïbijcpidijc huïdi tzoon Cesarea, e nañ tzooñ anajty tüg Chipre jäy huïdi anajty yxï Mnasón, jecyïp anajty jïjptigïyïñi jada mïbijcin e je' ñch ajcxy nicxy xyajjättägaangïxy.

Pablo oy cogapxiy Jacobo

¹⁷ Co ñch ajcxy nja'ty jim Jerusalén, chi je mïbijcpidijc ñch ajcxy xycöbijcy janch jotcujc.

¹⁸ Com jabom ñch ajcxy nicxy mïd Pablo, y'oy ñch ajcxy ngogapxiy Jacobo, e jim anajty tüg'ócïy

huidi nigohuajc'ajtp je mibijcpidijc. ¹⁹ Chi Pablo ymigügtijc capxpoxy, e yajmüdmıydacy ti anajty Dios ti tuñ müd yi' ma yi jäy ajcxy huidi ca' yjudíojäyity. ²⁰ Co ajcxy jadu'n midooy, chi ajcxy huin'ııy jäymejch yi Dios, chi ajcxy Pablo nimay:

—Migüg Pablo, miich mnejhuiıyb co ya canaag mil jäy ti mibıcy Jesús, e yjactımmınañ ajcxy co copıcy nguyduunım Moisés ycötujcin je jecyıp. ²¹ Ti ajcxy yajmüdmıydgııı co miich mdzachjäyyaj'ıxpıcy ma tüg'ócıy judíojäy huidi ajcxy jıguęy adzınaayb co ca' huaad tuñycuentı Moisés ycötujcin je jecyıp, etz ca' ycopıcyıty co tıy'ajttıygıxıpy y'ung, etz ni ca' ycopıcyıty payöyıpy ıch ajt ngostumbre. ²² ¿Ti huaad nduunım? Jotmädam ajcxy co nejhuiıııpy co ya miich ti mjäty. ²³ Hue' janchtıy jadu'n miich mdunıpy: cha mıdaax yęydıjc huidi cuydunamy tüg huandaacin. ²⁴ Müdnıcxy je' ajcxy, nıcx nayıajpocyñıhuaatzi müd yi' ajcxy, e miich mgojuydayıpy nej anajty ajcxy ypadyıı je meeñydunıı. E chi ajcxy myajcöme'pxıpy cödza'm, e jadu'n je jäy ajcxy huinjıhuiydähuıpy co ca' yjanchıty jadu'n nej xyñımydaaccıxy, jęyı co miich nañ jadu'n mguydun je Moisés ycötujcin je jecyıp. ²⁵ Huıdıbi janchtıy jadu'n nej yi huıdıbi ajcxy ca' yjudíojäyity, e ti mıjıpıdaaccıxy Jesús, ti ıch yi' ajcxy nijayıygıxıch co ca' tıngıxıpy cuentı jada jadu'mbı judíojäy ycostumbre. Je' janchtıy co ca' huaad tzützcıxıpy je tııbi jäy yajhuındzıgıy ídolos, ni ca' huaad jııcxıxıpy nı'py, etz ni ca' ajcxy tzüdıpy huıdi yo'c-huııdy ti y'ögy, etz ca' ajcxy huıngbı töxyjäy mıgapxtıgóoygıxıpy.

Chi ajcxy majch je Pablo ma Dios ytijc

²⁶ Chi Pablo m̄id nicxy je nimidaaxpi yēydijc, com jabom ajcxy nayyajpocyñihuaatzi ajcxy, chi ajcxy ytiḡiy ma Dios ytijc, e chi ajcxy ytiy'ajt jejcy ma judío teedy ti x̄i ycixa'ñ je nayyajpocyñihuädzi, etz ti x̄i huindzigi'ñ iyujc c̄yegaangixy nidüg nidüg.

²⁷ Ma anajty yca'pxaani je mihuixtujcx̄ibi nijējty judíoḡäy, chooñ jim Asia, chi ajcxy ijxy Pablo ma Dios ytijc. Huin'it ajcxy je mayjäy majch Pablo, yajhuangoty yajjihuiygoty, ²⁸ chi ajcxy yam chachminaangixy:

—¡Israel jäy ajcxy, pubejtcich ich ajcxy! Jada je' je yēydijc huidi x̄i ya tzach nigapxp ni'oj̄iyb judíoḡäy ycostumbre, Moisés ycötújc̄in, etz nDios ytijc. E jadüg nax ti yajtiḡiyḡixy griegoḡäy ma Dios ytijc, yajjibic̄iyḡixy jada it lugar huätzpi. (Com ca' ñigödúcyity nicxy griegoḡäy ytiḡiy ma Dios ytijc.)

²⁹ Paady anajty jadu'n yminaangixy je huidi ajcxy majtz je Pablo, com co ijxy ajcxy Pablo m̄idhuidity cajpjoty je Trófimo, huidi anajty cogajp Efeso. Hue' anajty tijcixy co Pablo ti m̄idtiḡiy Trófimo tzajtigoty.

³⁰ Tüg'óciy je cajpjäy yjotmätcottay, miiñ ajcxy poȳigy majch ajcxy je Pablo yajpidzimy tzajtigoty pahuijch pajugujcy. Chi ajcxy mic'amy aḡiy Dios ytijc. ³¹ Yaj'ögamyb anajty ajcxy Pablo. Chi je soldado huindzin ayuc midoy co tüg'óciy je cajp jäy ajcxy ti chachhuaangixy chachjihuiyḡixy. ³² Je soldado huindzin huodzonday ysoldado ajcxy, e chi ajcxy ñicxy poȳigy ma je mayjäy yhuaangixy yjihuiyḡixy. Co je mayjäy ajcxy ijxy miñ soldado

ajcxy m̄id yhuindz̄in, chi ajcxy ixmajch Pablo ca' ocjaccójxcixni. ³³ Co je soldado huindz̄in j̄im ja'ty, chi yajmajtz̄i je Pablo, ni'anēmdiy co huen c̄ixochyii m̄id mejtz cadena. Chi yajt̄iy p̄in je' ana-jty, e ti ti tuñ. ³⁴ Chi je mayj̄äy ajcxy ytiḡiyy huaambi j̄ihuñybi, e jadu'n je soldado huindz̄in ca' ni nej huinj̄ihuñy m̄id je ne'mbi. Chi ni'ane'mdiy co huen Pablo yajnicxyii ma cuartel. ³⁵ Co j̄im ya'ty ma cuartel pediydac, chi je soldado ajcxy c̄iȳgy Pablo, co anajty je mayj̄äy chachjottigoyñájxcixy tzachyaj'ögaangixy anajty Pablo. ³⁶ Tüg'óc̄iy je mayj̄äy pamiingixy axam je soldado ajcxy, yam chachm̄inaangixy:

—¡Huen ögy!

Pablo ñaygohuaani ma je mayj̄äy

³⁷ Co anajty yajt̄iḡihua'ñyii cuartel tigoty, chi Pablo migapxy je soldado huindz̄in m̄id griego ayuc, ym̄inañ:

—¿Nej j̄ëbi ii nm̄idm̄iydägy tüg'aa metz'aaji?

Chi je soldado huindz̄in y'adzooy:

—¿Nej m̄jajtpy miich griego y'ayuc? ³⁸ ¿Nej ca' jada' miich j̄ëjity je egipcio j̄äy huidi namni tzip yajpid̄icp, e huob̄idz̄imy m̄idaax mil j̄äy yaj'öcpi, m̄id nicxy ajcxy j̄im m̄ijt̄iḡiduum?

³⁹ Chi Pablo nimay je soldado huindz̄in:

—Ich judíōj̄äy ñch, j̄im ngogájpidyich Tarso, tüg m̄ijcayp huidi yajpatpi j̄im Cilicia ñaaxjot. Tun may'ajt miñ mayj̄äy n'ocmigapxich.

⁴⁰ Co je soldado huindz̄in a'ix̄iyy, chi Pablo ytinay'ahuñy ma je cuartel pediydac, e c̄im̄id ytiy'ajt yejcy co huen amoongixy. Co je mayj̄äy

ajcxy y'amonday, chi migapxcoty miid hebreo ayuc yminañ:

22

¹ —Migügtijc etz mij'anäctijc, midoogixy jadu'n nej ich yam nnayñigapxtüdyi.

² Co je mayjäy ajcxy midoy co ymigápxigixy miid hebreo y'ayuc, chi ajcxy y'amonday, chi Pablo yminañ:

³ —Judíojäy ich. Jim Tarso nma'xung'ajtyich, Cilicia ñaaxjot. E ya Jerusalén ti nyeegyich. Ixpjicich ya ma Gamaliel, etz yajxon Gamaliel ti xyaj'ixpjicyich ajt nmij'ap nmijteedy ytiy'ajt etz ycötújcín. Njatyim nyajmij'ajtpyich Dios jadu'n nej miich ajcxy Dios myajmij'ajtcixy cham. ⁴ Jecy ti n'ixhuidity ti nbahuidityich je jäy ajcxy huidi anajty mijpidaacp Jesús y'ayuc, nyaj'öctähuaamyich anajty, e nyajnicxpyich anajty mach yëdyjctijc etz töxyjäydijc, nbidägyich anajty ajcxy pujxtigoty. ⁵ Je teedy mjtungmiidpi etz tüg'óciy mij'anäctijc ymiid tiy'ajt, co ich ajcxy xymooyich cötujcín, e nnicxyich anajty jim Damasco ma nmigügtijcich yi judío jäy ajcxy. N'ixtäyich anajty je jäy ajcxy huidi Jesús y'ayuc mijpidaacip, madza'ñich anajty ajcxy, e nyajmiina'ñich anajty ajcxy ya Jerusalén huen yajtzaachytungxixy.

Pablo nimydacy nej yjothuimbijty

⁶ Co ich anajty ndüyöyich mihuington Damasco, cujc yxñ anajty, chi janch timitiini yticxgy jühuidity jadu'n nej jin ma ich, hue' anajty chooñ tzajpjoty. ⁷ Chi jim ngidaayich, huin'it nmidooyich

tüg ayuc xyñimäyich: “Saulo, Saulo, ¿ti co xypahuidijttägyich?” ⁸ Huin'it n'amidooyich: “¿Mbin miich, Huindzin?” Chi xy'adzooyich: “Fich je' je Jesús je huidi cogajp jim Nazaret, je huidi miich mdzachpahuidijttacpy.” ⁹ Pinjaty ñch anajty nmïd y'ijx je' ajcxy je tücxin, chi ajcxy ooy chigüy, e ca' ajcxy huinjihuüy je ayuc huidi anajty nmïgapxyijich. ¹⁰ Huin'it nnïmaayich: “¿Ti jëbi nduñich, Huindzin?” Chi je Huindzin Jesús xy'adzooyich: “Pidig e yajyöy mdu', nicxy jim Damasco, jim myajnimähüüyb tüg'óciy ti jëbi mduñ.” ¹¹ Je tücxin hue' je' xy'ixmajchich huuintz. E chi je nmïgügtjicich xyhuijtzoonich ajcxy cigüxy, xyaajja'tyich ajcxy jim Damasco.

¹² Jim Damasco anajty chinäy tüg yëydijc huidi anajty yxii Ananías, je huidi anajty ooy cuyduñ Moisés ycötújcïn je jécyp. E judíojäy ajcxy huidi jim tzinaayb ooy cömaaygixy co ooy y'oyjäyity. ¹³ Chi Ananías ymiiñ ma njättaacich, e ytinay'ihuüy ma ñch nmïc, chi xyñïmaayich: “Migüg Saulo, ijxigich jadüg'oc huinjemy.” Tim huin'ítiy n'ijxigiyich. ¹⁴ Chi Ananías xyñïmaayich: “Je Dios huidi ajt nmïj'ap nmïjteedy ojadajt, je' ti xyhuin'ixy jigix mnejhuïhuïpy Dios yhuinma'ñ, etz m'ixipy je tudäcypï jäy, e mmïdohuïpy yci'm ayuc huidi ycapxy. ¹⁵ Dios ti xyhuin'ixy jigix nicxy mdiy'ajt yecy ma tüg'óciy naaxhuïñyäj, etz mnimïydägipy nej ti m'ixy ti mmïdoy. ¹⁶ Jadachambi, ¿nej co mhüäcxipy? Pidig etz nïbet. Mibijctzou Dios jigix mbocy ñihuädzipy.”

Pablo nimïydacy nej oy yajquexy ma je huidibi anajty ajcxy ca'p yjudíojäyity

17 Co nicxnich jadüg'oc Jerusalén, chi nnicxich ma Dios ytijc, oy Dios nmibijctzooyich. Chi ñich jii by tzajtigoty n'ixmañyiyich. 18 N'ijxyich je Huindzin Jesús e xyñimaayich: “Pidzim ya Jerusalén mic'amy, ca' je Jerusalén jäy ajcxy cöbigipy miich m'ayuc jadu'n nej xyñigapxa'ñich.” 19 Huin'it n'adzooyich: “Huindzin Jesús, yi jäy ajcxy ñejhuñyb co ñich anajty nnicxich huen huidi judíojäy naymujctac n'ixtäyich yi jäy ajcxy huidi miich m'ayuc xymibijcip, ti nbidägyich anajty ajcxy pujxtigoty, ooy ñich ajcxy yi' ti ndzaachytuñ ti nga'oyduuñich. 20 Co ajcxy yaj'ögy je Esteban, miich mdumbi, huidi miich m'ayuc xycapxhuäcxip, jim ñich anajty nañ jadu'n yajpaady. E ooy njäygidacyich co ajcxy yaj'o'cy, ixti ngüend'ajtich je' ajcxy yjocxhuit huidi Esteban yaj'o'c.” 21 Chi ñich nHuindzin Jesús xyñimay: “Cham ñich miich nguexy jiguëgy it ma yi jäy ajcxy huidi ca' yjudíojäyity.”

Pablo, ma je comandante yci'am

22 E yabaad je mayjäy y'amido'ijty Pablo y'ayuc, chi ytigiy ajcxy huambi jihuiybi chachminaangixy:

—¡Huen öc yjiibi yëydijc! ¡Ca' huaad yjactzinäy!

23 Yam yhuaangixy yjihuiygyixy, yam yjocxhuit tzachjengixy, etz naaxhuaay tzachyujc-huijixy.

24 Chi je soldado huindzin ni'ane'mdñy co huen Pablo yajnicxyii cuartel tigoty, e ni'ane'mdñy co huen ci'adyii jigix nigapxip ti ti tuñ co je jäy ti ymibidigyii. 25 Ti anajty ajcxy cixojtcixy, e chi anajty ajcxy tzaachytunaangixy co Pablo nimay je capitán huidi anajty huinduy:

—¿Ti cötújcin miich ajcxy mïd co mdzaachytuna'ñ tüg romanojäy, ni ca' ajcxy jayijp mdiyduñ?

²⁶ Co jadu'n mïdooy je capitán, chi ñicxy oy yajnimäy je comandante:

—Ixcim nej mduñ yi jäy, com hue' yi' romanojäy.

²⁷ Huin'it je comandante ymijhuägy ma je Pablo, chi y'amïdooy:

—¿Nej janch co miich mromanojäyity?

Chi Pablo y'adzooy:

—Janch.

²⁸ Huin'it je comandante nimay Pablo:

—Meeñygyxy ñch jada nbaaty co naydijyijich romanojäy.

E chi Pablo y'adzooy:

—Ñich ti nmïbi'c'ajtich yi'.

²⁹ Mïd jëyi, je huïdibi' anajty ajcxy cï'adam je Pablo, chi puyöydúutcixni. Nañ jadu'n je comandante ooy ñay'adzigiyyi, mïd co cïxojch Pablo mïd cadena.

Pablo ma je judíojäy ajcxy yjuntitungixy

³⁰ Com jabom je comandante co anajty nejhuihua'ñ ti ycxipi co ti yxiyii je Pablo yi judíojäy, huen yajminagyii cadena ma Pablo yci'. Chi ane'my co yajhuomujci je teedy tungmïdpi etz je judío mij'anäctijc. Huin'it je comandante yajnicxy Pablo ma je huïndzindijc etz ixpicytijc anajty ti ñaymújcigixy.

23

¹ Huin'it Pablo yaj'ijxpejty je mayjäy huïdi anajty ti naysöymújcigixy, e chi ajcxy nimay:

—Migügtijc, Dios y'ijxpy ñejhuüyb nej ñich ti nduñ maabi nyeecpidzimyich, tudägy n'ityich ixti chambaadni.

² Huin'it je Ananías, je teedy mijtungmüdpí, ni'ane'mdüy Pablo co huen yaj'accojxígy. ³ Chi Pablo ymíñañ:

—¡Dios xychaachytunipy miich huídibi mnaybidaacip nej jihuüy ooy mdudägyjäyity, e ca' yjanchity! Paady miich m'ñäy ma cõtujctac jigix nyajtiydunipyich nej je ley y'ane'my. Chi mmidundigooy je ley co ti xyajcojxyiijich.

⁴ Je jäy ajcxy huídi anajty jim míñañ:

—¿Jadu'n miich mmigapxtigoy yí Dios ymijtungmüdpí?

⁵ Chi Pablo ymíñañ:

—Migügtijc, ñich ca' anajty nejhuüyich, pen yí je' Dios ymijtungmüdpí. Com jaybety jadu'n ma Dios ñecy: “Ca' huaad jibic mnigapxipy huídi tungmüdpí ma miich mjäy.”

⁶ Huin'it Pablo ijxy nejhuüy co jim juntí'joty mejtzpicy ixpicytíjc anajty jim, jim huídi saduceo y'ixpíjcín ymíjpidacp etz ñañ jadu'n jim huídi fariseo y'ixpíjcín ymíjpidacp, chi Pablo ymíñañ mic:

—Migügtijcich, fariseojäy ñich, ñañ jadu'n ndeedyich fariseojäy je'. Cham nyajtyduñich müdpí jégixpi co nmibicyich co Dios yajjugypigipy jäy tiibi y'öccixy.

⁷ Co Pablo jadu'n ymíñanday, chi fariseojäy etz saduceojäy miñ xyípy ajcxy ca' ñay'ayuc-huinjihuüyí. Chi je naymujcpídjic ajcxy ñaybijc-huäcxi. ⁸ Je' co je saduceojäy ymíñaangixy co o'cpi ca' yjugypigipy, ni ca' jí ángel ajcxy, ñañ ca' jäy

y'alma, nañ ca' ji je Espíritu Santo, etz ni ca' ji mujcu' ajcxy. Je fariseojäy ymibijcxy je' ajcxy co yjiiñity ángel ajcxy, co öcpi jugypigaangixy, co je Espíritu Santo yjiiñity, co jäy ajcxy müüñity y'alma, etz co mujcu' ajcxy yjiiñity. ⁹ Tüg'ócixy jäy ajcxy ma je naymujctac ytiñiy huambi jihuñybi. Chi nijëñity fariseojäy huñdi nihuindzin'ajtpy je Moisés ycötújcín nīgapxtuty Pablo ymínañ:

—Jadayaabi jäy ca' ti pocy ti tuñ. Ca' yjecyity ti jada' ymīgapxyii tüg espíritu o tüg ángel.

¹⁰ Chi je mayjäy anajty ooy mic ti ñayyajot'ambijcixy. Je soldado huindzin tzigñiyb anajty co Pablo y'ahuoonñihuñyb y'agidziñihuñyb, paady ni'ane'mdiy huen yi soldado ajcxy yajpidzimgixy juntijoty e yajñicxixipy yi Pablo jadüg'oc ma cuartel.

¹¹ Huin'it coodz ñayguëñici je Huindzin Jesús ma Pablo ymijc, nimaayí:

—Jotmicpic Pablo, com jadu'n nej ya Jerusalén ti xyñigodiy'ajt'átyich, nañ jadu'n xyñigodiy'ajt'adipyich jim Roma.

Ixtaaygixy huinma'ñ nej huaad Pablo yaj'öccixy

¹² Com jabom nijëñity judíoñy ñaygapxi co yaj'ögaangixy Pablo. E chi ajcxy capxycödujcy ñay'ñbojci ñaygapxpojci co ca' ycayaangixy y'ügaangixy ixti cooni ajcxy yaj'öccixipy Pablo.

¹³ Nihuixchiguïpx naxy anajty yëyñijctijc huñdi ajcxy jadu'n naygapxi. ¹⁴ Chi ajcxy ninicxy je teedy ajcxy huñdibi mijtungmüñd etz judío mij'anäctijc, nimay ajcxy:

—ñich ajcxy ti ngapxycödujccixy co ca' ngayáangixyich n'ügáangixyich ixti cooni ñich ajcxy

nyaj'öcíp Pablo. ¹⁵ Jadachambi miich ajcxy, etz jacyadyii ixpicytije mij'anäctije nidungiiygixy ma je soldado huindzin, co huen jabom yajminyii Pablo jadügtecy ma miich ajcxy. E aanidaaccixy co jacyajxon yajtiyduna'ñ, e ni'ixí ñich ajcxy anajty n'ijtcixy co Pablo nyaj'ögibich ca'ni anajty yjaty ma naymujctac.

¹⁶ Pablo chi' ymang nejhuüy nej je' anajty ti ñaygápxigixy, chi ñicxy ma cuartel oy Pablo yajnimäy. ¹⁷ Huin'it Pablo yaaxi tüg soldado huindzin, e chi nimay:

—Yajnicx jada yeeg'anäg ma je comandante, ymiid yi' ayuc ti nigapxaamy.

¹⁸ Chi je soldado huindzin yajnicxy je yeeg'anäg ma je comandante, e chi nimay:

—Pablo, je machyjäy, ti xyaaxyich, ti xyñimäyich co nmidminipyich jada yeeg'anäg, ymiid yi' ayuc huidi ñigapxaamy ma miich.

¹⁹ Chi je comandante majch je yeeg'anäg ma yci', e yajnicxy abicy, chi yaj'amidooy:

—¿Ti xyajnimähuaamyich?

²⁰ Chi je yeeg'anäg yminañ:

—Yi judíojäy ajcxy ti ñaygápxigixy co xyñimähuaangixy co jabom Pablo myajnicxipy jim ma ñayyöymugáangixy, y'aanidägaangixy co jacyajxon tiydunaangixy. ²¹ Ca' miich yi' mmibigipy; com nihuixchiguipx naxy yëydijctije jim yi' ajcxy ahuixy yüch. Ti capxycödujccixy co ca' ajcxy ycaya'ñ y'üga'ñ ixti cooni ajcxy yaj'ögipy je Pablo. Jadachambi ni'ixí jim y'ijtcixy, jëyi miich m'ayuc ajcxy xyjamidohuaani, pen mni'adzooyb.

22 Chi je comandante ycapxycijxy m̄id je yeeg'anäg. Chi nimay co ca' huaad ymiydägy m̄id jacpinjaty jadu'n nej anajty ti ymiydaaccixy.

Yajnicxy ajcxy Pablo ma je gobernador Félix

23 Chi je comandante yaaxi metz capitán moy cötújcin huen nayñi'ixiiyigixy nimejtzmigo'px soldado huidi nicxip tegyi'm, etz tugi'pxmajc huidi nicxip cohuaaygixy, etz mejtz migo'px quipyjijpxu'ñm̄idpi, huen nicxcixy jim Cesarea mijcoodz. 24 Nañ ni'ane'mdiy co huen cohuary ni'ixi pidägyii huidi Pablo yaj'iñahuipy, e moy cötújcin co huen oy yajxon ajcxy Pablo yajjädipy ma je gobernador Félix. 25 Chi yajmiguejxy tüg necy yaayity jadu'n:

26 “Ich comandante, Claudio Lisias, cham nguejxyich jada necy ma miich, mijpi gobernador Félix, e nguejxpyich capxpooocxin. 27 Je judíojäy ajcxy ti anajty majtzcixy jadayaabi yëydijc, yaj'ögamy anajty ajcxy co ich oy nejhuüy co je' yromanojäyity, chi nninixich m̄id soldadtijc etz nihuaañich. 28 Co ich ooy anajty nejhuühua'ñich ti anajty co ti xigixy, chi nyajnicxich ma anajty ajcxy tungm̄idpi etz mij'anäctijc ti ñayyöymújigixy. 29 Hue' anajty yi' ycipi ti yajxiy co anajty ti ytundigooy ma yi' ajcxy ycötújcin. Ca' anajty ytiy'ajtity co yaj'öccixipy, e ni ca' huaad ymach'iñäy. 30 Co ich oy nejhuüy co yi' judíojäy anajty ti nihuinmayiygixy co yaj'ögaangixy, cham ich miich yi' nyajnigüexy. E ti ich nañ jadu'n nimay huidi ti yxiyii huen nicxcixy ma miich, e jëbi ajcxy jim nigapxy ti ycipi co midzip'ajtcixy. Ji naybaatim.”

³¹ Je soldadtijc nej anajty ti ycötújcín möyii tim huin'ítiiy miiid tzoón je Pablo mijcoodz ixti yajja'ty ajcxy Antípatris. ³² Je soldadtijc huidi ajcxy tegyi'm nicxp, com jabom huimbíjtcixni, chi yjá'tcixni ma cuartel. E je soldadtijc cohuaygixpi jacnicxy je' ajcxy miiid Pablo. ³³ Co je' ajcxy yja'ty jim Cesarea, chi ajcxy je gobernador necy yajc'idigiiy, chi ajcxy nañ jadu'n yajquëxigý je Pablo ma je' yhuinduu. ³⁴ Co ñecy capxtay, chi je gobernador y'amidooy Pablo ma anajty yconaaxity. Co nejhuüy co yCiliajäyity, ³⁵ chi nimay:

—Jiini nejhuühuibich je tiy'ajt co anajty miingixy huidi ti xyxigixy.

Huin'it ni'ane'mdiy co huen cuend'adyii ma je Herodes ymijtijc.

24

Pablo ñaygohua'ñyii ma je gobernador Félix yhuinduu

¹ Co migoox xii Ananías je teedy ajcxy ymijtungmiiidpi yja'ty jim Cesarea miiid judío mij'anäctijc ajcxy etz miiid tüg huingapxpi huidi anajty yxii Tértulo, chi ajcxy ñayguëxici ma gobernador co xihuaangixy Pablo. ² Co ajcxy Pablo yajmiñ, chi Tértulo ytigiiy xibi, nimay Félix:

—Miiid miich ycixpi jotcuyc je naaxcajp y'ijty, ca' ma tzip, je' co yajxon m'ane'mdäy miiid oyhuinma'ñ. ³ Tüg'óciy iich ajcxy njäygidacpyich hueñyama'amyity, miich mijtungmiiidpi Félix. ⁴ Ca'ydi mdiempo nyajtigooyi mij, tun may'ajt amido'ijtigich n'ayuc tüg jaxigyi. ⁵ Com ti nnejhuüygixich co jada Pablo, ooy ayo'n yecy

hueñytimma'ámyity. Xi ya judíojäy tzach pijc-huäcxy mïd y'ayuc huïdi ymïd. Yi' je' nigohuajc'ajtp tüg pïcy jäy huïdi jäy ytijpy Nazaret jäy. ⁶ Com tundigoy ma ïch ajcxy nDios ytïc nej ca' ypanyi, chi ïch ajcxy nmajch, e chi ïch ajcxy njatïydunaañich jadu'n nej ïch ajcxy ngötújcïn y'ane'my. ⁷ Per je comandante Lisias je' yajtigiyïy mïctägy, chi ïch ajcxy xypïci jada Pablo. ⁸ E Lisias ymïnañ co pinjaty anajty ti yxïyïi huen miiñ ma miich. Miich ci'm jëbi myajtiïy, e mnejhuïhuip tüg'óciy je tiy'ajt jadu'n nej ïch ajcxy yi' ti nxïy.

⁹ E je judíojäy ajcxy huïdi anajty jim gobernador yhuinduu, ac jadu'n ajcxy ymïnaangïxy co yjanchïty jadu'n nej Tértulo ymïnañ. ¹⁰ Huin'it je gobernador tiy'ajt moy Pablo cïmïd co huen capxy, chi Pablo ymïnañ:

—Janch jotcujc jëbi nayñïgapxtüdyiïjich ma miich Félix, com nejhuïybich co miich mïjtungmïd ma jada naax cajp cham xi jimïjt ñïcxni. ¹¹ Miich ci'm jëb mnejhuïy je tiy'ajt, jëyi anajty ñimajcmetzxïjïy maabi anajty nbättigiyïch jim Jerusalén Dios ojadajtpi. ¹² Ca' ïch yi' ajcxy xypaty ndzipcapxy n'ahua'ngapxyïch mïd pinjaty. E ni ïch ngajäy'axiigïy ngajäy'agapxiy ma Dios ytïc, etz ni ma naymujctac etz ni ma Jerusalén cajp. ¹³ Jada jäy ajcxy ca' ajcxy mïdity pinjaty tiy'ajt yegïpy nej ïch yi' ajcxy yxïy. ¹⁴ Huïdi janch ngapxypïdzïmybich ma miich jadu'n nej je tzïnaayïn, je jemybi ixpïjcïn huïdibi yi' ajcxy ytijpy ca' y'óyity, je' je' je' ixpïjcïn huïdi ïch mïd n'ojadajtpïch Dios, je Dios huïdi ïch ajcxy nmïj'ap nmïjteedy y'ojadajt. Nmïbijcpyïch tüg'óciy

jadu'n nej yjaybetyity ma Moisés ñecy, etz je Dios y'ayucnajtzcapxiiybi ñecy. ¹⁵ Nañ nmibijcpich co Dios yajjugypigipy pinjaty ti y'ögy, tiiibi oybi tuñ etz tiiibi jibicpi tuñ. ¹⁶ Paady ycixpi naymijottigoyiijich co njothuinma'ñich huädz ooy nmiid'idipyich ma Dios etz ma jäy.

¹⁷ Canaag jimijt iich anajty ti nhuidityich huingduum, chi nhuimbijtyich ma iich ngajp limosna cuejtp etz nhuindzigihua'ñich anajty Dios. ¹⁸ Jadu'n iich anajty nduñ co nijëjity judíojäy xypatyich ma Dios ytijc huidi anajty tzoomb Asia ñaaxjot. Ti anajty naybocyñihuächyijich, ti anajty nguyduñich costumbre, ca' anajty mayjäy pin yhua'ñ yjihuüy. ¹⁹ Je jäy ajcxy huidi xy'ijxyich ma Dios ytijc, je' ajcxy ixypy ti ymiingixy ya t'y'ajt yejcp. ²⁰ Co ca' ajcxy ti miiñ, huen jada jäy ajcxy huidi ya nigapxcixy pen ypaat ajcxy nbocyich je taabi ajcxy xytiyduñich ma judío jäy tungmiidpi etz huinmij'anäctijc ajcxy ñaymujci. ²¹ Jëyi co iich mic ngapxyich juntijoty, chi nminaañich: “Xytiydumbich miich ajcxy cham miid co nmibicyich co Dios yajjugypigipy pinjaty ti y'o'cy.”

²² Co Félix jadu'n midodaay, com ñejhuiydaayb anajty nej tüyöy je mibijcpidijc y'ayuc yhuinma'ñ, chi capxhui'my je ayuc, nimay ajcxy:

—Co anajty miiñ je comandante Lisias, huin'it njacnejhuiydähuibich nyajtydigihuibich miich ajcxy m'ayuc.

²³ Huin'it Félix ane'mdiy je capitán co huen yajcuend'aty yi Pablo, e huen a'ixihuip co pidzim

tibiñ tibäy e pen ji ymīgügtijc miiñ co'ixihuañyii, huen möyii huidi yajmayjajtpy.

²⁴ Ti anajty xii ñajtninixxiyñi co Félix jadüg'oc miiñ miid ytöxyijc Drusila. Je Drusila judíojäy je' anajty. Chi Félix capxyñiguejxy Pablo huen miiñ miidmiydägyii nej jäy miibicy Jesucristo. ²⁵ E co Pablo yajnimay je tiy'ajt nej Dios tzocy co huen jäy tudägy tzinäy, etz yajnimay jadu'n nej Dios jiini jäy tiydunañ tüg'óciy, chi Félix ñay'adzigiyyi, ymínañ:

—Nixx miich jadachambi, co iich anajty xyñibadíyigixy huin'it nicxy nyajhuooyii.

²⁶ Nañ jadu'n Félix y'ahuijxpy anajty mina Pablo y'ocmeeñmöyii, e huin'it anajty najtzmazihuañ. Paady anajty janam jadojoc nicxy yajhuoyii, e miid miydägy anajty. ²⁷ Mejtz jimijt jadu'n yajty, huin'it Félix ygobernadorbidzimy. Chi Porcio Festo ygobernadortigiiy ma Félix anajty ytuñ. Co Félix anajty nayyajhuí mañyii ooy miid je judíojäy ajcxy, paady ixmajch Pablo mach.

25

Pablo ma Festo yhuinduu

¹ Jadu'n yajty co Festo anajty ti ygobernador tigiiy, chi codugiig xii choñ Cesarea, ypättigiiy Jerusalén. ² E jim Jerusalén je teedy mijtungmiidpi etz nijējity huinmij'anäctijc jactimxiy Pablo ma Festo. ³ Chi ajcxy may'ajt pijctzoy ma je gobernador Festo co huen quexy Pablo jim Jerusalén. Hue' anajty ti huinmaaygixy co yaj'ögaangixy tü'am. ⁴ Chi Festo y'adzooy co Pablo cuend'aty anajty y'ity Cesarea, e je' anajty nicxañ janch tim tzojoc jim. ⁵ Chi ajcxy nimay:

—Jëbi nijëjity miich ajcxy mdungmüdpidijc etz huinmij'anäctijc quipxy nícxibich müd üch. Pen ti je Pablo ytundigooy jëbi miich ajcxy mxíy jim Cesarea.

⁶ Festo jëyi jim y'ijty tuctujc xii taxtujc xii Jerusalén, chi yhuimbijtni Cesarea. Com jabom ñicxy ma tiydundac, huin'it capxyñiguejxy Pablo co huen yajminy. ⁷ Co Pablo ytigíy ma tiydundac, chi mic'amy je judíojäy ajcxy yjübigíydäy huidi anajty ti choongíxy jim Jerusalén. Chi ajcxy oyxíy Pablo co mij anajty ti ytundigoy. E ca' ni ti tiy'ajt ajcxy miguëxígy. ⁸ Chi Pablo ñaygogapxi yminañ:

—Íich ca' ni ti ndundigooyich, ni ngamidundigooyich yi judío jäy ycötújcín, etz ni ngamidundigooyich Dios ytijc, etz ni ngamidundigooyich je mij'ane'mbi jim Roma.

⁹ Co Festo anajty jatytimyajcömaya'ñ ma judíojäy ajcxy, chi y'amidooy Pablo:

—¿Nej mnicxam jim Jerusalén, jigix jim ndiydunípiy?

¹⁰ Chi Pablo y'adzooy:

—Cha üch cham ma je cötujctac huidi je romano codung y'ane'myb e ma jëbi yajtiyduñich. Yajxon miich mnejhuíy co ca' ti ti ndundigooyich ma yi judíojäy ajcxy. ¹¹ Pen ti ndundigooyich huidi jëbi co'ögíyich, ca' nminá'nibich co üch ca' n'öga'ñ. Pen ca' ji ni ti tiy'ajt jadu'n nej yi' ajcxy ti yxíyich, ni pin cötújcín camíidity nicxy xycíyecyich ma yi' ajcxy. Íich nbijctzoy co nyajtiyduñich ma César, je emperador, jim Roma.

¹² Co Festo capxyöyday müd ymidungmüdpi, chi nimay Pablo:

—Pen miich jadu'n m̄namb co j̄im n̄icxy myajtiyduna'ñ ma je César yc̄otujctac, nguexipyich miich j̄im. Miich ti mb̄ijctzoy co je emperador xyt̄iyduna'ñ. Pis j̄im m̄nicxipy miich.

Pablo ma je rey Agripa yhuinduu

¹³ Chi ȳi x̄i tiempo ñajtz̄n̄nicx̄iȳiñi co je rey Agripa etz Berenice ycidacy Cesarea, cogapx̄ihua'ñ anajty Festo. ¹⁴ Co ajcxy j̄im yhuācx̄ijpy canaag x̄i, chi Festo yajm̄idm̄iydacy je rey Agripa je Pablo ayo'n, e n̄imay:

—Ji t̄üg ȳeyd̄ijc hūidi Félix y'ixmajtz mach. ¹⁵ Co n'oyich j̄im Jerusalén, chi je teedy m̄jtungm̄idpi etz judío m̄j'anāct̄ijc xym̄ix̄iȳich, nib̄ijctzohūiy co Pablo nyaj'ögibich. ¹⁶ Chi n'adzooyich co romanoj̄äy ca' c̄ot̄újc̄in jadu'n m̄id̄ity n̄icxy yaj'ögy ȳi machȳäy ma ca'ni ñayhuind̄ināayiḡixy m̄id je hūidi m̄id ñayx̄iyi, jiḡix ñaygogapx̄iyb nej anajty ti yx̄iyi. ¹⁷ Paady co je judioj̄äy ajcxy y'oy ya ca' n̄igoob tiempo nyajt̄igooyich com jabom n̄icx̄ich ma nḡotujctaac̄ich, e nni'ane'm̄d̄iȳich co huen yajm̄iñȳi je Pablo. ¹⁸ Co ajcxy ñaygūex̄i'ci, je hūidi anajty ti x̄iy, ca' jac ni ti ayuc anajty ajcxy m̄id̄ity jadu'n nej ñ̄ch anajty ti ndijȳich. ¹⁹ J̄eyi janchtiy co jadu'n anajty ym̄inaanḡixy co Pablo ti ytund̄igooy ma ȳi ajcxy ycostumbre huinma'ñ, etz Pablo capx̄huācx̄y co je Jesús hūidi o'c, juugyñi je'. ²⁰ Com ñ̄ch ca' nnejhūiy nej ndun̄ip̄ich m̄id jada jadu'mbi huinma'ñ, chi n'am̄idooyich Pablo, pen n̄icx̄am anajty Jerusalén, jiḡix j̄im ngatiyduñich m̄id j̄adayaabi ycx̄ipi. ²¹ Pablo ci'm̄ m̄inañ co n̄iḡi oy yajtiydun̄ipy j̄im ma je emperador hūidi ane'm̄ j̄im

Roma. Chi nni'ane'mdiiyich co huen jacmach'iñäy, ixti cooni nguexipyich jim Roma ma César.

²² Chi je rey Agripa yminañ:

—Nañ ooy ich nja'amido'idaani Pablo y'ayuc.

Chi Festo y'adzooy:

—Jabom jëbi ayuc midohuipy.

²³ Com jabom miiñ Agripa etz Berenice miid mayjäy etz xuuxpidijc, chi ytiigiiy ajcxy ma tiydundac miid je soldado huindzin ajcxy, etz huinmij'anactijc. Chi Festo capxyñiguejxy co huen Pablo nicxy yajtzonyii. ²⁴ Chi Festo yminañ:

—Rey Agripa, etz tüg'óciy mij'anactijc huindzindijc huidi ya ti mnayyöymújcigixy miid ich ajcxy, cha je' je yëydijc huidi oy yi judíojäy ti yxiyii ma ich. Xymixiyich jim Jerusalén, e nañ ya Cesarea, e jatymyminaangixy co jëbi y'ögy. ²⁵ Ca' ti ti tundigooy, paady ca' huaad nyaj'ögyich. Com ti ci'm ñayñibijctzohuüyii co jim yajtiyduna'ñ ma je emperador jim Roma, paady ti n'a'ixiyich co nguexaañich. ²⁶ E com ca' ni ti tiy'ajt nej nijayihuibich nhuindzinich, je emperador César, miid yi' ycixpi, paady nyajmiiñich ma miich ajcxy, etz tim jayijp ma miich mhuinduu, rey Agripa, jigix jëbi m'amidohuipy e nmii'd'idipyich ti ii njáayibich. ²⁷ Ca' jadu'n y'óyity nicxy nguexyich tüg machyjäy jim ma je mij'ane'mbi e ca' ni ti tiy'ajt miidity nej ti yxiyii.

26

Pablo nimiydägy nej anajty yjatyin ma je rey Agripa

¹ Chi je rey Agripa nimay Pablo:

Nej anajty Pablo jay'ip'aty mibijcp'idijc ixhu'idity pahu'idity

⁹ Jecy'ip i'ich hue' ndijy'ich oy nduñ'ich co anajty ndzachmidzip'adyi'ijich je Jesús je Nazaretpi. ¹⁰ E jadu'n nduñ'ich jim Jerusalén. M'iid je teedy m'ijtungm'iidpi ycötú'jcin nbidaacich Jesús yj'äy may pujxtigoty. E co ajcxy yaj'o'cy, nañ nigapxpejt i'ich co huen yaj'öccixy. ¹¹ E nnicxy'ich anajty majaty judío ñaymujctac jim ndzaachytuñ'ich hu'idi ajcxy m'ijpidacp anajty Jesús, jigix ajcxy y'ixmadzipy je' ymib'ijcin co Jesús je' je' je Cristo. N'igi anajty nm'ijotm'atcooty'ich ixti nbahu'idi'jtacy'ich huing-naax huingajp.

Pablo nim'y'dägy jadüg'oc nej yjothuimbijty

¹² M'iid yi jadu'mbi huinma'ñ nnicxy'ich anajty jim Damasco. Je teedy m'ijtungm'iidpi anajty xyquejxp'ich, e xymöy'ich anajty cötú'jcin. ¹³ E tü'am, señor rey, i'ich anajty nicxy, cujc xi anajty co n'ijxy'ich tügi t'icxin jacmic ca'ydi xi yt'icxin chooñ tzajpjoty, xyñigidacy'ich etz nañ jadu'n hu'idi anajty ajcxy xym'iidnicx'ich. ¹⁴ Huin'it nidüg'óc'iy i'ich ajcxy ng'idaday, e nmidooy'ich t'üg ayuc xym'igapx'ich m'iid hebreo y'ayuc, xyñimäy'ich: "Saulo, Saulo, ¿nej co chach xypahu'idi'jtägy'ich? Ci'm nayyajtzaach'iyii jadu'n nej huaj yuub co j'ijpconeb'iy hu'idi m'iid ñumygyumyii." ¹⁵ Huin'it n'adzooy'ich, nnimaay'ich: "¿Mbin miich Huindzin?" E je Huindzin xyñimaay'ich: "I'ich je' Jesús je hu'idi miich mdzachpahu'idi'jtacy. ¹⁶ Pid'ig e t'inaaygugi', com ti n'ayguëx'igyii'ijich ma miich jigix xym'idun'ipy'ich etz mgod'y'ajt'ad'ipy jadu'n nej cham ti nyajnimäy ti nyajnejhu'iy, etz

jadu'n nej jiini njacyaj'ixa'ñ njacyajnejhuïhua'ñ. ¹⁷ ðich miich nnihuänip nyajtzögip ma yi judíoäy, etz nañ ma huïdi ca' yjudíoäyity. ðich miich jim nguejxpy ma huïdi ca' yjudíoäyity. ¹⁸ Nicx jim myajhuinjihuïygixy ðich ndiy'ajt, huen ixmach ajcxy yi jibic-huinma'ñ e jadu'n ypidzimipy ajcxy ma je mujcu' y'ané'migixy, etz mijnicxpedipy ajcxy Dios ytiy'ajt. Co ajcxy mibigipy mijpidägipy ðich ndiy'ajt huin'it nmöhuibich tigiydac tzajpjoty ma yi oyjäydijc ity tibi Dios yajpocynïhuächyii."

Pablo cuyduñ nej anajty ti y'ijxmañiyin

¹⁹ Rey Agripa, jadu'n ti ngapxymidooyich huïdi n'ijxich nmidoohuich tzoön tzajpjoty. ²⁰ Jayijp ngapxhuäcxich Dios y'ayuc jim Damasco, chi ngapxhuäcxich jim Jerusalén etz tüg'óciy Judea ñaaxjot, etz cham ngapxhuäcxich Dios y'ayuc ma huïdi ca' yjudíoäyity. Nyajnimáaygixyich huen jothuimbijtcixy, huen mibijccixy Dios y'ayuc ytiy'ajt, etz huen yajtungixy oyjot oyhuinma'ñ jigix ñiguëxigipy co ti yjothuimbijtcixy. ²¹ Mïd jada ycixpi xymajchich ajcxy je judíoäy ajcxy ma Dios ytijc, e xyaj'ögängixyich anajty. ²² Mïd co Dios ti xypubety ti xypudigiyich cha nyajpaadyich juugy. Ngapxhuäcxych Dios y'ayuc ytiy'ajt ma tüg'óciy ayoobtjic etz ixpicytijc. Tüg'óciy huïdi ngapxpyich je Dios y'ayucnajtzcapxïybi jaay jecy'ajty, etz je Moisés nañ jadu'n jaay jecy'ajty co jadu'n ytuna'ñyii yjada'ñyii. ²³ Hue' yajmina'ñ co je Cristo copicy ayo'n tzaachypi yajnaxipy, e y'ögipy e huin'it jugypigipy, e je' je' je jayijp jäy huïdi jugypigip co anajty ti y'ögy. E yajcapxhuäcxip je

ayuc ytiy'ajt ma ñich ajcxy judíojäy, etz ma huidi ca' yjudíojäyity.

Pablo jahueeni cayajothuimbijty Agripa

24 Co Pablo jadu'n ymíñañ ma anajty ñayñígapxtüdyii, chi Festo mic míñañ:

—¡Mlocjiiyb miich Pablo! Míid je ixpíjcín nígi m'ahuimbity loci.

25 Chi Pablo y'adzooy:

—Ca' ñich nlocjiiy, miich míjtungmídpi Festo. Yi huidi ñich ngapxpyich je' je' tiy'ajtíp etz janchíp. 26 Yi rey Agripa ñejhuiydaayb yi' tüg'óciy jada, paady nmíydägíich aamic jotmic ma yi' yhuin-duu; com nnejhuíybich co yi' ñejhuiydaayb jada tüg'óciy, com canan hue' jada yajtuuñ yajmíydacy ayüchytuum. 27 ¿Nej mmíbíjcpy, miich rey Agripa, jadu'n nej ajcxy ymíñañ yi' Dios y'ayuccojaaybi? Nnejhuíybich co miich mmíbicy.

28 Chi je rey Agripa y'adzooy, ymíñañ:

—Janch tím jayinjaty jahuenjaty miich xycayajmíbicyich Jesucristo.

29 Chi Pablo ymíñañ:

—Oy yjayinjaty yjahuenjatyity ooy mícacjee mgamíbicy, chojcpy Dios co miich mmíbígipy Jesucristo etz nañ jadu'n tüg'óciy jäy huidi cham xy'amídoo'íjtíp ñich n'ayuc. Dios chojcpy co mmíbígipy Jesucristo jadu'n nej ñich nmíbicyich, jéyi janchtiy co ca' mmach'idípy jadu'n nej ñich nmach'ityich.

³⁰ Co je Pablo ym̄ydactay, chi je rey etz gobernador ytinaȳigy quipxyi m̄id Berenice etz jacjadyii hūidi anajty ajcxy jim. ³¹ Chi ajcxy ahuingujc oy capxyöygīxy Pablo ypocy, ñayñim̄áayigīxy miñ xyipy:

—Jada ȳeydijc ca' jada ti tundigoy, ca' ypadyii nicxy y'ögy, ni ca' ypadyii nicxy ymach'iñay pujxtigoty.

³² Chi Agripa nimay Festo:

—Jëbi ixypy nnajtzmaz̄iym Pablo co ca' ci'm ycanayñibijctzohuiyi co huen tiydunyii je emperador César jim Roma.

27

Pablo yajnicxi jim Roma

¹ Co ajcxy yajnihuinmaȳiy co xyquexáangixyich jim Italia, chi Pablo yajc̄iyejc m̄id jacjadyii machȳäy ma t̄üg capitán hūidi anajty yx̄i Julio, je' hūidi nihuindzin'ajtp t̄ügpīcy soldadt̄ijc hūidi anajty yx̄i batallón Augusto. ² Chi ñch ajcxy ndiḡiy ma t̄üg barco hūidi yhuindzin cogajp̄ip jim Adramitio. Je barco hue' anajty ñcxa'ñ ma nij̄jity barco jättac jim Asia ñaaxjot. Chi ñch ajcxy ndzooni. M̄id ñch anajty ajcxy Aristarco hūidi anajty cogajp̄ip Tesalónica jim Macedonia. ³ Com jabom ñch ajcxy nja'ty ma barco jättac jim Sidón. Jim je Julio pa'ayoy Pablo, e ahuaatzi ytu' co huen nicxy co'ixiy ym̄igügt̄ijc, etz huen je' ajcxy yajcayyii yaj'ügyii. ⁴ Co ñch ajcxy ndzooñ jim Sidón, chi je naax mejy'agujcp̄i yhui'mni anajty'amy hūidi yx̄i Chipre, m̄id co je poj anajty j̄ipcoboj̄iy je barco. ⁵ Chi je barco huinyöyñajxy je Cilicia

ñaaxjot etz Panfilia ñaaxjot, oy njädyich ajcxy jim Mira, tüg cajp jim Licia ñaaxjot.

⁶ Jim je capitán paty tüg Alejandría ybarco hue' anajty ñicxy jim Italia. Chi je capitán ñich ajcxy xyajbarcotigiiy. ⁷ Canaag xii ñich nyöy janch oñdägy, adzaach ñich ajcxy nja'ty mihuingon je Gnido co anajty je poj tzach jipcoboñiy je barco. Najx ñich ajcxy mihuingon Salmón, etz njyöy'ahuidijtyich ajcxy Creta je mejy'agujcpi naax. ⁸ Adzaach ñich ajcxy nja'ty ma barco jättac huidi anajty yxii Buenos Puertos, mihuingon Lasea.

⁹ Ti ñich ajcxy ooy anajty nxii digoy, e ooy anajty ycodzigijity je barco yajyöyii. Ti anajty je ayuuxii ñajxni, e ti mihuingon anajty je poj tuu tiempo huidi jäy ytijpy invierno. Paady Pablo je soldado huindzin jaccapxhuijy, ¹⁰ chi Pablo yminañ:

—Huindzindijc, jadu'n nej yam codzigi' jada ooy co njacnicxim barcojoty, ca' yjeyity co nicxy ndigooyim miid barco etz miid ñidzimy etz n'o'ctaayim.

¹¹ E je soldado huindzin yjacmijpidac oy je barco yajyöybi y'ayuc etz je barco capitán y'ayuc, ca'ydi Pablo y'ayuc. ¹² Com je' co je barco yjättac ca' anajty y'oyity, nicxy jim yajnajxcixy je poj tuu tiempo, chi je jacmaybi ajcxy yhuinma'ñypidacy, co jëbi barco yjacyöy, oc'ixaangixy pen yjätcixy jim Fenice ma Creta ñaaxjot. Jim ma tüg barco yjättac huidi y'aguu najtz'ixiñyb ma xii pidzimy, e jim anajty je poj tuu tiempo yajnaxaangixy.

Je mijpoj mijtigoy ma je mejy

¹³ Jadu'n yajaty co je jinboj hueeni ypidzimy, huin'it huinmay ajcxy co jebi yjactüyöy je barco. Chi ajcxy yajpidigy je mij pujx huidi barco yajtinayxijp, e yajyöychooñ je barco. Chi ñicxy je barco mejypa' mejypa' ma Creta ñaaxjot. ¹⁴ Huin'it hueeni tiempo ñajx, chi je micpoj miñ ma tichpoj pidzimy, huidi jäy ytijpy Euroclidón, jadu'n yhuimbizim, Noreste. ¹⁵ Chi je micpoj yajtütigajch je barco, e com ca' anajty ndimdüyöyixni miid je poj ycixpi, chi je micpoj ich ajcxy xyajnicxy adzip ma anajty tzocy. ¹⁶ Najx ich ajcxy mihuingon tüg naax mutzpi mejy agujcpi huidi yxi Clauda, e adzaach ich ajcxy nyujcjugujcy je mutz barco huidi anajty miimb ixhodzy ma je mijpi. ¹⁷ Co ajcxy jugujcpidzimy je mutz barco, chi ajcxy yajtuuñ maychaay e xojtzmujcy je barco aguu. Chi ajcxy yajminajcy je huit huidi anajty poj mic tzach ymajchyp. Je' co chigyixy co chimnicxiyb je barco jim ma mejy huidi ca' y'agomity, ma püjot huidi yxi Sirte. Chi ajcxy ñayyejci huen poj yajnicixigy. ¹⁸ Com jabom, com ooy mic anajty je poj, chi ajcxy je chimy mejy cöjibijptaayi. ¹⁹ Je midugig xibi, chi ich ajcxy nmejycöjibijptay je tungbejt huidi yajtumyb ma je barco. ²⁰ Ti anajty canaagxi ñajxni e ich ajcxy ca' ma xi madza' n'oc'ijxcixni, miid je mij poj ycixpi huidi anajty ich ajcxy xychachyajtüyöyp. Hue' ich ajcxy ndijcixy co ti ndigóoyixyich, ca' ndijy ich ajcxy ndzögipy.

²¹ Ti anajty xi tiempo ich ajcxy nyajnajxcixy jaygay, chi Pablo ytinayigy, nimay je jäy ajcxy:

—Yëydijctjc, co ich miich ajcxy xyca-

capxymidooy ca' ngatsoonim jim Creta ñaaxjot, e ca' ixypy jada ayo'n yam jadu'n nbaatim. ²² Jadachambi ca' mdajcixy mmaygixy, ca' ni pin ytigoya'ñ, oy je barco yjatigoy. ²³ Amygoodz je nHuindzin Dios tög y'áγγελ ti ñayguëxigyyi ma ñich, je Dios huidi ñich ngapxymidooybich, yi' ti quexy. ²⁴ Je áγγελ ti xyñimäyich: “Ca' mdzigïy, Pablo, copicy co mjatyjädipy ma je mij'ane'mbi, je César yhuinduu. Mïid müich ycixpi, Dios ñihuänamy yajtzögamy tög'ócïy huidi ji barcojoty, ca' ni tög y'ögipy.” ²⁵ Paady nayjot'amijmóoyigix, yëydjctjic, nmibjcpyich Dios co jadu'n yjada'ñ jadu'n nej yi' y'áγγελ ti xyñimäyich. ²⁶ Ooy ycopicyity nicxy nmijpojpejtïm ma tög naax mejy agujcpi.

²⁷ Majmactz xii je mic poj anajty yajyöyïi je barco oyñinej jim ma je mejy huidi yxii Adria, chi mijcutz je barco yajyöybi jihui'ñybicy co anajty ti mihuingoñ naax. ²⁸ Chi ajcxy quipxy je ñii jadu'ñi anajty ycicyity, e hue' ajcxy quipxy iipx xap ycicyity. Jahuengi huin'it jadüg'oc ajcxy quipxy je ñii, e hue' oy quipxcixy majmocx xap ycicyity. ²⁹ E co anajty chigüygixy co tijy je barco jipcobonïhuipy ma tzaagop, chi ajcxy pidacy ñijoty midaax pujx ma barco y'ijx, je huidi yxiijp anclas, janch tzigüyb anajty ajcxy y'ahuijxcixy cooni ximïhuipy. ³⁰ Chi je' ajcxy huidi anajty barco yajyöyp yhuinma'ñybaty co yquëga'ñ ameech. Chi ajcxy pidacy ñihuingixy je mutz barco. Chi ajcxy ñaybidaaci jadu'n nej jihuiy je ancla jac yajminagaangixy jim ma barco yhuinduu. ³¹ Huin'it Pablo nimay je soldado huindzin etz je soldadtjic:

—Pen ca' jada hui'mgixy ma barco, ca' miich ajcxy mejy ypidzimipy.

³² Huin'it ajcxy tzujectujcy je tzaay huidi je mutz barco anajty m̄id ycoxochity, chi ajcxy yajcäy je mutz barco niijoty, e chi je mejy yajnicxyi.

³³ Moñyi Pablo migapxy je jäy ajcxy, chi ajcxy nimay co huen huingayñajxcixy, chi Pablo yminañ:

—Cham majmactz xii ma miich ajcxy ca' mmaagixy, e ni ca' mgaaygixy m'uuccixy.

³⁴ Tun may'ajt caaygixy oy jadu'ñyi, copicy jada co njatyñidzooctähuaanim, ni tüg ngöhuay ca' ytigoyaanim.

³⁵ Co Pablo jadu'n yminanday, chi tüg tzajcaagy conigy, chi jayijp Dioscojuyip yajnaxxy mayjäy agujc, chi tujc-huäcxy etz ytigiiy ajcxy caaybi.

³⁶ Mic'amy je jäy ajcxy yjotmigiyday nidüg'óciy, e chi ajcxy ytigiiy caaybi. ³⁷ Hue' anajty ñaybaatigixy barcojoty mejtz migo'px jatugi'px majmocxtüg jäy.

³⁸ Co ajcxy ycayday, chi jacniigöjibijpy je trigo, jigix huen cöminacy je barco chimy.

Chi barco tüg yquiñ

³⁹ Co yximiiy, chi je barco yajyöybi ca' ijxcapy je naax, e y'ijxpaty tüg it ma mejy huen ycogegiy, e jim anajty püjot. Chi ajcxy yhuinmañybaty co'ixaangixy pen jëbi jim yjäty je barco. ⁴⁰ Chi ajcxy tzujectujcy je tzaay huidi anajty m̄id yxochity je anclas, e chi anclas yhui'mni niijoty, huin'it ajcxy miguejiy je niigaap huidi tumb co tümöy je barco. Chi huit jadüg'oc ajcxy pidacy huidibi pojmajtzp. Chi je barco ytigiiy yöyb, tiiy ajcxy yajnicxy ma püjot. ⁴¹ E chi oy minaybadyii ma anajty je mejy mejtz it oy mic ycujiin, chi oy yjëpxy püjoty. Je

barco jìp oy ytiḡy tätzpicy ca' huaad y'ocyücxni, e je barco iḡ oy ytiḡyñ aguejthuäcxpi ymüd je mejy püjoty ymijaa. ⁴² Chi je soldado yjayaj'ögaañ je machyjäy ca'ydi yqueeccixy ayaahuip. ⁴³ Je soldado huindzin ca' a'ixiy nicxy yaj'ögyii Pablo, chi nimay soldado ajcxy co huen ixmajtzcixy yi machyjäy. Chi je soldado huindzin nimay je jäy ajcxy co huen nüdigiygixy pinjaty jajtp yau. ⁴⁴ E huidi ca' jajtcixy yau jaydëbi nüdigiygixy müd pu'y etz müd barco pedasi. Jadu'n ajcxy nidüg'óciy ymejy ypidzimday.

28

Pablo yjädy ma tüg naax mejy'agujcpi huidibi yxii Malta

¹ Co ñch ajcxy nübidzimday, chi ñch ajcxy nejhuy co je naax mejy agujcpi hue' anajty yxii Malta. ² Je conaax ajcxy ooy oyjäy'ajtin tuuñ müd ñch ajcxy, chi ajcxy yajmijiy jin mij, müd co anajty ooy ytiichity, etz co anajty ooy ytuubojy. Chi xyñimay ñch ajcxy co müñ n'ocxáamgixyich. ³ Chi Pablo ytiḡy jäxycajpmujcpi, e chi pidacy jinjoty. Chi tüg ahua'n iyujc pidzimy, yquëgy anajty müd je anbi, chi Pablo ymajtzi ma yci'. ⁴ Co je cogajp ajcxy ijxy je ahua'n iyujc ytiyñäy ma Pablo yci', chi ajcxy ñayñimaayi miñ xyipy:

—Jadayaabi yëdyjc, jäy yaj'öcpi jada. Oy ca' ti y'ögy mejyoty, je tiydumbi tzajpjotypi ca' a'ixiy nicxy yjactzinäy.

⁵ Chi Pablo yci' huinxidicxy, e jinjoty oy ycäy je ahua'n iyujc, e ca' Pablo ni nej yajty. ⁶ E tüg'óciy je jäy tzach'ahuijxcixy mina anajty y'ocquiixigy, o

mina anajty y'oc'ögy. Ti anajty ooy y'ahuijxcixy jecy; co ajcxy ijxy ca' ni nej yjaty, chi ajcxy yhuinmañ yajtigajch. Yminañ ajcxy co Pablo hue' jada' yi' tüg dios.

⁷ E mihuingon anajty je Publio ytijc, je huidi nigohuajc'ajty je jimbi naax mejy'agujcpi. Je Publio xyajjättacich ajcxy, e xyajcaay xyaj'uucich ñich ajcxy yajxon tugüg xii. ⁸ Jadu'n yjati co je Publio anajty yteedy ypiigyii müd tooy gohuajc etz müdity anajty ni'pypa'm. Chi Pablo oy ixty je pa'mjäy. Chi Pablo Dios mibijctzoy, e chi cñixajy, e yajtzoocy. ⁹ Müd jadaay miñ ajcxy nijëjity pa'mjäy huidi anajty ajcxy tzinaayb ma je naax mejy'agujcpi e chi ajcxy chooctäy. ¹⁰ Müd jada ycixpi nyajcömay ñich ajcxy, e nyajmooyich ñich ajcxy tijaty huidi ñich ajcxy nidüyöyipy barcojoty.

Chi Pablo oy yjädy jim Roma

¹¹ Tugüg po' ñich ajcxy anajty ti n'ijtni jim. Chi ñich ajcxy nbarcotigüy ma tüg barco huidi anajty je tuuboj tiempo ti yajnaxy jim Malta. E je barco capitán jim anajty ycogajpity Alejandría. E je barco ymüd anajty ahuinax huidi anajty yxii Cástor etz Pólux huidi ajcxy dios'ajtpy. ¹² Chi ñich ajcxy oy njäty ma je barco jättac huidi anajty yxii Siracusa. E jim ñich ajcxy nhui'müy tugüg xii. ¹³ Ndzoñich ajcxy Siracusa barcojoty, nicxy ñich ajcxy mejypa' mejypa', ixti nja'tyich ajcxy jim Regio. Com jabom oy ypidzimy jinboj, chi co maax oy nja'ty ñich ajcxy Puteoli. ¹⁴ E jim ñich ajcxy nbaaty nijëjity jäy huidi anajty mijpidaacp Jesús. Je' ajcxy xycohuanüyich co ñich ajcxy jim

hui'm'ipy tög semaan. Chi ñch ajcxy jadüg'oc nd-zooñ, nn'icxy'ich ajcxy jim Roma. ¹⁵ Je mibijcp'idijc ajcxy huidi anajty jim Roma ymidou ajcxy ayuc co ñch anajty ajcxy jim nicxy, chi ajcxy chooñ nijëjity oy xyjijpcobad'iygixy'ich ma je cajp mercado m'iid huidi anajty yxii Foro de Apio. Jacjadyii mibijcp'idijc oy xyjijpcobad'iy'ich ma tög jättac huidi anajty yxii, Tres Tabernas. Co Pablo jijpc'o'ixiiy je mibijcp'idijc ajcxy, chi Dioscojuyip yajnaxy etz ñajjihui'yí janch jotcujc. ¹⁶ Co ñch ajcxy nja'ty jim Roma, chi je soldado huindzin c'eyejcy je machyjäy ma je comandante, per a'ixiiyb co Pablo tzinäy ahuingujc ma tög pijctzoydijc, jëyi anajty tög soldado ycuend'adyii.

Chi Pablo Dios y'ayuc capxhuäcxi jim Roma

¹⁷ Tugüig xii maabi Pablo anajty yjätty jim Roma co capxyñiguejxy je judío huinmij'anäctijc huidi anajty ajcxy tzinaayb jim Roma. E co ajcxy ñaymujci, chi Pablo yminañ:

—Migügtijc ajcxy, oy ñch ca' ti ndundigooy'ich m'idi judío jäy ajcxy etz m'iid ajt nmij'ap nmijteedy ycötújc'in, chi je judíojäy ajcxy xymajch'ich etz xyc'eyejc'ich ma romano tungm'iidpi jim Jerusalén. ¹⁸ Co je romano tungm'iidpi ajcxy xy'amidooy'ich, huin'it ajcxy xyjanajtzmazihuaañ'ich, ca' ti ajcxy paaty ma ñch huidi ajcxy xyajco'ög'ihuib'ich. ¹⁹ Co je judíojäy yjotmätcoty ajcxy, ca' ajcxy a'ixiiy co nyajnajtzmazihuib'ich, chi nayñibijctzohui'y'ich co nyajtiydunipy'ich ma je mij'ane'mbi ya Roma, oy ñch ca' ti xihuin nm'iidity m'iid ñch nmigonaax nmigogajp'ich. ²⁰ Paady ti ngapxyñiguejxcixy co

nyajm̄dm̄ydäga'ñ ajcxy tigíx co nmach'ityich. M̄id co ñch ajt n'ahuijx̄im co Dios nihuäna'ñ yajñidzöga'ñ yí Israel jäy etz yajjugypiga'ñ je jäy tiibi y'öccixy. Paady jadachambi nyajpaadyich mach.

²¹ Chi ajcxy y'adzooy:

—Ca'ni ñch ajcxy ni ti necy xyñijäty huïdi tzoomb jim Judea m̄id miich ycixpi. E ni tüg ajt nmigügtijc ca' jibic xyñim̄ydägy. ²² Nja'amido'idaamyich jadu'n nej miich mm̄ydägy, com nnejhuiybich co huen yma'ámyity jäy ymidzip'ajty je jemybi y'ijxpijcin.

²³ Chi tüg x̄i ajcxy agapxtujcy. Co oy paady mina anajty ti agapxtujccixy, chi mayjäy ñayyöymujci ma je Pablo anajty jättac m̄idity. Jopy ajcxy yajtzondacy capx̄i miydägī ixti ycootztzuu'iy, jadu'n Pablo tzachyajn̄maaygixy je Dios y'ayuc nej Dios yhuinma'ñ m̄idity. E yajjothuimbidaangixy anajty ma je Jesús m̄id co capxticxy je Moisés ycötujcin nej anajty yjaybetyity, etz jacjadyii ayuc cojaaybi ñecy. ²⁴ Nijëjity cöbije ajcxy nej Pablo anajty ymina'ñ, etz nijëjity ca' ajcxy m̄ibijcy. ²⁵ Co ca' anajty ajcxy miñ xyipy yajtüḡiy yhuinma'ñ, chi ajcxy ix̄y ca'ix̄y yöychóongixni. Chi Pablo yminañ:

—Tiytudägy je Espíritu Santo nimay je nmij'ap nmijteedy ajt co yajcapxy je profeta Isaías co yminañ:

²⁶ Nicx nima' je jäy ajcxy: Miich ajcxy oy mjamidohuipy n'ayucich, per ca' ajcxy mhuiñjihuihuip; oy mjahuind̄icxcixipy, e ca' ajcxy mhuiñjihuihuipy.

²⁷ Com jada jäy ajcxy hue' yjot'ahuimbijtcixy janch juuñ, e ymidoogixy oyñinej, jadu'n nej jihuiy

yhuimbïdz'ijtcixy, e ni ca' y'oc'íjxcixy miid yhuin e ni ca' ocmïdoogixy miid yta'tz'ac, ni ca' huinjihuuygixy miid yjot yhuinma'ñ, ni ca' minipy ajcxy ma ich jigix myajtzögibich.

²⁸ Nejhuuygixy miich ajcxy co jadachambi etz jacnicxpi xi tiempo Dios y'ahuanib y'ayuc ytiy'ajt nej jëbi jäy y'alma ajcxy yajnidzögipy ma je jäy ajcxy huïdi ca' yjudíojäyity, e je' ajcxy y'amïdo'idipy.

²⁹ Co Pablo jadu'n nimay ajcxy, chi ajcxy ñicxtáaygixni chach ñayhuin'ibéjtigixy ñayhuingapxéjtigixy miñ xyipy.

³⁰ Pablo mejtz jimijt jim chinay ma je pijctzoydijc jim Roma, e yajxon xiic'adzoy capx'adzoy pïn miñ ycogapxiyi. ³¹ Janch agujc jotcujc anajty capx-huäcxy je Dios y'ané'mïn, e yaj'ixpicy je Huindzin Jesús ytiy'ajt, e ni pïn ma ycapx'adugyii.

El Nuevo Testamento en mixe de Coatlán **New Testament in Mixe, Coatlán (MX:mco:Mixe,** **Coatlán)**

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 21 Feb 2024 from source files
dated 29 Jan 2022

4190de74-18ab-52cf-ba4e-5f99ab05892f